

अंक : अक्टूबर-24, मार्च-25

रजि. नं. 31319/77

ISSN : 2320-0995

राजस्थली

प्राचा, साहित्य, संस्कृति आर लोक चेतना री राजस्थानी लिपावी



सम्पादक
श्याम महर्षि



प्रबन्ध सम्पादक
रवि पुरोहित



अन्तरराष्ट्रीय मातृ भाषा दिवस रै मौके आयोजित ग्यान गोठ में विचार
राखता शिक्षाविद् साहित्यकार अर चावा कवि डॉ. गजादान चारण, डीडवाना
अर गोठ में उपस्थित सुधी श्रोतागण



लोकचेतना री राजस्थानी तिमाही
राजस्थली

अक्टूबर 2024-मार्च 2025

बरस : 48

संयुक्तांक : 1-2

पृष्ठांक : 165-66



संपादक
श्याम महर्षि

प्रबंध संपादक
रवि पुरोहित

संपादक-मंडल

डॉ. मदन सैनी
किरण राजपुरोहित

डॉ. गजादान चारण
मोनिका गौड़

प्रकाशक

मरुभूमि शोध संस्थान

(राष्ट्रभाषा हिन्दी प्रचार समिति, श्रीडूंगरगढ़ 331803)

www.rbhpsdungargarh.com

e-mail : rajasthalee@gmail.com

आवरण अर रेखाचित्राम
शैलेन्द्र सरस्वती, बीकानेर
मो. 9116727333

संयोग राशि

पांच साल : 1000 रिपिया, आजीवण : 2500 रिपिया, संरक्षक सदस्य : 5100 रिपिया

Phone Pay / Google Pay / Paytm : 9414416252

इण अंक में

संपादकीय

राजस्थानी रचाव रै पेटे सावचेती राखण री जरुरत

रवि पुरोहित

3

आलेख

सबदां री परोटणगत पेटे

डॉ. गजादान चारण 'शक्तिसुत' 5

उल्थै रै बूतै रातो-मातो हुंवतो राजस्थानी गद्य-साहित्य

शंकरसिंह राजपुरोहित 12

बकाई

माणक तुलसीराम गौड़ 19

कहाणी

भुआजी ! भुआजी !

छगन लाल व्यास 23

अफसर

अरविंदसिंह आशिया 31

कित्ता चौरावा

मदन गोपाल लढा 37

गायां रो गवालियो

डॉ. मनमोहन सिंह यादव 42

लघुकथा

चुगली रो चक्कर / सेठजी रो त्याग

ललित शर्मा 48

अनूदित लघुकथा

चार लघुकथावां (मूळ : कमल कपूर)

अनुवाद : विमला नागला 51

संस्मरण

मुथरा राम

मनोहर सिंह राठोड़ 56

म्हारी दादी

श्याम जागिड़ 60

व्यंग्य

चौपाल

छत्र छाजेड़ 'फक्कड़' 65

दूहा

चाय-पच्चीसी

मानसिंह शेखावत 'मऊ' 70

कविता

टिकड़यां-सुयां सूं जीवां हाँ / औ सांस अटकतो जावै है

भंवरलाल बैरागी 72

सफर रा दरसाव

डॉ. रमेश 'मयंक' 74

कीं तो हुयो है !

सत्येन्द्र सिंह चारण 77

गांव रा काचा-पाका घर

मीनाक्षी पारीक 79

चार कवितावां

सोनाली सुथार 81

तीन कवितावां

डॉ. कृष्णा कुमारी 83

चार कवितावां

पवन कुमार राजपुरोहित 85

गजल

चार गजलां

अब्दुल समद 'राही' 87

गीत

दो गीत

देवकी दर्पण 89

तीन गीत

देवीलाल महिया 91

कूंत

धरती री सोरम : आरै-सारै रो जथारथ

राजेन्द्र शर्मा 'मुसाफिर' 93

राजस्थानी रचाव रै पेटै सावचेती राखण री जस्करत

आधुनिक राजस्थानी साहित्य रै सागै आज री घड़ी में लगौटगै हरेक विधा में लेखन होय रैयो है। गद्य साहित्य में कथा-उपन्यास रै सागै कथेतर साहित्य विधावां में ई मोकल्लो सिरजण होय रैयो है, जिणमें निबंध, संस्मरण, व्यंग्य, नाटक, अेकांकी अर डायरी विधा में ई खूब पोथ्यां साम्हीं आय रैयी है। इणी भांत पद्य-साहित्य में ई कविता रै टाळ ई गीत-गजल, हाइकु, पंचलड़ी, क्षणिकावां आद विधा में ई लगोलग पोथ्यां छप रैयी है। पोथ्यां रै टाळ आं विधावां री मोकल्ली रचनावां ‘राजस्थली’ रै सागै माणक, जागती जोत, कथेसर, हथाई, रुड़ौ राजस्थान अर ई-पत्रिका राजस्थानी वाणी, नेगचार आद में लगोलग छप रैयी है, पण राजस्थानी रचनाकार नै आपरै रचाव रै पेटै कीं सजग-सावचेत होवण रै सागै ईमानदार रैवण री ई जस्करत लखावै। इयां नीं हुवणो चाईजै कै पैलै ई ड्राफ्ट में लिख्योड़ी रचना नै पाछी बिना बांच्यां ई ‘ऑन डिमांड’ किणी पत्रिका में छपण सारू संपादक नै डाक सूं कै पछै ई-मेल, वॉट्सएप सूं भेज र आपां निरवाच्य होय जावां।

इणरै सागै अेक बात आ भी अखरै कै केर्इ रचनाकार आपरी अेक ई रचना नै अेकै सागै सगली पत्रिकावां रै संपादकां नै भेज देवै अर पछै उडीकता रैवै कै किसी-किसी पत्रिका में रचना छपी है। राजस्थानी में गिणती री तो पत्र-पत्रिकावां है अर पाठकां री संख्यां ई घणी कोनी, तो पछै अेक ई रचना दो-तीन पत्रिकावां में छप्यां सूं फायदो काई? घूम-फिर र सागी रचना पाठक नै किणी दूजी पत्रिका में बांचण नै मिल जावै, तो उणरो माथो तो ठणकै ई ठणकै, राजस्थानी पत्रिका रो संपादक भी सोचण नै मजबूर हुय जावै कै राजस्थानी रचनाकार इण भांत रो वैवार क्यूं करै? जदकै

आज री टैम तो आपरी रचना रै प्रकाशन-प्रसारण रा औरूं ई केई माध्यम आयगया है। फेसबुक, वाट्सएप ग्रुप अर दूजै किणी इलेक्ट्रोनिक माध्यम पर ई सागी बा ई रचना देखण नै मिल जावै, जकी किणी पत्रिका में छपगी है या छपण वाली है। संसाधनां री कमी रै चालतां पत्र-पत्रिका ई मोड़ी-बेगी छपै, इण बात नै समझ 'र राजस्थानी रा रचनाकारां नै कीं तो खटाव राखणो ई पड़सी। अेक बात और, आपां नै रचना रै वास्ते किणी संपादक रै समचै कै किणी पांडुलिपि प्रकाशन योजना री उडीक नीं राख 'र लगोलग सिरजण करतो रैवणो है। अमूमन देखां कै अकादमी या किणी दूजी संस्थावां कानी सूं पांडुलिपि प्रकाशन सहयोग री विज्ञसि री उडीक में आपां सिरजण नै विराम-सो देय देवां अर जद कदैई औड़ी तजबीज बैठै तो जापड़-तापड़ कर 'र अस्सी कै छिनवै पानां री पांडुलिपि त्यार करण री आफळ में लाग जावां। लगोलग सिरजण सूं आपां आगै औड़ी कोई नौबत ई नीं आवैला।

राजस्थानी में रचाव करती बगत आपां नै सबदां रै बरतारै रो भी ध्यान राखणो पड़सी। कम सूं कम इयां लागणो तो चाईजै कै रचना राजस्थानी री है। खाली हिंदी रै का, के, की री ठौड़ राजस्थानी बणावण सारू रा, रै, री सूं काम नीं चालै। इण सारू रचाव री बगत थोड़ै चिंतन-मनन री जरूरत है। थोड़ो-सो धीजो राख्यां अर चिंतन-मनन कर्ह्यां आपां री रचना में ठेठ राजस्थानी रा सबद आय सकै, जका कै आपां रै हियै री सबद-संपदा हुंवता थकां ई उण बगत ध्यान में नीं आवै, पण रचना नै दुबारा संवारती बगत बै सबद मत्तैई मगज में आय जावै। इण वास्तै किणी रचना नै पत्र-पत्रिका रै संपादक कनै भेजण सूं पैलां उणनै थोड़ी संवारण री जरूरत हुवै, इण सारू थोड़ै धीजै अर खटाव री भी जरूरत पड़ै।

‘राजस्थली’ रै इण अंक रै पैलै आलेख रै रूप में डॉ. गजादान चारण ‘शक्तिसुत’ रो आलेख ‘सबदां री परोटणगत पेटै’ राजस्थानी रचनाकारां सारू घणो महताऊ अर कीमिया है। इणी भांत किणी दूजी भारतीय कै विदेसी भासा सूं राजस्थानी में अनुवाद करती बगत ई आपां नै सबदां री परोट पेटै सजग अर सावचेत रैवण री जरूरत है, जद ई आपां किणी रचना रो सांगोपांग राजस्थानी रूपांतरण कर 'र उण मूळ रचना रै सागै न्याव कर सका। इण बाबत भी इण अंक में अेक आलेख ‘उल्थै रै बूतै रातो-मातो हुंवतो राजस्थानी गद्य साहित्य’ दिरीज्यो है। शंकरसिंह राजपुरोहित रै इण आलेख में अनुवाद री महता अर उण सारू जरूरी नेम-कावदां रै सागै राजस्थानी गद्य साहित्य रै लेखै अबार ताईं हुया राजस्थानी अनुवाद री सांगोपांग विरोल करीजी है। राजस्थानी रा नूंवा रचनाकारां सारू तो औं दोनूं ई आलेख घणा महताऊ है। इणरै टाळ ई इण अंक री सामग्री आप सुधी पाठकां नै अवस दाय आवैला, इणी विस्वास सागै...

रवि पुरोहित

9414416252



डॉ. गजादान चारण 'शक्तिसुत'

सबदां री परोटणगत पेटै

वाणी नै व्यक्तित्व रो ऊज्ज्वो दरपण मानीज्यो है। 'मरदां आ ही पारखा, बोला अर लाधा' मतलब औ कै मिनख री इत्ती-सी पारख है कै बोल्यो अर लाध्यो। बोलतां ई ठाह पड़ जावै कै कितोक पोदीणो है। किसै माहौल में रैयोड़े है। घर-परिवार रा संस्कार किसा 'क है। खुद री सोच रो दायरा कितोक है। मांयनै कीं माल है का कोरी डम-डम ई बाजै। 'महनै घड़गी जकी बाड़ में बड़गी' इयांकली सोच राखणियां किरड़े दाईं बंटीजता धंतरासिंह जित्तै नीं बोलै बित्तै तो ठीक, पण बोलतां ई सो पलमो चौड़े आवै अर सामलो सटाक देणी पिछाण लेवै। दुनियां तो भरम री है अर बोलतां ई भरम री भीतां धुड़ जावै। पछै सामलो आ कैवतां क्यूं टेम लगावै कै 'सेफां बाई राम-राम'। जद ई तो बडेरां बार-बार तोल-तोल ऐ बोलण माथै जोर देवतां कैयो है :

सिद्धां और कवेसरां, जे कोइ जाणै विद्ध।

कपड़ां में क्यूं ही नहीं, सबदां ही में सिद्ध ॥

कोरा ऊज्ज्वा अर चीकणा कपड़ा पैरण अर उचक-उचक ऐ बोलण सूं प्रभाव नीं जमै, उण सारू सबदां रो सटीक अर सही प्रयोग होवणो जरूरी है। सबद री महत्ता उचित अरथ साथै समन्वित होवण सूं ई बणै। सबद रै सही अर सारथक प्रयोग नै जाणण अर सीखण सारू सबद री व्युत्पत्ति सूं लेय वरतमान रूप ताणी री विकास जात्रा नै जाणणो जरूरी है। हरेक सबद री एक सांस्कृतिक, सामाजिक अर भासावैज्ञानिक विकास जात्रा हुवै। सबद रो सटीक अर सही अरथ पकड़ण सारू इण विकास जात्रा नै जाणणो जरूरी है। रचनाकार सारू जरूरी है कै वो आपै लक्षित

ठिकाणो :

'साकेत'

केशव कॉलोनी

स्टेशन रोड, डीडवाना

(राजस्थान) 341303

मो. 9414587319

पाठक वरग नै ध्यान में राखतां सबदां नै परोटै। भासा नै सीखण रो मतलब उणसूं जुड्योडै समाज रै व्यवहार अर उणरै सांस्कृतिक रीत-रिवाज नै सीखणो हुया करै। भासा समाज रै विचार अर व्यवहार रो उत्पाद है। सगळा लोग आपरै समाज सूं ई भासा सीखै। भासा रै साथै वै संस्कृति नै ई सीखै अर इन सीगै आपरी संज्ञानात्मक खिमता रो विकास पण करै। भासा सांस्कृतिक पिछाण रो सबलो माध्यम है। किणी भासा री ताकत उणरी सबद संपदा हुया करै। संसार रो समूचो व्यवहार सबदां माथै टिक्योडै है। जको मिनख पात्र अर प्रसंगानुकूल सही सबद-प्रयोग जाणै बो अनन्त विजय रो भागी बणै अर जको सबदां रो सटीक प्रयोग नीं जाणै बो लोकनिंदा पावै या पछै लोकहंसी रो पात्र बणै। ऐक लेखक सारू जरुरी है कै बो सबदां री परोटणगत पेटै सावचेत रैवै। सामान्य रूप सूं भी जिणनै परोटणो हुवो, उणरी परकत नै जाणणो जरुरी हुवै। परकत पिछाण्यां बिना कोई नै परोटणो संभव नीं हुवै, सबद भी इन रा अपवाद नीं है।

‘सबद’ संसार रो सबसूं मोटो यायावर है। औ मिनखां री जीभ रै उडणखटोड़े में बैठरै आखै जगत री सतत जात्रावां करै। मिनख जद कठैर्ड जावै तो बो आपरै साथै भासा नै अवस लेयरै चालै। मारग रै जिण-जिण पड़ावां माथै रुकै, आपसी बोल-बंतल में बैठ भासावां रो मेल हुवै। इन मेल में सबदां रै आवागमन सारू खिड़कियां खुलै। ऐक भासा रा सबद दूजी भासा में आवै अर समै प्रवाणै बरतीजण लागै। समै री छाप सूं कदै ई आं सबदां री ध्वनि बदलै, कदै अरथ बदलै तो कदै दोनूं ई बदल जावै। घणी बार तो इयां हुवै कै सबद रो मूळ पिछाणणो घणो अबखो काम हुज्यावै, पण अबखो काम भी कोई नै तो करणो पड़सी। इयां ई समान अरथ वाला सबदां नै आडैकट काम में लेवणां सही कोनी। बां में भी देस, काळ, परिस्थिति अर स्थिति रै मुजब अरथ ढूँढणो पड़ै। ‘चालै जियां ई चालण द्यो’ वाळी शैली सूं कित्ता दिन काम चालसी? ऐक अरथ वाला होवण रै बावजूद ‘चावळ’ री ठौड़ ‘चावळ’ अर ‘अखत’ री ठौड़ ‘अखत’ नै काम में लेवणो पड़ै। माण बधावण सारू ‘चावळ चढाणो’ ई कैवणो पड़सी ‘भात’ चढावणो का पछै तंदुळ, अखत या साल चढावणो नीं कैय सको। मायरैदारां ताणी भात बणाईजै तो तीसरै रा चावळ रांधीजै, आंरी अदला-बदली स्वीकार कोनी करीज सकै। खेती चावळां री ई करीजै, तंदुळ, साल अर अखत री नीं। इयां ई कोई मिनख आपरै गांव नै तो सुरग कैय सकै, पण गांव में रैवणियां नै सुरगावासी कैयरै देखो। भूमि सूं ‘भोम’ सबद बण्यो है, पण ‘भूमिका’ सारू ‘भोमका’ काम में लेवणो भारी भूल मानीजसी, क्यूंकै ‘भोमका’ तो समसाण सारू रूढ हुयग्यो। इणी गत बालण सारू काम में लेवण वाळी सूखी लकडी नै बल्हीतो, काठ, इंधण आद नामां सूं जाणीजै, पण आं सगळां री आप-आपरी ठौड़ है। चूल्है कनै बल्हीतो, मुसाणां में काठ, बेचण सारू इंधण सबद काम में लेईजै। ब्यांव रै बगत घर में सबसूं पैलपेत सूखी लकडी ई ल्याईजै, पण इणनै ‘मुगदणो’ नाम सूं पुकारीजै, उणरा

गीत गाईजै। व्यांव में बल्लीतो, काठ या इंधण बोलणो अपसुगन मानीजै। इण वास्तै चंवरी सारू काम में लिरीजण वाळी लकड़ी नै ‘समीधा’ कहीजै। ओक-ओक सबद री आपरी सत्ता है अर सत्ताधारी आपरै आसण माथै ई ओपै।

लारलै दो-तीन दसकां में हिंदी हुवो भलां ई राजस्थानी, दोनां में परिमाण री दीठ सूं सिरजण में मोकळी बधोतरी हुई है, पण इण बधोतरी में सबदां नै मनमानै ढंग सूं परोटण री प्रवृत्ति सामनै आई है। घणकरां कनै तो सबदां री सही वर्तनी अर अरथ-गर्भिता कानी ध्यान देवण री फुरसत ई कोनी। भासा रै प्रति जिज्ञासा-वृत्ति दिनोदिन घटती निगै आवै। आज री पीढ़ी बिहारी री ‘अनबूडे बूडे तरे जे बूडे सब अंग’ वाळी बात सूं आंख चुरावती निगै आवै। सबदां नै निरजीव दाँई बरतै, बांरी आतमा नै देखण री खेचल कुण करै? इयां लागै जाणै भासा वालै समदर रै पार जावण अर गैराई नापण री चाहत मंद पड़ागी। फगत किनारै पूणण में ई पोमीज रैया है, जदकै लेखक, मीडियाकर्मी, प्रशासक, शिक्षक, नेता, वक्ता आद सारू तो खास जरूरी है कै सबदां री गैराई सूं परिचित हुवै। आम आदमी सारू तो भासा रो मतलब इत्तो ई है कै बो आपरी बात नै जियां-तियां सामलै ताणी पुगा देवै अर सामलै री खुद समझ लेवै, पण लेखक अर शिक्षक तो इत्ते सूं संतोष नीं कर सकै। बानै व्यष्टि री बजाय समष्टि रो ध्यान राखणो जरूरी है।

“उपजहिं अनत अनत छवि लहिं” कैवतां गोस्वामी तुलसीदासजी इण बात रो साफ संकेत करै कै रचना जलम कठै ई लेवै अर सोभायमान कठै ई और जाग्यां हुवै। दूजै सबदां में बात करां तो ‘रचना’ रचनाकार री कलम सूं पैदा हुवै अर पाठक रै काळजै में सादर विराजमान हुवै। इण दीठ सूं रचनाकार रो औ दायित्व हुवै कै बो पाठक नै सुभग संदेस देवै, संदेह नीं। संदेह अलंकार में भी छेवट असली संदेस फूटणो जरूरी हुवै। कलमकार या वक्ता आपरी बात नै कैवण सारू डावा सबदां नै काम में लेवै, आ जरूरी है। ओक ई अरथ सारू काम आवण वाल्वा मोकळा सबदां मायं सूं प्रासंगिक अर पूरो अरथ देवण वाळो सबद छाँटै। असल में मानखै रो इतिहास धरम अर राष्ट्रीयता सूं नीं जाणीजै, उणनै जाणण सारू भासायी अर छेत्रीय आधार खोजणा पड़ै। किणी ठौड़ री भासा सीधी-सीधी जातीय पिछाण या राष्ट्रीयता सूं नीं जुड़े वरन जन-समूह खुद आपरी पिछाण सारू आपरी भासा नै जातीयता अर राष्ट्रीयता सूं जोड़ै। “कोस कोस पर बदलै पाणी, चार कोस पद बाणी” वाळी बात नै मानतां किणी भासा रै मानकीकरण नै सौं टका अंगेजणो सौरो काम कोनी पण भण्या-गुण्या लोगां अर खासकर लेखक-कवियां-शिक्षकां सूं इतरी उम्मीद तो जरूर रैवै ई है कै बैं जिण भांत री सबदावली काम में ले रैया है, उणसूं बांरी भासा रो सम्मान तो बण्यो रैवणो चाईजै। जे आपणै सबदां सूं भासा उपहास या जुगुप्सा री भागी बणै तो पछै आपां नै हियै में कांगसी फेरणी ई पड़सी।

अबार राजस्थानी लेखन में बरत्यूं री भासा रै नाम माथै धड़ल्लै सूं सबदां रो मनमान्यो प्रयोग होवण लाग्यो है। भासाविज्ञान में सबदां रै उच्चारण अर वर्तनी री दीठ सूं

जका-जका दोष बतायोड़ा है, बां दोषां सूं दूषित सबदावली नै 'बरत्यूं री भासा' कैय मतोमती काम में लेवणो, मायड़भासा साथै अन्याय करण जैड़े काम है। किणी भासा री मौखिक सबदावली में दोष आवणो सुभाविक बात है, पण उण दोष रो निवारण करण री बजाय उणनै धकोधकी आपरी भासा री पिछाण बणावणो आपरै पगां कुवाड़ी बावण जैड़े काम है। बिना किणी रचना या रचनाकार रो नाम लियां, थोड़ाक दाखलां सेती बात रो खराखरी खुलासो करां :

1. म्हे तो बोपारी हां, ढांढा खरीदां। बेचवाळी है के थारै ?
 2. अस्पताळ में बापू रै मूत री जांच कराई, पीळियो आयो ।
 3. पोसाळ में पढणियां छोरा-छोरियां री संख्या सूचनापट माथै लिखोड़ी रैवणी चाईजै ।
 4. म्है आज अजमेर गयोड़ो हूं। दो दिन बठै ई रैस्यूं।
 5. म्हे भी अबार बीकानेर पधारेड़ा हां। दो-चार दिन अठै ई बिराजस्यां ।
- ब्होत-सा लिखारां रै दिमाग में आ बात बैठगी कै ओछा अर कमतर सबद ई राजस्थानी री पिछाण है। बै जाणबूझ 'र इसा सबदां नै काम में लेवै। इण भांत रा जाण्या-अणजाण्या प्रयोग भावी पीढ़ी नै भ्रमित करण रै साथै मायड़भासा रै प्रति लोगां री श्रद्धा नै कम करण रो काम करै। ऊपर आयोड़े अेक नंबर वाक्य “म्हे तो बोपारी हां, ढांढा खरीदां। बेचवाळी है के थारै?” मांय 'ढांढा' सबद माथै विचार करां। 'ढांढो' गाय, भैंस आद चौपायै जानवरां रो सूचक सबद है, पण औं सबद उण अवस्था वाळै मवेशियां रो सूचक है, जका कों काम रा कोनी रैया। ढांढे रो अेक अरथ मूरख अर गुणबायरो भी हुवै। आपरै सुभाविक गुण सूं हीण मिनख अर जानवर ढांढो कहीजै। इण वास्तै गायां-भैंस्यां रा बोपारी, पशुवां रा बोपारी, जिनावरां रा बोपारी कैवै तो ठीक है, पण ढांढां रा बोपारी कैवणो उपयुक्त कोनी। ढांढां नै कुण खरीदै? जियां कपड़ां रो ई अेक नाम 'पूर-पल्ला' है तो काईं कपड़ां रै बोपारी नै 'पूर-पल्लां रो बोपारी' कैवां। मायरै सारू कपड़ा ल्यावण जावतै कोई परिवार नै कैय 'र देखो कै 'पूर-पल्ला' खरीदण जावो के? देखो के प्रतिक्रिया हुवै? घास-फूस नै आम बोलचाल में 'कचरो' भी कैईजै, पण कर्दैई 'कचरै री टाल' नाम लिखेड़ो देख्यो?

राजस्थानी इतरी समृद्ध भासा है कै इणमें अेक-अेक चीज सारू उणरी अवस्था अर उपयोग रै हिसाब सूं कई सारा सबद उपलब्ध है, बाँने बाँरै सही संदर्भ में ई प्रयुक्त करणा चाईजै। अेक उदाहरण देखो- सबद है 'मोचडी'। जूतो, जूती, खल्लो, खूंसडो, खेटर इण रा ई नाम है, पण सगळा अेकदम सारिखा कोनी। ('जूतां री दुकान', मोचडी हाऊस या जूतियां आद नाम तो मिल जासी, पण कठैई खल्लां री दुकान या खूंसडां रा बोपारी देख्या के? बिस्यो ई मामलो ढांढां रा बोपारी में है।) बडा मिनखां सारू मोचडी या मोजडी अर

सामान्य लोगां सारू जूतो-जूती कहीजै। जे बींद-बींनणी पैरै तो ‘बीनोटा’ नाम सूं पुकारीजै। थोड़े पुराणे पड़न्यावै तो वो खल्लो, खूंसड़े कहीजण लागै। आं मांय भी फरक है। टांका खुल 'र खोलो हुन्यावै या फीडो हुन्यावै तो वो खल्लो है अर ऊपर सूं चिकणाई खुस ज्यावै, पाणी आद सूं भीज 'र करडो पड़ जावै तो खूंसड़े बाजै। बार-बार टांका लगा-लगा अर तळे पर तळे चढावतां जकी जूतियां मोकळी भारी हुन्यावै अर साव फाटण रै कगार माथै आज्यावै, जद वानै ‘खेटर’ या ‘खेटरखल’ कहीजै। कोई नै कूटणो हुवै तो बीनोटा मारो या मोचडी मारो नीं बोलीजै। जूता मारो, खूंस मारो, खल्ला मारो या पछै खेटर मारो कहीजै। खेटर री मार सबसूं कसूती हुवै। ‘जूतां सूं कुटीजणो अर जूत्यां सूं कुटीजणो’ में भी मोकळो आंतरो है। इण वास्तै आपणी नई पीढी नै बरत्यूं री भासा रै नाम माथै ढांढा खरीदां, डोका बेचां, टुकड़ा खावो, पूर पैरो जिस्या प्रयोगां री हठधरमिता छोडणी चाईजै।

दूजोड़े वाक्य भी इणी मनोबिरती रो परिणाम है। ‘अस्पताळ में बापू रै मूत री जांच कराई, पीछियो आयो’। सामान्य रूप सूं इणरो अरथ समझ में आवै पण ‘मूत’ री ठौड़ ‘पेशाब’ सबद काम में लेवणो चाईजतो। राजस्थानी में मिनख रो पेशाब, गाय रो छिंगास, गधै, कुत्तै अर भैंस रो मूत, ऊट-सांद रो चीढ / चीड़ कहीजै। जद कोई आपरी मूळ बिरती सूं नीचै गिरै, जो सामलो रीस बळतो गाळ काढ 'र कैवै कै ओ ‘फलाणिये रो मूत’ है। इयां ई हिंदी-संस्कृत सूं अनुवाद करती वेळा ‘गोमूत्र’ नै ‘गाय रो मूत’ लिखणो भी बडी भूल है, उण सारू आम बोलचाल में ‘गोमूत्र’ रो अपध्रंश सबद ‘गूंत’ प्रचलन में आयग्यो। ‘गूंत’ लिखो या ‘गोमूत्र’ भी लिखो तो कोई बुराई कोनी, पण ‘गाय रो मूत’ लिखणो तो कर्त्तई आपत्तिजनक है। तीजो वाक्य भी कमोबेस इणी प्रवृत्ति रो शिकार है। पोसाळ में पढणियां नै लड़का-लड़की, छात्र-छात्रा कैवणो राजस्थानी कोनी अर ‘छोरा-छोरी’ कैवणो राजस्थानी है, आ जिद किण काम री ? पछै तो आप छोरा-छोरी ई क्यूं कैवो ‘टींगर-टींगरी’ लिखो, आप वाळी दीठ सूं तो और ज्यादा राजस्थानी लागस्यो। कूँकूँ पत्री छापो उणमें भी वर-कन्या री ठौड़ ‘टिंगर-टींगरी’ लिखो। असल में होक सबद नै हिंदी सूं न्यारै-निरवाळे रूप में लिखण री हठधरमिता भासा रो रूप बिगाड़ण अर उणनै कमजोर करण रो काम करै। शिक्षक नै ‘सिक्सक’, विमर्श नै ‘विमरस’, आदर्श नै ‘आदरस’, मोक्ष नै ‘मोक्ष’, निरीक्षण नै ‘निरीक्षण’, प्रमुख नै ‘परमुख’ लिखण सूं राजस्थानी रो कितरोक भलो हुसी, आ सोचण री बात है। बोलण में तो उच्चारण अवयव अर जलवायु री मजबूरी समझ में आवै पण लिखण में तो कोई मजबूरी कोनी। पछै अशुद्ध क्यूं लिखां ? शुद्ध लिखां तो बरत्यूं री भासा कोनी अर अशुद्ध लिखां तो अटपटो लागै, इण कारण झोत-सा आम व्यवहार में आवण वाळा सबदां नै बरताणां ई छोड दिया। आज रा राजस्थानी लेखक सौ मांय सूं अस्सी बार ‘विद्यालय अर विद्यार्थी’ री बजाय ‘इस्कूल अर

‘इस्टूडेण्ट’ लिखै। इणनै काई मानां? काई राजस्थानी सारू ‘विद्यालय अर विद्यार्थी’ सबद त्याज्य है। पछै ‘स्कूल’ नै ‘इस्कूल’ अर ‘स्टूडेण्ट’ नै ‘इस्टूडेण्ट’ लिखण रो काई औचित्य? इयां ई टूणामैण्ट, इस्पेसल, आपरेसण आद आगत सबदां री कहाणी है। असल में औ ‘प्रयत्न लाघव’ या ‘मुख-सुख’ रै कारण आयोड़े उच्चारण-दोष है। दोषयुक्त रूप नै खुद री भासा री पिछाण बतावणो, कितोक सही है, खुद ई सोचो।

चौथो वाक्य है ‘म्हँ आज अजमेर गयोड़े हूं। दो दिन बठै ई रैस्यूं।’ इणमें ‘गयोड़े हूं’ अर ‘बठै’ दोनूं प्रयोग भासाविज्ञान री दीठ सूं अशुद्ध है। घणकरो सो नागौर जिलो इण दोष रो शिकार है। औं स्थानीयता रै प्रभाव सूं दुषित रूप है। सही रूप हुसी- ‘म्हँ आज अजमेर आयोड़े हूं, दो दिन अठै ई रैस्यूं।’ इयां ई ओक प्रयोग है—“म्हारो नाथूसर गयोड़े है” मतलब कै ‘म्हँ नाथूसर जाय’ र आयोड़े हूं” या “म्हँ नाथूसर री जात्रा कर चुक्यो”। आम बोलचाल में तो कोई बात कोनी, पण इण रूप में कविता अर आलेख में परोटणो अर उणनै जनभासा री संज्ञा देवण री जिद भळै। इयांकली ओक अशुद्धि आजकालै हिंदी में आम हुंवती जा रैयी है—“मैंने यह काम करना चाहिए” या “उन्होंने फलानी जगह जाना चाहिए”। अठै ‘मैंने’ री ठौड़ ‘मुझे’ अर ‘उन्होंने’ री ठौड़ ‘उन्हे’ होवणो चाईजै, पण आडैकट इयां ई बोलै अर इयां ई लिखै। स्यात आपनै औं हिंदी वालो प्रयोग अखरतो हुवैला, बियाईं आपणो प्रयोग भासा रा जाणीजाण लोगां रै कानां में बटीड़ ज्यूं लागै।

पांचवों वाक्य “म्हे भी अबार बीकानेर पधारेड़ा हां, दो च्यार दिन अठै ई बिराजस्या” है, जिणरो अरथ सीधो-सीधो समझ आवै, पण ‘पधारेड़ा’ अर ‘बिराजस्या’ रो प्रयोग कबाड़े करगयो। औं प्रयोग आपरी भासा नै रूपाळी अर संस्कारित बणावण री खपत में हुयोड़े है, जको अणजाणपणै री उपज है। आपणै अठै खुद नै छोटो अर सामलै नै मोटो समझण, बणावण, बतावण री शिष्टाचारी परम्परा है। ओक ई भाव सारू खुद रै वास्तै दूसरो सबद अर दूजां वास्तै दूजो सबद उपलब्ध है। छोटां सारू, समान ऊपर वाल्यां सारू अर बडां सारू न्यारा-न्यारा संबोधन अर सबद काम में लिया जावै। खुद सारू ‘आयोड़ा, आयोड़ा’ अर ‘रैस्यां, रैस्यूं’ कहीजै तो सामलै वास्तै ‘पधारेड़ा, पधारेड़ा’ अर ‘बिराजस्यो’ सबद काम में लेवणां चाईजै। इयां ई सामला फरमावै, आपां अरज करां; सामला आरोगै, आपां खावां; सामला पोढै, आपां सोवां; सामला बिराजै, आपां बसां, सामलां री मोचडी, आपणी जूती; सामलां रो बंगलो, आपणी झूंपडी; सामलां री पोशाक, आपणां कपड़ा इत्याद प्रयोग आपणी भासा री सांवठी धरोहर रा ऊजला आभरण है। जिण भांत स्थानीय परिवेश रै हिसाब सूं सभ्यता अर संस्कृति रो विकास हुवै, उणी भांत स्थानीय परिवेश अर जरूरत रै हिसाब सूं सबद में नयो अरथ विकास लेवै। उण अरथ विकास री जात्रा नै सावळसर जाण्यां बिना उणरो प्रयोग खतरै सूं खाली नीं हुया करै।

सबदां साथै इयांकली छेड़खानियां करण में आपां उस्ताद हां। ब्होत सा इसा सबद है, जकां रो का तो आपां वर्तनीगत रूप बिगाड़ दियो अर का गळत अरथ में बांरो प्रयोग

करणो तेवड़ लियो। मतलब नै 'मतबल', पकड़ो नै 'कपड़ो', छानो नै 'अछानो', आदमी नै आमदी, फालतू नै 'बेफालतू' कैवणो अर लिखणो राजस्थानीकरण मानीजण ढूको। असल में व्याकरण री दीठ सूं औ वर्ण-विपर्यय दोष है, जको अल्पज्ञता, अज्ञानता, अशिक्षा, श्रवण री कमी, उच्चारण अवयवां रै दोष आद सूं आवै, पण इण दोष नै साहित्यिक रचनावां में बरतण रो चाळो देख 'र सबदां री आतमा कांपती निंगै आवै। सबदां रै रुढ़, यौगिक अर योगरुढ़ रूप री बात हर व्याकरण में देखी जा सकै। इणनै नकारण रो कोई कारण नीं है पण 'मोर रै तो बोलणो सारै है, बरसै तो इंद्र जणा हुवै।' आपणे तो कैवणो सारै है, सामलो मानै का नीं मानै, इण पर आपणो कोई जोर नीं चालै। हलाकै इण बीमारी सूं हिंदी भी अछूती कोनी, पण राजस्थानी में तो मोटो चाळो देखण नै मिलै। जाण-बूझ 'र हिंदी सबदां नै बिगाड़ 'र राजस्थानी बणावण रो प्रयास भासा साथै मोटै धोखै सूं कम कोनी। भक्तिमती मीरां रै पदां रो संपादन करतां मोटा विद्वानां आपरी अक्कल लगाई अर सगळी जाग्यां 'न' नै 'ण' में बदल दियो, अबै देखो खटको। बै लिखै—'बसो मोरे ऐणण में णंदलाल'। कोई वानै पूछै कै कुणसी राजस्थानी में 'ऐणण' अर 'णंदलाल' सबद है। 'बसो मोरे नैनन में नंदलाल' जैड़ी फूठरी ओळी नै 'ऐणण में णंदलाल' कर 'र राजस्थानी री बेकूंटी काढण रो काम कर न्हाख्यो। पूरी मीरां पदावली में इयांकलो कबाड़ो देख 'र मीरां अर राजस्थानी दोनूं रोवै, पण बांग आंसुआं नै पूँछण वाळो कुण ? 'न', 'ण', 'ल' अर 'ळ' आं चार वरणां री बदला-बदली आज री राजस्थानी नै इतरी अव्यावहारिक बणावै कै पूछो मत। इण दिस में सावचेती सूं ध्यान देवणो जरूरी है।

अेक बात आ भी है कै जद आपां राजस्थानी री लिपि रै रूप में 'देवनागरी' नै स्वीकार करी है तो पछै उणरै नेम-काण-कायदां नै भी अपणावणा ई पड़सी। देवनागरी अेक वैज्ञानिक लिपि है, जिणमें अेक वरण सारू एक ध्वनि है तो अेक ध्वनि सारू अेक वरण। जियां बोलीजै, बियां ई लिखीजै। इण वास्तै किणी अेक सबद री वर्तनी अेक ई हुसी, न्यारी-न्यारी नीं हो सकै। जे उच्चारण में कोई बाधा है तो स्वीकार है, पण वर्तनी तो शुद्ध राखणी ई पड़सी। बोलण में बोकानेर, जोधपुर रा घणकरा लोग 'राम-राम' नै 'रोम-रोम' बोलै, पण लिखणो तो 'राम-राम' ई पड़सी। संथि, समास, उपसर्ग, प्रत्यय अर कारक रा काण-कायदां नै तो मानणो ई पड़सी। अठै अेक और बात कानी ध्यान देवण री दरकार है कै लेखक तो स्वयंभू है, बो लिख 'र निरवाळो हुयो, सही-गळत अर शुद्ध-अशुद्ध री बात पाठक जाणै, पण शिक्षक नै तो सबद री संरचना, विकार, शुद्ध अर अशुद्ध रो कारण समेत खुलासो करणो ई पड़ै। बो अेक ई सबद रा दो या चार रूपां नै सही कियां बता सकै? उणनै तो अेक अर शुद्ध रूप बतावणो पड़ै। आज री साहित्यिक पत्रकारिता नै इण दीठ सूं कमर कसणी पड़सी। अब समै आयग्यो, जद आपां नै भासा रै मानक रूप कानी बधणो पड़सी। अस्तु!





शंकरसिंह राजपुरोहित

उल्थै रै बूतै रातो-मातो हुंवतो राजस्थानी गद्य-साहित्य

अंतर्राष्ट्रीय बजारवाद री उमड़ती आंधी अर वैश्वीकरण रो तेज तूफान जगत री तमाम मातृभासावां नै आपरी चपेट मांय लेय लीनी है। दस-बारै बरस पैली यू. अन.ओ. री अेक रिपोर्ट मांय संसार री सगळी मातृभासावां सारू छायोड़े इण संकट माथै गैरी चिंता प्रगट करीजी ही। भारतीय भासावां भी इण बवंडर सूं बारै नीं है। संसार री सगळी मातृभासावां अर उणरै साहित्य रै आपै माथै मंडगोड़े संकट रा आं बादलां नै छांटण सारू 'उल्थै री विधा' ईज कीं सींव तांई कारगर सिद्ध व्है सकै। किणी पण भासा रा प्राण उणरै साहित्य मांय ई सांचरिया करै अर उल्थै रै मार्फत आपरै थोड़े-थोड़े प्राणां री थरपणा अेक भासा दूजी भासा रै मांय कर सकै। इण भांत री आफळ सूं दोनूं ई भासावां रै समूळ नष्ट हुवण रो खतरो नीं रैवैला। केरई लोककथावां मांय ई आपां देखां कै वां कथावां रै नायक-नायिका रा प्राण सात समंदर पार पींजरै मांय बंद किणी तोतै कै मैना रै मांय बसै, जठे तांई पूग 'र बांरी गाबड मरोड़णी खलनायक रै वस री बात नीं रैवै। सागी आ री आ बात आपां उल्थै पेटै ई कैय सकां कै किणी अेक भासा सूं दूजी भासा मांय हुयोड़े उल्थै में भी उण मूळ भासा रा केरईक सबद अर उण भासा री रंगत अर वठै री संस्कृति सुरक्षित रैय सकै। उल्थै रै मार्फत भासावां रै इण आपसी आदान-प्रदान सूं मातृभासावां रै समूळ नष्ट हुवण रो खतरो कीं हद तांई टाळ्यो जाय सकै।

उल्थै री महत्ता सारू अठै औ कैवणो भी गळत कोनी कै

जे गुरुदेव रवीन्द्रनाथ टैगोर री 'गीतांजली' रै गीतां रै अंग्रेजी उल्थै

ठिकाणो :

राजपुरोहित-ैवास
कृपाल भैरू मिंदर चौक

सर्वोदय बस्ती

बीकानेर-334004

मो. 7610825386

रो संस्करण आथूणै समालोचकां रै साम्हीं नीं आवतो, तो बांने ‘नोबल पुरस्कार’ इत्तो सोरो नीं मिलतो। साहित्य अकादेमी, नई दिल्ली सूं ई प्रकाशित ‘रवीन्द्रनाथ रो बाल-साहित्य’ (भाग पैलो अर दूजो) री भूमिका ‘कवि-कथा’ में लीला मजूमदार लिखै, “कवि रवीन्द्रनाथ कुल इग्यारै बार विदेस-जात्रावां करी। सन् 1912 री जात्रा मांय घणाई ख्यातनांव अंग्रेज लेखकां, कलाकारां अर विचारकां सूं बांरो तगड़ो भायलापो हुयग्यो। चावा कवि येट्स अर कलाकार रोथेन्स्तायन बांरा सबसूं बत्ता श्रद्धावान प्रशंसक बणग्या। बांरै प्रोत्साहन सूं कवि आपरै कीं गीतां अर कवितावां रो अंग्रेजी उल्थो छपायो। औ रचनावां ‘गीतांजलि’ नांव सूं छपी। (इणी नांव सूं अेक बांग्ला गीत-संग्रै पैलां ई छप चुक्यो हो।) अंग्रेजी ‘गीतांजलि’ रो विदेसी पाठकां ऊपरां गैरो असर पड़यो। इण माथै कवि नै ‘नोबेल पुरस्कार’ मिल्यो, जिको संसार रो सै सूं सिरै अर दुरुलभ पुरस्कार है।”

खैर, साहित्य अकादेमी, नई दिल्ली गुरुदेव रवीन्द्रनाथ टैगोर री 150वीं जयंती रै टाणै बांरी महताऊ कृतियां रो न्यारी-न्यारी भासावां मांय उल्थो करावण री बडी कार्ययोजना बणायी, जिणरै त्हैत राजस्थानी में ई बांरी केइक गद्य-साहित्य री पोथ्यां रा राजस्थानी उल्था छप्या। इण सूं ई पैलां लक्ष्मीकुमारी चूंडावत रो रवीन्द्रनाथ टैगोर री कहाणियां रो करियोड़ो उल्थो ‘रवि ठाकरां री बातां’ नांव सूं साम्हीं आय चुक्यो हो। फेर तो मनोहर सिंह राठौड़ री अनूदित ‘रवीन्द्रनाथ टैगोर री कहाणियां’, रामस्वरूप किसान रै अनूदित करियोड़ो नाटक ‘राती कनेर’, पूर्ण शर्मा ‘पूरण’ कानी सूं अनूदित उपन्यास ‘गोरा’, बुलाकी शर्मी रै अनूदित ‘रवीन्द्रनाथ रो बाल साहित्य’ (दो भाग) अर सागै ई बांरी चावी कृति ‘गीतांजली’ रै गीतां रो सरस राजस्थानी उल्थो कवि-कथाकार मालचंद तिवाडी रै मारफत साम्हीं आयो अर राजस्थानी उल्थे रै रूप में औ सगढी पोथ्यां ई साहित्य अकादेमी सूं बगतसर छपी भी।

रवीन्द्रनाथ टैगोर री भांत ई राजस्थानी रा बाजींदा कथाकार विजयदान देथा (बिज्जी) रै बारै में ई आ बात कैयी जाय सकै। जियां ई बिज्जी री राजस्थानी लोककथावां रै लूठै संग्रै ‘बातां री फुलवाडी’ री कीं टाळवीं कहाणियां रो पैली हिन्दी अर पछै दूजी प्रांतीय भासावां रै सागै अंग्रेजी में उल्थो छपियो तो बिज्जी री भारत में ई नीं, अंतरराष्ट्रीय कथाकार रै रूप में अेक लूंठी ओळखाण बणगी। इण बात रो जस साहित्य री ‘उल्था विधा’ नै ईज है कै टैगोर जियां ई पंदरै बरस पैलां बिज्जी ई नोबेल पुरस्कार सारू भारतीय साहित्यकार रै रूप में नामित करीज्या। इणरै टाळ उल्थे रै कारण ई बांरी कहाणियां माथै कीं हिंदी फिलमां ई बणी, जिणां में ‘परिणिति’, ‘दुविधा’, ‘पहेली’ अर ‘कांचली’ खास है। ‘बातां री फुलवाडी’ रै सगवा भागां रो अबै राजस्थानी सूं हिंदी उल्थो ‘बातों की

बगिया' नांव सूं छप चुक्यो है। औ उल्थो बिज्जी रा सपूत कैलास कबीर अर शिष्य मालचन्द तिवाड़ी करियो।

बिज्जी री भांत ई डॉ. नृसिंह राजपुरोहित राजस्थानी रा ख्यातनांव कथाकार हा। राजपुरोहित भारतीय कथा-साहित्य री कीं टाळवीं कहणियां रै सागै टालस्टाय री कहणियां रो ई राजस्थानी में उल्थो करियो जको जोधपुर रै राजस्थानी शोध संस्थान, चौपासनी सूं छ्यपण वाळी 'परंपरा' पत्रिका में 'कथा भारती' अर 'टालस्टाय री टाळवीं कथावां' सिरैनांव सूं विशेषांक रै रूप में छ्यपिया। नृसिंहजी नै गुजराती भासा सूं गैरो लगाव हो, क्यूंके वांरो गांव खांडप गुजरात रै सीमावर्ती बाड़मेर जिलै में आवै। गुजराती लोक साहित्य रा मनीषी झावेरचंद मेघाणी राजपुरोहित जी रा आदर्श रैया तो पन्नालाल पटेल अर भोवाभाई पटेल बांग समकालीन कथाकार हा अर बै बांगे लेखन रा मुरीद हा। डॉ. नृसिंह राजपुरोहित गुजराती रै काळजयी उपन्यास 'मानवी नी भवाई' अर 'धूड़ में पगल्या' रो साहित्य अकादेमी सारू उल्थो करियो, जिण सारू बाँनै अकादेमी रो 'अनुवाद पुरस्कार' ई मिल्यो।

साहित्य अकादेमी, नई दिल्ली सूं अनुवाद पुरस्कार बरस 1989 में सरू हुयो हो, पण पैलै साल राजस्थानी उल्थै पेटै कोई पोथी नीं आदरीजी। 1990 में पैलो पुरस्कार भास रै संस्कृत नाटक 'स्वप्नवासवदत्त' रै राजस्थानी उल्थै 'सुपनो' सारू देवदत्त नाग नै दिरीज्यो। बियां तो साहित्य अकादेमी रो अनुवाद पुरस्कार अबार ताईं पैतीस रै नैड़े राजस्थानी उल्थाकारां नै मिल चुक्यो है, जिणां री सूची अकादेमी री वेबसाइट माथै उपलब्ध है। इण सारू अठै बां उल्थाकारां अर उणां रै राजस्थानी में उल्थो करियोड़ी पोथ्यां रा नांव गिणावण सूं कोई सार नीं निकलै। हां, अठै आ बात जरूर राखूळा कै उल्थै रै इण खेत में तीजी पांती बीकानेर रा उल्थाकारां री रैयी है। मतलब कै सै सूं बेसी पुरस्कृत राजस्थानी उल्थाकार बीकानेर रा ईज है। चूंकि गुजरात प्रांत आपणै राजस्थान रै सींव लागतो प्रदेस है अर गुजराती-राजस्थानी भासा में समप्राणता ई रैयी है। इणी वास्तै नृसिंह राजपुरोहित रै सागै बीकानेर रा उल्थाकार रामनरेश सोनी हुवो कै जेठमल ह. मारू, कन्हैयालाल भाटी हुवो कै पछै डॉ. मदन सैनी, घणकरा उल्था गुजराती पोथ्यां रा हुया है अर इणां रो राजस्थानी उल्थो करती बगत मूळ कृति रै हिंदी उल्थै रै संस्करण रो सहारो लिरीज्यो।

भारतीय साहित्य री अबार लग इक्कीस नैड़ी पोथ्यां रो उल्थो कर चुक्या राजस्थानी रा ऊरमावान उल्थाकार दुलाराम सहारण रो इण बाबत सुथरो सोच है कै, "राजस्थानी में किणी रचना रो उल्थो करणो सगळी भारतीय भासावां में उल्थो करण सूं अबखो काम है। औ इण वास्तै कै राजस्थान रो पाठक हिंदी में बित्तो ई ढूब्योड़े है जित्तो

राजस्थानी में। अबार तो औं भी कैयो जाय सकै कै राजस्थानी सूं बेसी हिंदी में डूबोड़े है। राजस्थानी में उल्थाकार अमूमन हिंदी सूं राजस्थानी में उल्थो करण वाला है। औंड़ी स्थिति में उल्थाकार रै साम्हीं संकट औं रैवै कै बै आपरै मूळ स्रोत हिंदी सूं दूजी भासाई संरचणा करता थकां पाठ रो रसास्वाद करै। औंड़ी गत मांय आपरी भासा रै उण मूळ स्रोत मतल्ब ठेठ राजस्थानी सरूप ताँई पूगणो पड़े, जको आ बतावण में सिमरथ होवै कै हिंदी अर राजस्थानी मांय रात-दिन रो फरक है। उल्थाकार नै उण राजस्थानी परिवेश री संरचणा करता थकां अनुवाद करणो पड़े जको परिवेश राजस्थानी पाठक नै आपरो निजू लखावै। राजस्थानी में करियोड़े उल्थो जे आं दोनूं स्थितियां मांय खरो है तो इज बो उटीपो उल्थो मानीजै, नींतर तो हिंदी रा ‘का के की’ री ठौड़ राजस्थानी रा ‘रा रै री’ करियां ई नाको निकळ सकै, पण औंड़ो उल्थो किणी भी सूरत में मुकम्मल उल्थो नीं मानीजै।”

दुलाराम सहारण रै साहित्य अकादेमी सारू अनूदित करियोड़ी कृतियां में रवीन्द्रनाथ ठाकुर रा ‘च्चार पाठ’, नारायण देसाई री गुजराती में लिख्योड़ी जीवनी ‘अगनकुंड में खिल्योड़े गुलाब’ अर तकषी शिवशंकर पिल्लै री ‘जेवड़ी’ उल्लेखजोग है। इणरै टाळ आप महात्मा गांधी री मोकळी महताऊ पोथ्यां रै सागै मुंशी प्रेमचंद री कहाणियां, डॉ. भीमराव अम्बेडकर रचित ‘जात-पांत रौ खातमौ’, जोतीराव गोविंदराव फुले री ‘गुलामगिरी’, शरणकुमार लिंबाले री ‘अक्रमाशी’, जवाहरलाल नेहरू री ‘कीं कागद बेटी रै नांव’, काशीनाथ सिंह री ‘कासी रौ अस्सी’, कुसुम खेमानी री ‘साच कैवती कहाणियां’ अर अमृतलाल वेगड़ री ‘रूपाळी नर्मदा’ आद रो राजस्थानी उल्थो जसजोग काम तो है ईज, आं पोथ्यां रै प्रकासण रो काम ईं बै आपरै बूतै करियो है, जदकै राजस्थानी में अनूदित घणकरी पोथ्यां साहित्य अकादेमी री ‘अनुवाद योजना’ रै त्वैत ई छोपी है। हालांकै सहारण रै अनूदित करियोड़ी घणकरी पोथ्यां भी हिंदी रै माध्यम सूं ई राजस्थानी में आई है, पण भासा री पसम अर रंगत री दीठ सूं देखां तो लागै कै बै इणां रो उल्थो अनुवाद पेटै आपरी सोच अर मनगत मुजब ई करियो है।

उल्थै पेटै आ ईज बात अमूमन कैयी जावै कै इणमें भाव मूळ लेखक रा अर भासा अनुवादक री हुयां ई कोई उल्थो सिरै अर सरावण जोग मानीजै। किणी रचना रै उल्थै पेटै राजस्थानी समालोचक चेतन स्वामी उल्थाकार नै चेतावता थकां पोथी ‘निरख-परख’ में कैवै, “‘अेक अनुवादक, सामान्य पाठक सूं कितरो ईं बेसी क्रिति नै अनुभूत कैरै अर अनुवाद खतम होवतां-होवतां उण क्रिति सारू उणरै हिवड़े में मूळ लिखारै जितरो ईं हेत होय जावै। मैमावान राजस्थानी उल्थाकार किशोर कल्पनाकांत कैया करता कै, म्हैं काळिदास रो अनुवाद करूं तो काळिदास रै जोड़ाजोड़, गुरुदेव रो करूं तो साख्यात

रवीन्द्रनाथ अर शरत रो अनुवाद करूं तो म्हारै मांय शरत रै अलावा दूजो कीं होय ई नीं सकै। मूळ लिखारो म्हारै मांय थापित होय जावतो, म्हारी तो फगत भासा-भासा होवती।इसड़ा उथळणहारां खातर अनुवाद दोरो नीं होवै। अबार राजस्थानी रा घणा लूंठा गद्यकार जहरखां मेहर री मारफत करियोड़ो ओके अफ्रीकी उपन्यास रो उथळो, थोड़ो-सो बांचण मांय आयो, पण उणरी कोर-कोर राजस्थानी ही। औड़ी हतोटी, खामचाई, कल्या जिणरै मांय बस जावै, जिका मूळ अर लक्ष्य दोवूं भासा मांय पारंगत है, आ विधा फगत बां लिखारां सारू ईज है। चेतै राखज्यो! अनुवाद दूजां रै खल्लै (जूत) मांय आपरो पग खसोलण री विधा नीं है। जिका माडाणी अर बिना ऊरमा अनुवाद जियांकलो झीणो काम कर रैया है बांनै थोड़े'क ठबक'र विचार करण री दरकार है कै जिकै नै 'रस्सी' खातर राजस्थानी मांय 'जेवड़ी' सबद नीं ऊकलै बो किणी उथळै री खेचल करै ई क्यूं? असल मांय अनुवाद अभ्यास मूलक चतराई रो काम है।"

आपां जद किणी रचना रो राजस्थानी उल्थो करां तो आपां नै कम सूं कम आपां री भासा में तो पारंगत होवणो ई चाईजै। बियां तो उल्थै सारू किणी उल्थाकार खातर औ जरूरी है कै बो मूळ कृति अर खुद रै उल्थै री भासा, दोनूं माथै समान अधिकार राखै। अबै अनुवाद रा डिजिटल माध्यमां रै आवण सूं दूजी भासावां रै किणी सबद रो सागी अरथ अर उणरो मूळ भाव भी समझ्यो जाय सकै, पण उल्थाकार री कम सूं कम आपरी भासा माथै तो पकड़ होवणी ई चाईजै। उल्थै रै इण काम सूं उणरी खुद री भासा औरूं टकसाळी होय सकै।

भारतीय भासावां रै केई नामी-गिरामी कवियां री काव्य कृतियां रो उल्थो करण रै सागै 'क्राइम एंड पनिशमेंट' जैडी दुनिया री काळजयी गद्य औपन्यासिक कृति रो राजस्थानी उल्थो करणिया ख्यातनांव साहित्यकार चन्द्रप्रकाश देवल आपरै अनुवाद-कर्म बाबत दुलाराम सहारण सूं बंतळ करतां बतायो कै, "राजस्थानी अनुवाद ओके अबखो काम है। पण अनुवाद रै मारफत बीजी भासा री रचना आवै, उणसूं खुद री भासा भी मजबूत बणै। बीजी भासावां में कांई लिखीजै, उण भासा रै कवियां रो अंदाजेबयां कांई है, औड़ा अलेखूं सवाल अनुवाद बांचनै सुळझै। म्हँ जिका अनुवाद करिया वै आप-आपरी भारतीय भासा रा नामी कवियां री रचनावां रा हा, पण असल में औ म्हारो अर म्हारी भासा रो इम्हाहां हो। अनुवाद रै मारफत खुद री भासा री सिमरधी अर कंगाली दोनुवां रो ठाह लागै। लोक अर कोश दोनूं खंगाळीजै तद उल्थाकार ई मांजीजै। वो भासागत मजबूत बणै। वठैरै बीजी भासा रै रचनाकारां नै पढां तद ठाह लागै कै कांई इयां भी सोचीज सकै। दोस्तोयेव्वस्की रै उपन्यास 'क्राइम एंड पनिशमेंट' रो म्हँ 'सजा' नांव सूं उल्थो करियो।

औं उपन्यास 750 पेज रो है। विश्व साहित्य पेटै बीस-तीस किताबां औड़ी है जिकी कलासिक मानीजै। उण गिणत भेठी इण पोथी नै म्हें बांची तद चमत्कृत हुयो कै उण सागी बगत में आपणी भासा में कांई लिखीजै हो ? आपां सामंती जुग में जीवै हा। आधुनिक री तो छोडो, आपां सोचै तकात ई नीं हा। जदकै दोनूं ठौड़ व्यवस्थावां अेक जैड़ी ही। अठै राजशाही तो वठै जार्ज व्यवस्था ही, अेक जैड़ी समस्यावां। म्हनै लग्यो कै तद पछै ओं फरक ? सोचण जोग हो। इण फरक रै कारणै म्हें जरूरी समझ्यो कै आपां री भासा में ई इण रचना नै लावणी चाईजै। अनुवाद पेटै औड़ी मोकळी बातां है।''

राजस्थानी में छपण वाळी पत्र-पत्रिकावां में ई भारतीय साहित्य री प्रतिनिधि रचनावां रा राजस्थानी उल्था छपता रैया है। इणमें किशोर कल्पानाकांत रै संपादन में छपण वाळै 'ओळमों' री महताऊ भूमिका रैयी। परंपरा रै 'कथा भारती' अर 'टालस्टाय री टाळवीं कथावां' रै विशेषांक रो जिक्र ऊपर आय चुक्यो है। इणरै टाळ ई परंपरा रै 'हेमाणी' अर दूजा विशेषांक (संपादक तेजसिंघ जोधा) में केई देसी-विदेसी कवितावां अर कहाणियां रो उल्थो छपियो। तेजसिंघ जोधा रै ईज संपादन में जोधपुर सूं 'माणक' पत्रिका री सरुआत हुई तो उणमें ई उल्थे रो काम करता रैया। इणमें पैली हरेक अंक में किणी अेक भासा रै कथाकार री कहाणी रो उल्थो छपतो। अबार माणक में कवितावां रै उल्थै माथै जोर है, जिणमें उल्थाकार रै रूप में मीठेस निरमोही अर डॉ. रमेश 'मयंक' रा नांव खास तौर सूं लिया जाय सकै। इणरै टाळ श्याम महर्षि रै संपादन में छपण वाळी 'राजस्थाली' में ई बगत-बगत पर राजस्थानी अनुवाद छपता रैया है। नोहर सूं छपण वाळी 'हथाई' पत्रिका रै अेक पूरै अंक में सआदत हसन मंटो री इक्कीस टाळवीं कथावां रो राजस्थानी उल्थो डॉ. भरत ओळा करियो। डॉ. ओळा किसानां रै मसीहा सर छोटूराम रै विचारात्मक बीसेक आलेखां रो ई राजस्थानी में उल्थो करियो जको डॉ. हाकम नागरा रै संपादन में निकलण वाळी इणीज पत्रिका में विशेषांक रै रूप में छप्या है। राजस्थानी भाषा-साहित्य एवं संस्कृति अकादमी, बीकानेर री मुख पत्रिका 'जागती जोत' में बगत-बगत पर राजस्थानी उल्था छपता रैया है। अबार भी आ कोसिस रैयी है कै इण पत्रिका रै हरेक अंक में भारतीय कै विदेसी भासा री किणी अेक टाळवीं रचना रो उल्थो छपै। अबार डॉ. नमामीशंकर आचार्य रै संपादन में छयै जागती जोत रै जुलाई, 24 रै अंक में भारत रा यशस्वी प्रधानमंत्री नरेन्द्र मोदी री अेक कहाणी रो राजस्थानी उल्थो छप रैयौ है। आपां मांय सूं भोत कम लोगां नै आ जाणकारी हुवैला कै राजनेता रै सागै-सागै नरेन्द्र मोदी भी पैलड़ प्रधानमंत्री अटल बिहारी वाजपेयी दाँई कवि-हृदय रैया है। बांग गुजराती में अेक कविता संग्रे अर कहाणी-संग्रे छप्योड़े है। इणी संग्रे मांय सूं बांरी 'सेतु' नांव री कहाणी रो उल्थो

‘बावजी चतुरसिंह राजस्थानी अनुवाद पुरस्कार’ सूं आदरीज्या बाड़मेर रा बंशीधर तातेड़ करियो है।

उल्था विधा में आपरी पूरी ऊर्मा सूं काम करणिया राजस्थानी उल्थाकारां रा जका नांव म्हरै साम्हीं आवै, उणां में अबार री घडी सरबश्री अर्जुनसिंह शेखावत, सोहनदान चारण, विनोद सोमानी ‘हंस’, कैलास कबीर, आईदान सिंह भाटी, रामस्वरूप किसान, कुंदन माली, भरत ओवा, उपेन्द्र ‘अणु’ कमल रंगा, डॉ. नीरज दइया, शंकरसिंह राजपुरोहित, कैलास मंडेला, रवि पुरोहित, मनोज कुमार स्वामी, कुमार अजय, डॉ. घनश्याम नाथ कच्छावा, वीरेन्द्र लखावत, संजय पुरोहित, डॉ. हरिमोहन सारस्वत ‘रुंख’ डॉ. मदन गोपाल लाढा, राजूराम बिजारणिया, डॉ. नमामीशंकर आचार्य अर डॉ. गौरीशंकर प्रजापत आद रा नांव उल्लेख जोग है। राजस्थानी गद्य साहित्य में उल्थै री इण विधा नै लेय ‘र लेखिकावां रो कोई खास उछाव निजर नीं आवै, जको चिंता रो विसै है। राणीजी रै पछै डॉ. शारदा कृष्ण कवि काळिदास रै ‘शाकुंतलम्’ अर कीं दूजी कृतियां रो उल्थो करियो। अबार री बगत डॉ. कृष्णा जाखड़ रै देवेश राय रै बांगला उपन्यास ‘गाथा तिस्ता पार री’ अर गंगाधर गाडगीळ री मराठी आतमकथा रो ‘अेक कीड़ी रौ महाभारत’ सिरैनामै सूं करियोड़े राजस्थानी उल्थो इण दिसा में नूंवी आस जगावै, क्यूंकै औं दोनुं भारतीय साहित्य री लूंठी अर महताऊ कृतियां है। मोनिका गौड़, विमला नागला, पूर्णिमा मित्रा, सीमा भाटी, ऋषु शर्मा आद कीं औड़ा नांव है, जिणां इण कानी अवस कीं ध्यान दियो है अर इणां री उल्थै री इक्की-दुक्की कृतियां भी साहित्य अकादेमी कै पछै किणी दूजै स्रोत सूं साम्हीं आई है। राजस्थानी गद्य-साहित्य नै उल्थै रै मार्फत रातो-मातो करण सारू लेखिकावां नै भी बरोबर भागीदारी निभावणी चाईजै।

◆◆





माणक तुलसीराम गौड़

बकाई

केर्इ लोग रुक-रुक 'र बोलै। केर्इ तोता बोलै तो केर्इ बकायां खावै अर हकलावै। बापड़ा दौरा-सौरा बोलणो चावै। आपरै मन री बात कैवणी चावै, पण पूरी बात सावळ ढंगसर कैय नीं पावै। जिका मिनख उणां सूं हिंवळाई-निमवाई अर अपणायत राखै, बै तो उणां री बात सुण लेवै। उणां री मनस्या-ई जाण लेवै कै औं टाबर अर भलो मिनख काई कैवणी चावै, पण जिका कुबधी मिनख होवै बै उण बेचारां रा मजा लेवै। उणनै चिड़ावै। उणरी कूटियां कढावै। जद'क उणां नै ठा होवणो चाईजै कै हकलावणे अर बकायां खावणै माय उण बेचारां रो कीं-ई हाथ नीं होवै है। बै का तो जनमजात-ई हकलावणिया होवै का पछै बोली सीखती बगत उणां माथै सावळ ध्यान नीं देवै, तो उणां री रुक-रुक 'र बोलणै री आदत पड़ जावै। पछै आ ईज आदत उण रो जीवणभर साथ नीं छोडै अर उण टाबर रो बो अेब मानीजणै लागज्यावै।

म्हारै अेक भाई है जिको पांच-छह बरसां रो होयो जठै तलक तुलावतो। उणनै म्हें कैवता—“बोल, काकोसा।”

बो कैवतो—“तातोसा।”

“बोल भाई, चाचाजी।”

बो कैवतो—“ताताजी।”

“बोल बेटा, टाटा।”

बो कैवतो—“ताता।”

“कैय दै भाई, पापाजी।”

तो ई बो कैवतो—“ताताजी।”

ठिकाणो :

121, दूसरी मंजिल
फेज 1, मेन रोड
ग्रीनविष्टा ले आउट
चिक्कबेलंदुर विलेज
करमेलाराम पोस्ट
बेंगलुरु (कर्नाटका)

पिन-560035

मो. 8742916957

मतलब उणरी भासा री वरणलाठा मांय फगत त थ द ध न ईज हा, बीजा कीं नीं।

ऐक दिन बो पोसाळ सूं भागतो-भागतो आयो अर सांस भरीज्योड़ो उतावळो-सो कैयो। उणरो मतलब औ हो—“भाईसा-भाईसा म्हारी पोसाळ मांय ऐक छोरो आयो जिको तोतो बोलै हो। म्हनै घणो मजो आयो।”

म्हैं कैयो—“काईं थारै सूं-ई बेसी” बो तो कीं ई समझ्यो कोनी, पण म्हैं घर रा सगळा-ई जणां हंस-हंस’र लोट-पोट होयग्या। हंस-हंस’र म्हारै पेट मांय बळ पड़ण लाग्या।

म्हारै ऐक बाबोसा हा। बै हकलावता हा। बै केर्ई आखर बोल नीं पावता अर खास कर’र ‘स’। म्हारी दादी कैवती ही कै बाबोसा आपरै ब्यांव पछै पांवणचारी करणै गिया। बठै साळ्यां बारणो रोक लियो। बार छुडाई वास्तै कीं दूहो का पछै ओखिणो बोलणो पड़तो। बाबोसा नै बार छुडावणै वास्तै ओखिणो कैवणो हो, जिको बै गांव सूं सीख’र गिया हा :

आळै मांय पड़ियो झेरणो, छोडो साळ्यां बेरणो।

अठै बाबोसा री पंचायत होयगी। बाबोसा री जीभ आंटो खायगी। उणां रै तो परीक्षा री घडी आयगी ही। बाबोसा बोल पड़ा :

आळै मांय पड़ियो झऱ्झऱ्झ झेरणो,
छछ छोडो छछछ छाळ्यां बेरणो।

उणां नै मरियां ई साळ्यां नांव आयो कोनी अर आपरो पिंड छुडावण वास्तै कैय बैठ्या छाळ्यां। साळ्यां तो औ कोतक सुण’र भाजगी अर केर्ई बेराजी होयगी ही। बानै सावळ समझाया अर बतायो कै कंवरसाहब थोड़ा तुतळावै। जणा जाय’र बै मानी। तुतळावै काईं है, अठै तो पूरी बारह ई बज्योड़ी ही। खैर जावण दो। किणरो ई इतरो लारो नीं पकड़णो।

म्हारै कडुंबै रै मांय दादोसा हा। जिका हकलावता अर कम सुणता हा। बोला हा। घरवाळा कैवता कै थोड़े ऊंचो सुणै। अेकर दीवाळी रै तिंवार माथै म्हे सगळा टाबर भेळा होय’र फटाका छोडै हा। जिण मांय लड़ा, छोटा अर मङ्गला बम ई भेळा हा। फटाका घणासारा छोड्या अर बठै घणो कचरो होयग्यो हो। दादोसा बैठै कनै ई बिराज्या हा। म्हारा सगळा फटाका खतम होयग्या हा, जणां दादोसा कैयो, “छोरां, इयांन कांकांकां काईं खेलो हो। थोथोथो थोड़ा फफक फटाका छोडो। दीवाळी रो तिंवार है। तिंवार मांय इयांन काईं सुन्याड़ कर राखी हो।”

जणा म्हैं दुकान जाय’र सूतळी बम लेय’र आया अर जोरदार भचीड़ बोलायो। जणा दादोसा कैयो, “छोरां, टिकड़ी छोडी काईं रै?”

म्हां सगळं री तो हंसतां-हंसतां हालत ई खराब होयगी। म्हानै लाग्यो कै मुरगो तो आपरी जान सूं गियो अर खावण वाळं नै मजो ई नीं आयो।

अेकर बस रै मांय अणूती ई भीड़ ही। बस री पूरी गळी सवारियां सूं भरियोड़ी ही। फाटक माथै ई लोगड़ा ऊभा हा अर कीं मिनख तो लटुमै हा बांदरवाळ रै जियांन। म्हैं तो धक्का खावतो-खावतो अर किणी नै धक्का देंवतो जाय 'र तीन वाळी सीट माथै चौथो घुसग्यो। रामूजी लारै रैयग्या हा। बै कासा हकलावता हा। कदै-कदैई तो बै अेक ई सबद माथै दोय-च्यार मिनट ताई ठै 'र जावता। उणां नै ई किणी रो जोरदार धक्को लाग्यो। बै थोड़ी गाळ्यां ई काढता हा। धक्को लागतां ई बै उणनै कैवण लाग्या ह... अर बस रै ठेठ लारली सीट माथै फंसता-सा बैठिया अर कैयो- “ह...रामी।”

औं सुण 'र कनै वाळी सवारी कैयो, “भाया, अेक तो थनै इण भीड़ मांयनै बैठण खातर आ जग्यां दी अर तूं कैय रैयो है—हरामी।”

म्हैं देख्यो कै अठै तो अब बाजो बिगडण वाळो है जणां म्हैं बीच मांय बोल्यो, “भाईसा, औं बकाई खावै है। बस री फाटक माथै जिको मिनख इणां नै धक्को दियो उणनै कैय रैया है, पण औं हकलावै इण खातर सबद बोलतां-बोलतां इतरी देर लागगी अर अब जाय 'र वो सबद पूरो होयो है। औं थानै कीं नीं कैय रैयो है। जणां जाय 'र कोई बात आई-गई होई।

पुराणै जमानै रै मांय अबार रै जियांन बस अर रेलां नीं ही। लोगबाग ऊंटां अर बळदां री गाडियां माथै जातरा करता। अेकर अेक सागड़ी बळदगाडी हांकै हो अर अेक हकलावणी सवारी उण गाडी मांय बैठी ही। सागड़ी रो ध्यान इत्रै-बित्रै हो अर इत्ते मांय हकलावणी सवारी नै मारग माथै अेक खाडो दीख्यो। खाडो दीखतां ई बो कैवण लाग्यो, “खा... खा... खा...” इतरै रै मांय गाडी रो पेड़ो तो जाय पङ्घ्यो खाडै रै मांय अर लागियो जोर रो झटको अर बो मिनख ई बोल्यो, “खा... खाडो।”

जणां सागड़ी कैयो, “भाईजी, पैलां कोनी कैयो।”

बो पढूतर दियो, “म्हैं... प... प... पैलां ई कैयो, पण थैं स... स... सुणियो कोनी।” जणां उणरै समझ मांय आई कै बीमारी कठै है।

गांव रा चौधरी हकलावता हा। अेकर अेक घोनां चरावतै छोरै री घोनां उणां री फाटक मांय बळ्डी। चौधरी छोरा माथै राता-पीळा होया अर कैवण लाग्या, “अरे, व... व... वेगी काड घोनां नै ब... ब... बारै।”

टाबर डरग्यो तो ई कैयो, “ब... ब... ब... बाबोसा काई है।”

उणरै मूँडै सूं ब... ब... सुण 'र उणां नै लाग्यो कै औं कालै रो जलम्योड़ो छोरो म्हारी कूंटियां कढावै। बै तो आव देख्यो न कोई ताव, घोनां नै भूल 'र लेय लकड़ी अर ठोकण खातर उण छोरा रै लारै भाज्या।


लोग पूछ्यो, “‘चौधस्थां कार्ह होयग्यो ? इण टाबरिया रै लारै आज इयां कैयां भाज रैया हो ?’”

चौधरी कैयो, “‘ओ काल रो टाबर म्हारी क... क... कूंटियां कढावै ।’”

समझदार नै इसारो घणो । जणां बै कैयो, “‘चौधस्थां, औ कूंटियां कोनी कढावै । औ ई आपै जियां थोड़ी बकाई खावै । हकलावै ।’” जणां जायर बापड़ा रो लारो छूट्यो ।

हकलावणिया टाबर अर मिनख हंसी रा पात्र नीं हुया करै । आ अबखाई तो किणी रै ई साथै होय सकै । बीत सकै । आ आपां रै सरीर री अेक तरै री कमी होवै, जिणनै दूर करणी चाईजै । आ अेक तरियां री आपां रै सरीर री अपंगता है । विकलांगता है । इणनै अेक बीमारी समझर मिटावणी चाईजै । जिण मिनख नै पूरो बोलणो नीं आवै । बो बोल नीं सकै । आपै मन री बात कैय नीं सकै । ऐडा मिनखां नै आपां री मदद री दरकार होवै । तन, मन अर धन सूं जितणी कर सकां उतणी करणी चाईजै । उणां री हालत माथै हंसर उणां रो मन नीं दुखावणो चाईजै । कार्ह ठा आ बीमारी आपां रै खुद रै का पछै आपां रै परिवार माय किणी मिनख रै ई लाग जावै अर पछै कोई आपां माथै हंससी तो आपां नै कैडो लागसी ? कैया करै है कै आतमा सो परमातमा ।

◆◆





छगन लाल व्यास

भुआजी! भुआजी!

यूं बा महीनै भर सूं भतीजे रै बेटी रै ब्यांव सारू त्यारी करती
कैवती, “ओ देवूला उण छोरी नै। ओ जंवाई रै। इक्कीस हजार रो
चेक। काईं ठीक है? बीनणी! ठीक लागैला, बेटा?”

“ठीक ई है। इण ऊपरां खुद सोच लेवो। थांरा पर्झसा अर
थांरो मन।” धणी-लुगाई दोन्हूं रो अेक ई उथलो।

देखतां-देखतां अचाणचक दरवाजै माथै लाग्योड़ी घंटी
बाजी कै भुआजी जाणगया—म्हारो भतीजो आयगयो है।

भतीजो! भाई रो छोरो। कितरी हूंस। कितरी आसावां।
जाणै मूळ सूं ई ब्याज प्यारो!

जद सूं उणरो फोन आयो कै म्हैं काल-परसूं आय रैयो हूं,
तद सूं ई भुआजी लगोलग आंख्यां बिछावै अर ज्यूं ई घंटी बाजी
तो खुद जाय’र जाळी खोली।

साम्हीं ई भतीजो! बो पगां रै हाथ लगाया तो भुआजी उणनै
छाती रै चेप दियो। बो दोय पगल्या भरतो, फूंफोजी कनै पूग’र
बाँरै ई पगां रै धोक देवतो प्रणाम कीनो तो उणां री आंख्यां ई खुशी
सूं भरीजगी।

यूं तो मां-बाप जीवै बठै ताईं पीहर हुवै, पछै भाई-भोजायां
में फरक पड़ जावै, आ घर-घर री रीत। भाई रै ‘नैनप’ पड़गी।
मां-बाप रै लगता ‘मौसर’ सूं ‘लेणो’ माथै हुयगयो, इणमें भुआजी
सूं ई उधारी लीनी अर देय’र जाणै दुस्मणी लीनी।

बगत-बगत री बातां हुवै। भतीजो धंधै-पाणी में हुंसियार
निकळ्यो अर देखतां-देखतां व्योपार में तरक्की कीनी तो दुनिया
देखती रैयगी। सगळां री उधारी ई चुकाई अर घरां ई रामजी राजी।

ठिकाणो :
गांव-खण्डप,
वाया-मोकळ्यर
जिला-बालोतरा
(राजस्थान)
मो. 9462083220

मिनख ! आजकाल सगाई-सगपण में मकान, गाड़ी अर पईसो देखै। 'घर-गुवाड़ी' देखण रा दिन जाणै बाबा आदम रै जमानै रा हुया ! रंग-रूप ई पैली ठौड़ ! आ ई बात ! इणी कारण भतीजै री अेक-अेक लाडली सारू अलेखूं पग आंगणो कीनो । यूं भीआजकाल छोरियां री हर समाज में कमी । इणी कारणै सिफारिशां ई ।

सगपण रै पैली उण पापा-मम्मी साथै भुआजी (घर में बडा हुयां) सूं ई सलाह पूछी, "उण ठौड़ बेटी देवूं तो आपनै कांई जचै ?"

"म्हें उणां नै जाणूं नीं । हां, उण रै बाप-दादा री पैठ ! छोरा बाबत तो कांई कैवूं, पण कैवै कै खानदान रो असर आयां ई रैवै । हां, कांई करै है बो ?"

"डॉक्टरी कीनी है ।"

"तो पछै कांई पूछणो ! पण 'डिग्री' री परख कर लीजै क्यूंकै आजकाल नूंवी पीढ़ी रो कोई भरोसो नीं । आंबो बतावै उठे आकड़ो ई कोनी मिलै ! सावचेती जरूरी । हाल काचा मूंगां रो कांई नीं बिगड़यो । कुंवारा रै सौं घर अर सौं वर हुवै ।"

सगपण साथै ई ब्यांव री तारीख तय करेर भुआजी नै फोन कर्यो कै आखातीज रो 'फेरै' रो विचार है । चट मंगनी अर पट ब्यांव । सबसूं आछो नींतर आजकाले दुनिया खावै नीं तो ढुळावै जरूर, आ ई नीयत ।

आखातीज आवण रै पैली ई भुआजी त्यारी में । पीहर रो इतरो कोड !

उठीनै भतीजै महीनै भर पैली ई फोन कर्यो कै म्हें काल-परसूं आपनै अर फुआजी नै लेवण आय रह्यो हूं, तो भुआजी मन ई मन अलेखूं आशीसां देवता ऊपरलै मन सूं कैयो, "इतरा पैली ! अरे महीनै भर पैली वाळी बातां तो गई, थारै-दादा-दादीं संग । आजकाल तो बगत माथै हाजरी देयेर बै जावै, बै जावै रो बगत ।"

"ना, ना । म्हें काल ई आय रैयो हूं । पैलो 'आणो' आपरो । आपरै हाथां ई टाबरां रा लाड-कोड ! आप आयां महै नैछो कै भुआजी अर फुआजी बैठ्या है ।"

"ना भाई, बूढां नै कुण पूछ्ये ? नूंवा राजा अर नूंवी प्रजा । नूंवा नैम-कायदा । नित नूंवी फैशन ।" भुआजी लगता बोलता अर बो विचाळै ई बोल्यो, "सौं बातां री अेक बात, आप दोन्यूं नै आवणो है ।"

आज ज्यूं ई घंटी बाजी भुआ जी राजी । अणूता राजी । गळी री लुगाइयां ई गाडी देखेर पूछ्यो, "कुण आया है !"

"म्हारो सगो भतीजो है । इण री छोरी रो ब्यांव है । आखातीज रो जंवाई डॉक्टर लायो है । औ खुद करोड़पति है, पण पईसे भर ई मिजाज कोनी । भुआजी ! भुआजी ! अर फुआजी ! फुआजी ! करतो जीव सुखावै । दूजै-तीजै दिन फोन आय जावै । काल ई फोन आयो कै पैलो 'आणो' आपरो अर आज आयग्यो ।"

"भली बातां पीहर री । कद रो फेरो है ?" पुष्पा पूछ्यो ।

“आखातीज रो। हाल महीनो पड़यो हैं। इतरा पैली दोन्यूं काँई करां! औ ई कैवूं हूं इणनै। हां, पैली महीनै भर बना गावता, धान-चून साफ करता, पण आजकाल सगळा रैड़िमेड! सुबै स्याणी टैट लागै अर सिंझ्या रा भेळो हुंवतो ई दीखै। ब्यांव जाणै ‘रमेकड़ो’, पण इणमें कितरो प्रेम है, पैली रै रीति-रिवाज रो। महीनै भर पैली आवणो है, आपरै आयां बाद ई ‘हाथ-काम’ लेवांला, आ ईज रट।”

“तो पछे जावो। इतरी मनवार करै है तो थे इतरा मूंधा क्यूं पड़ो? औड़ा भतीजा हजारां में अेकाध ई हुवै, नींतर सगा भाई ई कोनी बुलावै!”

“हां, म्हें लारलै दिनां ई भतीजै रै ब्यांव में गई तो आज ताँई पछतावो ई करूं। नित सोचूं कै ब्यांव-शादी में जावण रो हाथ-पाणी ई लेवणो।”

“क्यूं? औड़ो काँई हुयो! थे तो कैवो हो नीं कै म्हारो भाई अफसर है।”

“धूड़ उणरी अफसरी में! बिचारा औ पूरी रात बरामदे में पड़या रैया अर मजाकां करै—इणां नै क्यारी ठंड लागै अर खुद आपू-आपरै कमरै में। अरे, ओक दिन अळघा पड़या रैवो तो काँई हुवै। इण ऊपरां म्हें बीसेक हजार रो खरचो कस्यो अर उण दिया-इक्यावन सौ। आ सीख! गयी भैंस पाणी में। नीं लाज, नीं शरम। ऊघाड़ माथै ई ‘ही! ही! हू! हू!’ औ देख्यो फगत, अधूराई!”

“म्हें तो कैवूं कै जद भतीजो गाड़ी लेयर लेवण नै आयग्यो तो जावणो चाईजै। आखर ब्यांव रा ढोल तो ब्यांव में ईज बाजै।” दूजोड़ी बोली।

“म्हारै तो भाई अर भोजाइयां बैठी लेहर करो, कोई कारज री नीं। चीरी आंगळी माथै ई...! पछै भतीजां सूं काँई आस करणी। भाई खुद बैन नै पूरी खाय’र दाणो बतावै जिसा नीं!” कोई भाइयां माथै दांत किटकिटावती बोली।

“म्हें तो कैवूं कै भतीजो आयो है तो आयां रो आवकार जाण जावो। इण ऊपरां आपरै अठै कुणसा टाबर रोवै!” लुगाइयां जितरी बातां।

“हां। म्हें ई औ ईज कैवूं। मन नीं लागैला तो फेरूं पुगाय देवूला, इण सिवाय तो काँई कर सकूं।” भतीजो बीचै बोल्यो।

“मन तो क्यूं नीं लागै! आखर नैनी-मोटी उठै ई हुयी। इण ऊपरां पीहर रा रुंख ई कठै पड़या है देखण नै, पण इणां रो स्यात मन नीं लागै तो...!”

“इणां रै मन लगावण री जिम्मेवारी म्हारी।” भतीजो हंसतो-हंसतो बोल्यो।

“अरे, म्हें तो कठैरै रैय जावूं भलाई ओक बार तो दुश्मणां भेळो ई। बस, दो विस्वा प्रेम चाईजै। जद आगलो आघो-आघो दौड़े, भाव ई नीं पूछै जद बिना मान-मनवार पल भर ऊभो नीं रैवूं। आखर उण आंगणै रो तोरण बींध्यो। सूंठ सुळ्योड़ी तो ई धाणा सूं गईबीती कोनी हुवै!”

भतीजो फुआजी रै तीखे तानै नै तुरंत समझतो बोल्यो, “आप मन मोटो राखो सा।

आप भण्या-गुण्या हो। म्हँ तो आपरै टाबरां सूं ई नैनौ, ना समझ। आखर, पाणी पाणी रै ढाल उत्तरै।”

“आखर थांरी कांई मंशा है?” भुआजी, फुआजी साम्हों मूँडो करतां पूछ्यो।

“राणीजी कैवै उठै उदैपुर। महीने-भर सूं तो मांयनै री मांयनै त्यार हुय रैयी है अर आज म्हनै पूछै, कांई है विचार!”

“त्यार तो हुवणो ई पडै। आखर जावणो तो पडैला ई। यूं तोड्या घोडै अर असवार दोन्यूं री घटै। म्हँ नीं, तो टाबरां नै भेजणा पड़ता। रीत रो रायतो तो करणो ई पड़तो अर दोय गाभा ढंग रा ई जरूरी। थोरै ज्यूं तो हुवै कोनी कै ओक सफारी अर ओक झाड्यो-पायजामो लियां ऊभा ज्यूं ई व्हीर!”

“म्हँ तो कैवै कैलेवण नै आयग्यो अर इतरी मनवार करै है, तो ओकर चालां।” फुआजी ठेठ सूं खुल्लो कैवण वाळा। खुलासो करतां कैयो, “छाछ नै जावतां बरतन क्यूं लुकोवणो? पण महीने-भर पैली! दुनिया कैवैला कै औ आया लाडै री भुआ।”

“दुनिया तो घोडै चढऱ्यै नै ई! कैवै अर पगां चालणियै नै ई! उणरी चिंता छोडो।

दोन्यूं त्यार हुयग्या तो भरीजै भुआ रै टाबरां नै कैयो, “थे सगळा हफतै-भर पैली आय जाईजो। उठै मामा रो घर अर मां परोसण वाळी, कैवत सुणी!”

“बगतसर आय जावांला।”

“बगतसर कांई हुवै। पंदरै दिन पैली आय सको तो ठीक, नींतर हफतै में कांई कैवणो।” उण फेरूं जोर देय 'र कैयो।

“जरूर।

“खा म्हारी सौगन्ध।”

“अरे आय जावांला, विश्वास राखो।”

“अरे थे तो उठै सूं ई ग्यारहवीं कीनी, तो केई यार-दोस्त मिल जावैला अर म्हारै ई कारज में हाथ बटाईजैला।”

गाडी रवाना हुवण रै पैली दादी अर दादै रा दोय थैला राखतां देख, जय-जश संग वैभव ई ढीलो मूँडो करण लागो तो दादा री ई आंग्यां भरीजण लागी। उठीनै बेटो अर बीनणी पगां रै धोक देवता बोल्या, “मन नीं लागै तो फोन कर लीजो, लेवण नै आय जावूला।” बेटो लगतो बोल्यो।

“काले थे सगळा ई थांरी खुद री कार लेय 'र त्यार हुय 'र आईजो।” दादी पोतरां नै कैवती-कैवती बीनणी ने शुकुन देवण रो इशारो कीनो तो बा गाडी रै जीवणै कानी जाय ऊभी। टाबरां नै मन में विश्वास नीं! इणी कारण ओक टकी लगायां देखता।

“‘ऐ टाबर म्हां दोन्यूं रै इतरा ओळ्यूं-दोळ्यूं रैवै के इणां सिवाय म्हैं नीं अर म्हांरै सिवाय ऐ नीं रैवै। जाणै अेक जीव ई।’” भुआजी खुद रै भतीजै सूं कैवता आंख्यां मसली।

“‘तो लेय लेवो टाबरां नै साथै, गाडी घुमावूं?’”

“‘ना, ना। टाबर पढै है। महीनै-भर री पढाई खराब कर्स्यां कांई मिलै। थोडी देर याद कैरेला, पछै भूल जावैला।’”

फुआजी आगली सीट माथै अर भुआजी लारली सीट माथै दोन्यूं थैलियां नै संभाळ्यां काच सूं दौड़ती कार संग सरपट सड़क नै देखतां बोल्या, “आ ई ई सड़क कांई डबल हुयगी?”

“‘हां, आजकाल तो भारत माव्या सड़क सूं डबल कांई, देखो खूब ऊंची अर आछी सड़क बणगी। किणी बगत पांच-छह घंटा लागता उण ठौड़ तीनेक घटै में पूग जावांला।’”

“‘कांई बात करै।’”

“‘हर ठौड़ विकास दीखै। इण ऊपरां मोबाइल सगळा समाचार देवतो रैवै। भतीजो पूरी बात बोलतो, उण सूं पैली भुआजी कैयो, “मोबाइल टाबरां अर लुगाइयां रै तो जाणै जीव री ई जडी होयग्यो!”’

“‘हां, औ तो है ई।’” कैवतो-कैवतो बो गाडी सड़क सूं नीची लीनी खुद रै गांव री सड़क पकड़ण सारू। अठै गौशाळा देखै र उण अेक सौ रो नोट चारै वाळै नै पकड़ावतो कैयो, “‘गायां नै चारो।’”

चारा वाव्या पांच-सात। सगळां कनै गाय ऊभी।

“‘खुद री गाय अर खुद रो चारो! आ कैडी सेवा।’” फुआजी बोल्या।

“‘आपू-आप रा करम-धरम। किणी री निंदा नीं करणी।’” कैवता भुआजी ई चारै वाळै साम्र्हीं पांच सौ रो नोट करतां कैयो, “‘अेक सौ रो चारो।’”

“‘खुला क्यूं करावो! म्हैं देय देवूला।’” भतीजो बीचै बोल्यो।

“‘ना भाई, म्हारै हाथ सूं धरम। थारा पइसा क्यूं लेवूं।’”

“‘ठोड़-ठोड़ गऊळालावां। कमाई रा साधन हुयग्या। जमीन मिलै, अनुदान मिलै अर धरमादै रै नांव सूं खूब आवै तो भी पेटियां लियोड़ा बसां में, रेल में, बजार अर दूकानां साथै गाडियां लेयै र घर-घर! गायां रै नांव माथै खुद रो घर चलावै, कमाई रा साधन कर लीना।’” फुआजी लगोलग कैवता अर भुआजी कैवता, “‘किण भांत रो सुभाव हुयग्यो थांरो, दूजां री खोट ई खोट दीखै।’”

“‘म्हैं ई अेक लाख रुपिया गायां रै चारै रो गोदाम बणावण सारू दीना।’” भतीजो भुआजी नै कैयो।

“‘चोखो भई, चोखो। औ ईज आगलै जलम रो कारज है, बेटा। थालै में हुवै जद अवाडै में ई आवै। यूं भी गो-दान सब सूं मोटो मानीजै।

बै घरां पूग्या तो भतीजै री बहू साथै भोजाईजी ई पगां लाग्या । टावरिया “भुआजी ! भुआजी !” करता ओळ्यूं-दोळ्यूं कमरे सूं बारै आय’र साळाजी ई पगां रै हाथ देवण लागो, तो भुआजी अर फुआजी दोन्यूं उणा नै आसीस देवता भुआजी तो छाती रै ई चेष्यो ।

चाय-पाणी साथै नाश्तो ।

“मकान ई जोरदार बणा दियो !” फुआजी अठी-उठी निजर फेंकता बोल्या, तो भुआजी बोल्या, “बणावै क्यूं नीं ! करोडपति है । पुराणो पूरो पटकाय नूंवो ऊभो कस्यो काईं भाभीजी ?”

“हां । पैलीवाळो ई मरम्मत मांगतो । इण ऊपरां बाढ आयां खळ-विखळ हुयग्यो जद ठेकेदार कैयो, पीलर माथै उठा दूं ताकि सौ बरस साम्र्ही देखण रो कारज नीं ।”

“आजकाल सगळा मकान पीलरां माथै ई बण रह्या है । कॉम्प्लेक्स हुवो चावै बीस -तीस मंजिला फ्लैट ई, कोई जोखो नीं ।” भुआजी ई हां में हां मिलावता बोल्या ।

“यूं तो बो ई घणो पुराणो नीं हुयो हो । म्हरै व्यांव री बगत ऊभो कीनो हो । पचास बरस रो । जल्द ई पटकायो ।” भुआजी लगतां कैयो ।

“पण कैवै है नीं कै ‘माया’ नै माडो नीं सुहावै ।” फुआजी ई कैवता-कैवता हंस्या अर पूछ्यो, “ऊपर ई बणा दियो दीखै ?”

“पूरी तीन मंजिल रो ऊभो कीनो है । म्हैं तो नित ‘स्टेटस’ देखती रैवूं । औं तो फगत मोबाइल माथै कहाणियां लिखै ।”

“मकान रो मौरत ई व्यांव रै पैलै दिन । अेक पंथ, दो काज री भांत ।” साळाजी कैयो ।

“आछो भई आछो । करिया सो काम अर भजिया सो राम ।”

भतीजो अर भुआजी नित बातां करै । औं मकान-मौरत रै दिन रो मीनू । औं व्यांव रै दोय दिनां रो विचार । औं देवण-लेवण रो सोचूं ।

“ब्होत बढिया ।” कैवता भुआजी आपरै धणी नै ई जाणकारी देवता रैवै ।

“साळाजी सूं ई साळाजी रै छोरै नै कितरो हेत है ।” फुआजी रैय-रैय कैवै ।

“आपनै काईं जचै फुआजी ?”

“थाँनै अर भुआजी नै जचे जिको सोळै आना । इण ऊपरां आपरै पापा-मम्मी नै पूछो ।” फुआजी कैयो ।

“उणा नै तो पूछूं ई हूं पण आप ई मोटा हो ।”

“ना सा ! आपू-आपरै घर में सगळा मोटा ।”

देखतां-देखतां मकान रो मौरत हुवण लागो । भतीजो ठौड़-ठौड़ भुआजी, फुआजी कैवतो जीव सुखावै । फोटू खिंचावै । मोबाइल माथै स्टेटस लगावै । फेसबुक अर नीं जाणै

कठै-कठै भेजै। आ अपणायत देख 'र भुआजी अर फुआजी दोन्यूं फूल 'र कुपो हुवै।

ब्यांव में ई कनै ई राखतां हजार बार पूछै, “आप नाश्तो कस्तो ? खाणो खायो ? बो लाऊं ? बो देवूं ? इणी सूं फुआजी राजी। खूब राजी। बै तो नित कैवै ई है कै हंस नै बोलै तो ई खूब। पण करडा ठूंठ हुय 'र आवकार ई नीं देवै जद माथो बरणाटै चढै ई है। म्हैं थानै मोटा कस्ता, थे म्हनै नीं।

ब्यांव रै दूजै-तीजै दिन कह्यो, “अबै जावां ?”

“अेक-दो दिन ठैर जावो। नैछै सूं पुगाय देवूलां। आपैर कुणसा टाबर रोवै !”

“टाबर तो नीं रोवै, पण पोतरा नित फोन करै कै कद आवोला ? लेवण नै आवां काई ? इण ऊपरां बिनणी रै गोडां री तकलीफ, जद जाणूं घरां हुयां उणां नै विस्वास।”

“भतीजो, भुआजी अर फुआजी नै सोनै री बिटियां देंवतो च्यार-च्यार जोडी गापा संग दस दस तोळै रा दोन्यूं नै चांदी रा सिकका (जिकण माथै बेटी-जंवाई रा फोटू अर तारीख ही, जिका जानियां नै दीना, बै ई) दीना तो भुआजी बोल्या, “सिकको ओक ई। जद घर दीठ दीनो है, तो म्हानै दो क्यूं ?”

“आपैर खटतो माल देवूं जितरो ई कम।”

घणी खेंचताण करूयां ई नीं भतीजो मान्यो नीं भोजाई।

खूब सारी मिठाई संग बो खुद पुगावण नै आयो अर ज्यूं ई गव्ही में कार रो हॉर्न बाज्यो, टाबर दौड़ 'र आया, “दादाजी आयग्या ! दादीजीआयग्या !” कैवता बो लेवै तो बो दूजी चीज खोलै, फाड़ै, जाणै सामान रो पोस्टमार्टम करता है।

गव्ही री लुगाइयां भेळी हुंवती आयी अर बोली, “थाँरै सिवाय तो महीनै-भर सूं मोहल्लो साव सूनो-सूनो ई लागतो। औड़े ठेठ भतीजै री छोरी रो ब्यांव, जद भतीजै रै ब्यांव री बगत तो स्यात च्यार महीना बैठ्या रह्या हुवोला ?”

“ना। उण बगत टाबरां री परीक्षावां रा दिन हुवण सूं ऊझै पगां आयी।”

“उणरी कसर अबकाळै निकाळ लीनी, जाणै आटै री कसर खाटै में वाळी बात !”
लुगाइयां हंसती-हंसती बोली।

“अरे भतीजो हथेळी रै छालै ज्यूं राखतो। खूब सेवा-चाकरी कीनी। जद मन ई नीं हुयो कै घरां जावां। इण ऊपरां इणां ई नांव नीं लीनो, नींतर ऐ तो आज ताईं कदई दो दिनां सूं ज्यादा नीं ठैस्या। भतीजो हुवै तो इसो हुवै। कठै चालै अर कठै हाथ राखूं आ ई गत।”

“तो सोनै में ई पीळापट कीना हुवैला ?” लुगाइयां बात री तह तक पूगण सारू पूछ्यो।

“हां। म्हां दोन्यूं रै सोनै री अंगूठियां। हरेक जानियां नै दस-दस तोळै रा चांदी रा सिकका। भाटै रै जैड़ा ! म्हानै दोन्यूं नै दो ! लाव अे बीनणी ! बो पॉकेट !” कैवता सिकका

बतावतां बींटियां बताई। लुगाइयां रैय-रैय बातां पूछती अर भुआजी बखाणां रा पुल ई बांधता फूलीजता, “देखो! आज हजार कारज छोड ई म्हानै पूगावण नै आयो। इण ऊपरां महीनै भर में म्हांरे नूंवो टक्को ई खरच नीं करवायो!”

बै नित फोन माथै समाचार पूछै बेटी रा। उणरै काई दिन चढ्या है? पांवणा रै प्रेक्षित किण भांत रो है? सास-ससुर रो सुभाव किण भांत रो? आद-आद। भेळा रैवण रो प्रेम हुयां टाबर ई बोलै, “भुआजी, कद आवोला?”

“काल...।”

“ना। आज ई आवौ। पापा नै भेजू भुआजी!” भतीजै रा टाबर लगता बोलता।

कितरो हेत! कितरो सनेव! जाणै घर रा पोतरा सूं ई सवायो, डोढो।

◆◆

फार्म नं. 4, नियम-8

पत्रिका रो नांव	:	राजस्थली
प्रकाशन री ठौड़	:	श्रीडूंगरगढ़
प्रकाशन री अवधि	:	तिमाही
मुद्रक	:	महर्षि प्रिंटर्स, श्रीडूंगरगढ़
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
प्रकाशक	:	महावीर माली
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
संपादक	:	श्याम महर्षि
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
उणां शेयर होल्डरां		
रा नांव अर ठिकाणा,		
जिणा कनै कुल पूंजी		
रा 10%सूं बत्ता शेयर है:	कोई कोनी	

म्हैं महावीर माली घोसित करूं कै ऊपरलो विवरण म्हारी जाणकारी अर विस्वास रै मुजब सत्य अर वास्तविकता माथै आधारित है।

महावीर माली
प्रकाशक



अरविंदसिंह आशिया

अफसर

अफसर करै न अफसरी, दफ्तर करै न वर्क।

दास मलूका कह गए, सब कै काका क्लर्क॥

कॉलेज रा दिनां जद औं जुमलो कठैर्इ पछ्यो हो तद औं नीं
सोच्यो हो कै ईं रो कोई तोड़ होय सके। बो टैम सरकारी हो। पूरी
तरियाँ। जद रेडिया रा भी लाइसेंस हुंवता अर नूंवी साइकिल नै भी
बधायेर घरां लावता। जे साइकिल डायनमा वाली है तो पछै मत
पूछो बात। रात रा बीं रो खास शो हुंवतो अर चलावणियो भायलां
नै बतावतो कै कीकर साम्हीं सूं आवती कार वालो भी साइकिल
री बत्ती रै पछकै सूं आधी सड़क छोड़ दीधी।

देस तद इत्तो अमीर नीं हो, जित्तो आज है। अब तो सगल्हा
ई जेबां में मोबाइल अर ढूंगा नीचै फटफटिया दाव्यां उडिया फिरै।
तद तो आखे मोहल्लै में जीं रै कनै मोटरसाइकिल हुंवती बो
अमीरां में गिणीजतो। देखण नै दो ईंज कारां ही अंबेसडर अर
फिएट। खासकर कस्बां अर छोटा-मोटा स्हैरां में। रिस्तै में अेक
ईंज बात रो मोल तेरै आना हो कै छोरो सरकार में नौकर है। औं
व्यांव सारु सुपातर लड़को ढूंढण रो भी अेक मात्र सेंतीसबों गुण
हो, जको लड़कै री कुंडली में जे है तो पछै पांचू थी में मानो आप।

ठिकाणो :
डीडी-14
टाईगरहिल्स
उदयपुर-313011
मो. 9413318066

किसनजी बिजली विभाग रो ऐलकार। किसनजी लाग्यो
तो अफसर नीं हो, पण पछै चढतां-चढतां अफसर हुयग्यो। अेक
नेताजी आपरै कुशल प्रबंधन रो राज बतावतां अेकर कैयो हो कै
चार तरियै रा राज रा नौकर हुवै। पैला ईमानदार अर कामगरा, दूजा
ईमानदार अर निकामा, तीजा भ्रष्ट अर कामगरा अर चौथा भ्रष्ट अर

निकामा। किसन जी पैली टाईप रो अफसर है। बां दिनां में स्यात् भ्रष्टाचार इत्तो नीं हुवैला, पण सरकारी ठसक टणकी ही। गांव-खेड़ा में जे आप बिजली विभाग नै नूंतो नीं द्यो तो जान तोरण आयां आखै गांव री बिजली कट जावती। जल्दाय, बिजली, पीडब्लूडी अर पटवार—ऐ राजा हा अर बाकी परजा।

किसनजी बीं जमानै में पॉलीटेक्नीक कर बिजली विभाग में बढ़ग्यो, सो दस-बारै बरस में एइएन ताईं पूगग्यो हो। किसन जी रो जिलो पाली अर ट्रांसफर रा नांव माथै पांच-सात कस्बां सूं बधतो कठई नीं गियो। अफसरां रै अंगविसेस रो बाल। काम करण में साचो हुंसियार अर बीचै डाचली को मारै नीं, सो महकमे रा दूजा अफसरां री मौज। कीं आडो-अंवळो काम फंस जावतो तो किसनजी नै टूर माथै मेलता, सो किसन जी जाय 'र काम सळ्टाय देंवतो।

खैर साब! तो रामजी आपनै भला दिन देवै। सरकारां बदली अर नूंवा एमएलए साब चुणीज्या। लारलै दाइकां सूं राज करणियां चुआ जाता रैया। लोकतंतर री आ ईज खासियत है कै जिणनै आप न्हार कैवो बो ईज न्हार। नूंवा एमएलए साब रो खटको न्यारो। बां सारू राज में काम करणिया फकत नौकर। भलाईं पोस्ट किसी ई हुवो। बांरो अेक जुमलो फेमस हो, “ आनै राज चुण्या अर म्हानै जनता। औं पच्चीस-पचास हजार प्रतिभागियां सूं कम्पीटीशन कर 'र राज में बडिया है अर म्हानै ढाई लाख जनता चुण 'र जन प्रतिनिधि थरप्या है, सो औं नौकर है अर म्हे मालिक हां। ” मंत्रीजी री दबक बीं हलका रै सगळा अफसरां में टणकी। एमएलए साब घर रा आसूदा। वौपारी परिवार रा। पइसो यूं भी माथै चढ 'र बोलै अर पछै बांरै राज री रेखा हाथ में बा न्यारी। मंत्री पदां रो जद डिक्लेरेशन हुयो तो आं एमएलए साब रो भी नांव लिस्ट में अर अब बै मंत्री हा। लालबत्ती आळी गाडी, आगै सायरन बजातो जाब्बो। ल्यो रे थारी? कुण कैवै कै ब्यांव भूंडो।

पौष-माघ रा दिन। अणूती ठंड। सुबै-सुबै दफतर खुलिया ईज हा कै चपड़सी दौड 'र आयो अर किसनजी नै कैयो कै बारै मंत्रीजी री गाडी आई है। किसनजी कीं जवाब देवता बीं सूं पैली तो मंत्रीजी ऑफिस में आयग्या। किसन जी ऊभो होय 'र नमस्ते करी अर साम्हीं लाग्योड़ी कुर्सी साम्हीं हाथ करता कैयो, “ बिराजो सा। ” औं मंत्री बणियां पछै पैलो मौको हो जद किणी अफसर खुद री कुर्सी नीं सूंप 'र मंत्रीजी नै साम्हीं बैठण रो कैयो हो। मंत्रीजी रो मूंडो थाप खायग्यो, पण बात नै नीं गिनारता मंत्री सामली कुर्सी माथै काबज हुंवता कैयो, “ मनोहरपुरा कच्ची बस्ती कानी गिया हा काईं ईएन सा? सुण्यो है के दस-बीस कनेक्शन काट दीधा? ”

“ सर, बात आ है कै बठै इल्लीगल कनेक्शन बिजली रा खंभां सूं अंकोडिया घाल 'र लीधोड़ा हा, सो वाजिब कारवाई करणी पडी। ” किसनजी लुक्ताईं सूं कैयो।

“‘देखो भाई, थानै तो है अफसराई रो जोम अर म्हारा है बै वोटर्स, सो लीगल एक्शन पाढो ल्यो अर आईदा बठे जावण री जरूरत नीं है थानै।’ कुर्सी माथै पसरेर बैठता मंत्रीजी बोल्या।

“‘देखूं देखां, काई कर सकां ई मामलौ में।’” किसनजी आपरा भाव लुकावता बोल्या, “‘यूं चोखो तो औं रैसी कै आप ऊपर बिजली मंत्रालय रा सेक्रेटरी साब नै फरमाया रे अेक कागज इश्यू कराय दिगावो कै सगळां नै फ्री कनेक्शन रो आदेश फरमाय देवै।’”

“हूं।” मंत्रीजी पाणी पीयर निसरग्या।

किसनजी नै हैडबाबू समझायो कै क्यूं उडो तीर लेवो हो आप ...औं तो गाडो यूं ईज गुडकसी। पण किसनजी ईमानदार अफसर अर पछै कैवत भी है कै तेजी नै तान नीं खटै। सो हैडबाबू नै कैयो कै बीं एरिया रा जेर्इएन साब अर सगळा लाइणमैनां नै कैय दो कै बीं एरिया नै है ज्यूं ई रैवण दो। अेकर कोर्ट में जुर्मानो भरसी तद ई अक्कल आसी आं चोरां नै।

मनोहरपुरा रा कोई बीस जणां नै कोर्ट रो नोटिस मिलायो। के तो जुर्मानो भरो नींतर कानून रै कायदै जेळ जावो। हाकाहूको हुयग्यो। किसनजी रोज ई केस री खास रिपोर्ट लेवै। बात कार्यकर्ता स्तर सूं मंत्रीजी ताईं पूरी। मंत्री सुणरेर लाल-ताता हुयग्या।

“काई नांव बतायो रे बीं एर्हएन रो ?” मंत्रीजी धाकल करतां पूछ्यो।

“किसनजी। किसन जगावत।” अेक छुटभय्यो बोल्यो।

“हूं ! कठा रो है औं ?”

“सा जेतपुरा रो।”

“ई री तो...” मंत्रीजी अेक टणकी गाळ काढता बोल्या, “‘म्हारै ऑफिस में जायरे कैयां पछै भी इतरी निसरमाई ? रामसिंह गाडी काढ देखां।’”

घडी में दोपार रो कांटो हुयो तद ताईं तो मंत्रीजी भरणाट करता विद्युत विभाग रै ऑफिस पूर्गा।

“भाई, के तो थनै म्हारी बात समझ कोनी आवै अर कै पछै थूं खुद नै टणकेल समझै दीखै। म्हारै कैयां पछै भी मनोहरपुरा रो मैटर लीगल प्रोसेस में कीकर गियो ?”

किसनजी ऊभा हुयरेर नमस्तै करी, पण बीं रै जवाब री ठौड़ रीसां बळता मंत्रीजी कुर्सी नै आपरै कानी खींचरेर बैठता बोल्या, “‘भाई, इतरो कानूनबाज मत बण। दोन्यू हाथ भेळा धुपै...।’” मंत्रीजी रो सुर ऊंचै आधै हो। मंत्रीजी रै लारै ऊभा दस-बीस कार्यकर्ता सगळो तोतक देख रैया हा।

किसनजी आपरी कुर्सी माथै बैठता बोल्या, “‘सर, मैटर तो बताय दियो हो आपनै अर आप थोड़ा देरी सूं पधारिया। सचिव महोदय रो कागज आय जावतो तो आ नौबत ई नीं आवती।’” किसनजी लुक्ताई सूं कैयो।

“तो मतलब थूं म्हारे कैयो नीं करै?” मंत्रीजी बिफरिया।

“बात अब म्हारै हाथ भी तो नीं है सा। मामलो कचेड़ी में पूगायो।” किसनजी बोल्यो।

“अब तो थूं भी बाट जोव। औड़ी काळीधार फेंकस्थूं थनै कै सगळी अफसराई मांय बड़ जासी।” मंत्रीजी लाल-ताता हुंवता रीस में झळाबोल कुर्सी सूं ऊठर बरै नीसरग्या।

किसनजी ऊभा देखता रैया। बारै मंत्रीजी री गाडियां जावण री आवाज कानां में पड़ी। ऑफिस रा सगळा एइएनसाब रा चैम्बर में भेळा हुयग्या। किसनजी मुळकता कैयो, “काई देखो भाईड़ा! आप-आपरा काम करो, जाओ।”

हैडबाबू आपरा कमरा में कुर्सी खींचतो अकाऊंटेंट नै कैयो, “तुम बाण चलाओ पार्थ।”

“मगर किस पर?” अकाऊंटेंट मुळकतां कह्हाँ।

“तुम तो किधर भी चलाओ, अपने एइएन साब आकर बाण स्वीकार कर लेंगे।” कैयर हैडबाबू जोर सूं हंस्यो। असल में सरकार में रैयर कामगरो अर ईमानदार बण्यो रैवणो नौकरी करण सूं भी दोरो हुवे।

तीजै दिन भूरो लिफाफो आयग्यो किसनजी रै नांव। बांरी बदवी जैसलमेर रै आथमणै कानी अेक कस्बै सानूं में हुयगी ही। बां दिनां धोरां में नौकरी काळैपाणी ज्यूं ई मानीजती। ऑफिस में जका किसनजी नै पसंद करता बानै दुख हो अर जका कड़क अफसर सूं तंग हा, बानै मजो आयग्यो हो। दूजै दिन समोसा-कचोरी री पार्टी हुयी। ऑफिसवाळा झूठा भासण दीधा कै किसनजी रै कार्यकाल में काम आपरी ऊंचाई माथे हो अर किसनजी पैली वेळा आपरै जिलै सूं जिलाबदर हुयग्या।

सानूं रामगढ़ सूं पैली अर जैसलमेर-रामगढ़ रै बिचाठ्ये। आपरै बाप जमारै भी कदैर्इ किसनजी पाली जिलै सूं बारै नीं गिया, पण मंत्रीजी सूं राड़ करी ही। औं तो हुवणो ईज हो।

सानूं आरएसएमएम रै लाइम स्टोन माइंस रो टणको माइनिंग एरियो। पाली सूं जोधपुर अर जोधपुर सूं नाइट बस में किसनजी जैसलमेर पूग्या। बींटा बिस्तर साँगै। सुबै सात साढी सात ताईं जैसलमेर पूग्या। बठै ई चाय पाणी करर र पतो कीधो कै सानूं सारू यूं तो माइंस री बसां है, पण दूजां नै बै बैठावै कोनी, सो रोडवेज सूं ईज जाणो पड़सी। नौ बजियां अेक बस है रामगढ़ वाळी। बा सानूं हुयर र जावै। किसन जी बीं में जमगा, सो कोई दोयेक घंटा पछै सवा इयरारै रै लगै टगै सानूं पूगा। सानूं उतरर अेक ऑटोवाल्है नै त्यार कीधो कै भाई बिजली विभाग रै ऑफिस पूगाय दै। यूं करर डोढ दिन चालर किसनजी नूंवी जगै पूग्या, जठै बानै मंत्रीजी री मेहरबानी सूं राज ट्रांसफर कीधा हा। सगळा सूं रामा-स्यामा हुया। ज्वाइनिंग हुयी। बठै अेक पुष्करणो लाग्योड़े हैडक्लर्क। बीं रै क्वार्टर में, जको कै लारलै पसवाड़े ईज हो, साफ-सूफ करायर किसनजी नै शिफ्ट

करिया। बात आईं-गई हुयगी। किसनजी रै आवण सूं पैली बांरी ख्यात पूगगी ही कै करड़े अफसर है। यूं किसनजी सगळां नै सागै लेय'र चलणिया। पछै सानू में सैसूं बड़ी पोस्ट एईएन री ई ही, सो धाको किसनजी रो टणको।

मार्च रा दिन आयग्या हा। फाइनेंशियल ईयर री एंडिंग। फील्ड एरिया रा दौरा बधग्या हा। बिजळी रा बिल अर रिकवरी रा अंबार लागग्या। किसनजी रोज सरकारी जीप में ईज दोपारी करै। गर्मी बधण लागगी ही। जैसलमेर यूं भी बधता टेम्परेचर वाळो एरियो। पंखा चालण लागग्या हा। किसनजी सुबै बेगा दौरा माथै गिया, सो दुपार ताँई पाछा आय'र कुर्सी माथै पसरियोड़ा पंखा री हवा रो आणंद लेवै। हैडबाबू पुष्करणो कनै बैठ्यो बाकियात री लिस्ट बतावै। जितरैक तो अेक नांव आयो बालमुकुंद जिंगा। कोई तीन बरस सूं बिजळी री बाकियात चाल री अर अस्सी लाख सूं बधतो अमाऊंट बाकी नीसरै।

“ औ कुण तोप है भाई जको लाखुं खाय'र बैठो है अर डकार तक नीं लेवै! ”
किसनजी कनै पड़ी गिलास मांय सूं चाय रो सुरड़को लेवता बोल्या।

“ सा, मोटी आसामी है अर पॉलिटिकल बैकग्राउंड है सा, काईं करां? सगळां नै नौकरी वाल्ही है! ” पुष्करणो मुळकतो पढूत्तर दीन्हो।

“ औड़ो काईं बैकग्राउंड है? ” किसनजी गुणको पाड़यो।

“ पीडब्लूडी वाला मंत्रीजी रै सालाजी है बालमुकुंदजी। लाइमस्टोन री माइन्स अर गैंगशॉ लाग्योड़ा है। दो अेक वेळा इल्लीगल बिजळी रै वपराण री शिकायत ई हुयी, पण मामलो रफा-दफा ई रैयो। सांप रै जाळै में हाथ कुण घालै। ”

मंत्रीजी रै नांव सूं ई किसनजी कुरसी माथै सजग हुयग्या। मन में मुळक्या कै औ तो आपां रा वाला ईज मंत्रीजी है जकां ट्रांसफर करायो अर बांरा साला जी ई निकळ्या जिंगाजी तो। पण ऊपर सूं गंभीर हुंवतां कैयो, “ हैड बाबूजी, आप पन्दरै दिन रो नोटिस पकड़ावो आनै अर कॉपी रीको रा चीफ नै भेजो। ” पुष्करणो अचूंभै सूं देखतो रह्हो कै साब क्यूं काळै री पूँछड़ी पर पग देवै, पण साब रै मूँडै गंभीरता देख'र कैयो, “ ठीक सा। ”

अब किसनजी इण मामलै री सगळी फाईलां मंगवाय ली। रसूखात रै चालतां जिंगाजी रो बिल बणतो गयो, पण बां जमा करायो ई नीं अर अमाऊंट हजारां सूं लाखां हुयग्यो। किसनजी तो जाणै अब दिन गिणै। संजोग सूं उद्योग सचिव किसनजी रो मिलणियो अर कठैई बां मंत्रीजी सूं ठूंठो-सो तोजो जमग्यो। पंदरै दिन पूरा हुंवतां ई अर किसनजी उद्योग सचिव नै शिकायत कर दीन्ही। उद्योग सचिव री कांनी सूं नोटिस जारी हुयग्यो कै दस दिन में बिल जमा करावो, नीं तो फेकट्री रो ऑक्शन होय जासी।

जिंगाजी रै औड़ा केई नोटिस आवै, सो बां गिनारो नीं कीधो। बात आईं-गई हुयग्यी। अठीनै किसनजी पतो कीधो कै मंत्रीजी री एंटी पार्टी में कुण है जको कै

उद्योगपति है। पतो लाग्यो कै जायसवाल एंटी पार्टी रो है अर लाइमस्टोन री केरेई माइंसा रो मालिक है। किसनजी जायसवाल रै घरै पूगाग्या। सगळी बात सुण'र जायसवाल थोड़ी देर तो चुप रैयो, पछै बोल्यो, “आपनै के फायदो है जी ई सौदा में?”

“कीं नीं सा। आवगी उमर ईमानदारी सूं नौकरी कीधी, पण औ मंत्रीजी म्हारी पूठ थपथपावण री जग्यां बईमानां सारू म्हनै ईज देसिकाळो देय दीधो, इसा लोगां नै औं तो ठाह पड़णो ईज चाईजै कै सत्ता दलाली सारू नीं हूवै।” दूजै दिन दोपार पछै ऑक्शन री प्रक्रिया सरू हुयी। जिला उद्योग अधिकारी रै साम्हीं जायसवाल आपरी बिड राखी अर फैक्ट्री जायसवाल री हुयी। आ बात मंगळवार री ही।

बुधवार नै दोपार पछै अर दो-तीन गाडियां बिजली विभाग रै कैम्पस में आयी। बै ईज मंत्रीजी हा। सावाजी जैपर ई गिया हा, पण कारवाई तो हुयगी।

“अरे भाई ईएन साब, जे कीं बात ही तो बात तो करता। तमाशो बणाय दीधो पॉलिटिक्स में अर फैक्ट्री जायसवाल कनै गई परी। म्हारो विरोधी है बो ओक नंबर रो।” मंत्रीजी रै मूँडै रीस अर बेबसी रा सेलाण हा।

“अरे सा, अब्बल तो म्हनै काईं ठाह कै आपरै सावाजी री फैक्ट्री है, दूजो जायसवाल नै तो म्हैं ओळखूं तकात नीं। म्हैं तो रूटीन विभागीय कारवाई करी ही। अठै सूं गिया कागज माथै काईं एक्शन हुयो, म्हनैं तो औं तकात म्हनैं ध्यान नीं। पछै आप जाणो सा कै म्हैं तो एइएन ठहरियो। म्हनै मिनिस्ट्रियां में कुण ओळखै।” किसनजी लुक्ताई सूं कैयो।

मंत्रीजी थोड़ी जेज तो कीं नीं बोल्या। पछै निसासौ न्हाख'र पूछ्यो, “अबै कीं होय सकै?”

किसनजी मन में कैयो, “जीमियां पछै तो चचू हूवै”, पण सामी कैयो, “सा ऑक्शन रुक जावतो तो ठीक हो, अब तो काईं होय सकै।”

मंत्रीजी, “ठीक है भाई, सरकार तो असल में थे चलावो हो।” कैय'र उठाया। गाडियां कैम्पस सूं बारै नीसरगी।

“हैड बाबूजी, बढिया चाय बणवावो देखां।” किसनजी मुळकता पुष्करण नै हाक करी।

बीसेक दिनां पछै किसन रै ऑफिस में ओक भूरो लिफाफो भलै आयो राज रो। किसनजी री बदली पाछी पाली जिलै में ईज होयगी ही। उद्योग सचिव सिफारिश करी ही कै ईमानदार अफसर है अर गृह जिलै में रीको रा नूंवा एरिया डेवेलेपमेंट मांय औड़ा अफसर घणा सहायक सिद्ध हुवैला।”

◆◆



मदन गोपाल लद्धा

किता चौरावा

“आज ठंडै पाणी सूँ ई न्हावणो पड़सी सगळा नैं। जद ताईं गीजर नीं लागैला, तातो पाणी कोनी मिलै। गैस चूल्है माथै पाणी उकाळ’र देवण री सरधा कोनी म्हारी।” म्हणैं पथरणा में जोड़ायत रा बोल सुणीज्या।

भोरानभोर औ नूंवो कौतक! रात वाळी सळ्टी कोनी अर दिनौं आ नूंवी भळै मंडगी।

आ जबरी बात है भई! काई ठाह लोग कींकर पार घालै। आपणो तो इण दोघाचींती सूँ ई लारो कोनी छूटै। जातरा माथै निकलणो हुवै तो बस बनाम रेल रो पाणो मंड जावै। गाभा पैरणा हुवै तो कुरतो-पाजामा अर पैंट-बुशट रो पेच अड़ लावै। टीवी देखूं तो चैनल बदलण में ई घंटो टिप जावै। सौरै-सांस तो रेहड़ी सूँ साग-भाजी ई कोनी खरीदाजै। जद देखो, साम्हीं दो डांड्यां तो लाधै ई लाधै। केरई बार तो दो सूँ ई कोनी सरै, ठेठ चौरावै पूग जावूं। अबै सोधो मारग, पूगो मंजल ताईं। मारग चूक्यां ओळमो बट पर, मंजल लग पूग्यां जस लेवणियां केरई आ जासी।

“इयां म्हारै सागै ई क्यूँ हुवै?” औ सवाल मगजी में उठै अवस पण पद्गतर किण सूँ मांगूं। सवालां रै कांटां सूँ सुरडीजता थकां पैलां भोर वाळी बात मांडूं।

ठिकाणो :

144, लद्धा निवास
महाजन, बीकानेर
मो. 9982502969

बियां बात, नीं बात रो नांव, पण म्हारी नींद तो बिडरगी।

ना जी, म्हें कोई आडी कोनी अडावूं। सीधी बात है कै ठरी पड़णै रै सागै न्हावण सारू तातै पाणी री जरूरत लखावण लागगी। लारलै बरस ताईं तो लोखंड रै बण्योड़ै हमाम सूँ पाणी

तातो करता रैया पण अबकै दियाळी माथै जको घर भाडै लियो, उणमें हमाम बरतणै री जाबक ई गुंजायस कोनी। बियां ई सहर में लकड़ी-छाणो बपरावणो झँझट रो काम हो। नवै घर रो मालिक तो आगूंच कैय दियो, “म्हैं हणै ई रंग-रोगन करवायो है, इण सारू देसी चूल्हो-हमाम कोनी चालैला। धुंवै सूं घर रो रूप-रंग बिगड़ जावै।”

चूल्हे री ठोड़ तो कदई गैस चूल्हो बपरा लियो, पण पाणी तातो करण रो काम अजै हमाम भरोसै ई हो। दादी थकां तो घैर हारो धुकबो करतो अर उण माथै टेक्योड़ी देगची में तातो पाणी त्यार ई लाधतो। दादी परलोक गई अर हारो गांव में रैयग्यो। नौकरी सारू स्हैर में गूदड़ा न्हाख्यां नै दस बरस बीतग्या। आं दस बरसां में तीन घर बदल लिया पण भलै ई हमाम कांटो काढै हो। कीं कचरो-फूस घर सूं कढ जातो तो कीं लकड़ी-छाणो मोल ले आवता। इण चौथै घर में पूगतां ई हमाम रो बगत पूरो हुयग्यो। अबै गीजर बपरावणो पड़सी। गैस गीजर सावल रैवैला का बिजाळी वावो। इण रो निवेड़ म्हारै सारू अबखो काम हुयग्यो। जोड़ायत औड़ी बातां में मगज कोनी खपावै। “थे जाणो, म्हनैं काई ठाह”, फगत अंके ओळी सूं बा आपरो लारो छुडा लेवै। बियां बा म्हारो सुभाव ई जाणै। जे बा कीं बता ई देवै, म्हैं सोरै-सांस मानूं ई तो कोनी।

म्हैं जमानै रै ढंग-ढाळै मुजब गूगल बाबै री शरण लीवी। यू-ट्यूब माथै वीडियो देख्या। वीडियो बणावणियां रो ध्यान मूळ बात करता शेयर-लाइक-कमेंट माथै बेसी रैवै। आठ-दस मिनट गाळ्यां पछै ई बात रो नितार कोनी निकलै। कोई गैस गीजर नै चोखो बतावै तो कोई बिजाळी वाळा गीजर नै सुरक्षित। अंक देवीजी तो आपरै यू-ट्यूब चैनल माथै दोनूं भांत रा गीजर बेचण री जुगत करती दीसी। म्हारै सारू सुरक्षा रो मापीणो जित्तो जरुरी हो, बित्तो ई महताऊ हो गीजर रो बजट। मील री मुनीमी में रासन-भाडै रो बंदोबस्त मस्सां हुवै। टाबरां री भणाई रो खरचो ई अबै बडो ठाम बणग्यो। कुल मिला 'र धाको-सो धिकै। रात नै मोडै ताई आ अळोच चाली भलै ई मुकामसर कोनी पूर्यो। छेकड़ दिनगौ मील मालिक रै बेटै सूं सल्ला-सूत री सोची, जद जाय 'र नीठ आंख लागी।

अगलै अपीसोड रा निरदेसक सेठी रा सपूत है जका दिल्ली सूं अमबीओ री भणाई कर 'र बावड़ा है अर अबै घर रो धंधो संभाळै।

“बाबू साब नूंवो मकान मालिक हमाम सारू साफ मना कर दियो। अब गीजर री आडी आप ई सुळझावो।” म्हैं विगतवार सारी बात बता 'र मदद मांगी।

आ फिलम सरू हुवतां ई गीजर वाळी बात तो बिसरगी अर अंक नूंवी घरल-मरल पोळाइजगी।

“अंकल आप घर रा कित्ता रुपिया भाडो देवो महीनै रो?” बाबू साब पूछ्यो।

“‘पैलां सात हजार लागता अर नूंवै घर रो धणी आठ पर अड़ग्यो । बिजली-पाणी रा न्यारा ।’” म्हँ बतायो ।

“आपनै इण सहर में आयां नै कित्ता बरस हुयग्या ?” बां नूंवो सवाल कर्यो ।

“जद सूं गांव छोड्यो... मोटामोटी दस बरस मान लेवो ।” म्हँ मनोमन गिणती करी ।

“आ ई गळती कर दीवी । जे अठै आवतां ई प्लॉट लेय 'र घर मांड लेवता का कोई फ्लैट ले लेवता तो अजै तांई करजो उतर जावतो अर जायदाद रा मालिक ई बण जावता ।” बां हिसाब लगावतां कैयो ।

“भाडे मस्सां भेळो हुवै बाबू साब, आपरो घर खरीदण सारू तो झोळो-खंड रुपिया चाईजै ।” म्हँ पीड़ परगासी ।

“आजकल बैंकवाळा रुपिया लेय 'र लारै भाजै, कोई लेवण वाळो चाईजै । भाडे री ठौड़ ईअेमआई भर देवो । आप तो अबै ई इण बाबत विचार करो ।” बात पूरी कर 'र बाबू साब तो आपरै काम में बिलमग्या, पण म्हारी अल्योच सारू नूंवो मोरचो खोलग्या । काई म्हनै भाडे रै घर में भटकणै री ठौड़ आपरो घर खरीदणो चाईजै ? स्हैर में खुद रै घर रो सुपनो बरसां सूं म्हारै मन में है । फगत म्हारै ई क्यूं जोड़ायत अर टाबरां री आंख्यां में ई औ सुपनो पळै । केई बार औ सुपनो मूळो काढै, पण म्हँ सुवांज नीं हुवण री बात गोखतां उण नै बीजी चिंतावां हेठै दाब देवूं ।

बाबू साब री बात उण दिन लगोलग मन में गूंजती रैयी । आपरो घर तो आपरो घर हुवै । आखी उमर बोरिया-बिस्तर ठरडणो कुण चावै । मन में आई कै ओखी-सोखी अबै हिम्मत कर लेवणी चाईजै । दोघाचिंती रो बिंदु औ हो कै घर सारू जमीन सोधणी चाईजै का फ्लैट ।

जग-जाणीती बात है प्लॉट लेवणो दोरो अर उण माथै घर मांडणो तो सै सूं दोरो । दो कमरा-रसोई रे छोटै-सै घर रो चेजो पोल्यावां तो ई अेक साल में पूरो कोनी हुवै । कदैई ईट, कदैई सिम्पट, कदैई बजरी तो कदैई सरियो, समान ढोवतां-ढोवतां आदमी आखतीज जावै । चिणाई रो मिस्त्री, टाइल रो मिस्त्री, पुटी रो मिस्त्री, बिजली-पाणी फिटिंग रो मिस्त्री, लकड़ी रो मिस्त्री, बीस भांत रा मिस्त्री बुलावणा पड़े । हरेक मिस्त्री सारू जिनसां बपरावणी पड़े । बांनै परोटणा पड़े । अेक मकान बणै इत्तै धणी री पीओच.डी. सी हुय जावै । भूतल रै घर करता फ्लैट अमूमन कमती दाम में मिल जावै । मगजमारी तो जाबक ई कोनी करणी । सोसायटी रो मालिक चाबी सूंपै हाथ में । बियां तो फ्लैट रो चाळो इण स्हैर में नूंवो है । दसेक बरसां पैलां अेक सोलर कंपनी आपरै स्टाफ रै रैवास सारू स्हैर रै

बारलै पासै अेक चार तल्लै रो टावर बणायो । उणरै हरेक तल्लै माथै चार रैवास हा, मतळब अेक टावर में कुल सोळै रैवास । लारलै चार-पांच बरसां में औड़ि केर्दै नूंवा टावर त्यार हुयग्या । अब तो नामी ठेकेदार इण पेटै लूंठी योजनावां सागै आयग्या । नौकरी-पेशा लोग जमीन लेय 'र घर घालण में रुचि कम लेवै । इणीज कारण नूंवै टावर रो पाइयो लागै, उणरै सागै आगूंच बुकिंग हुय जावै ।

म्हारै मन में आई के किणी चोखी सोसायटी में पेसगी देय 'र सिर लुकोवण सारू छात रो बंदोबस्त कर लेवूं । जोड़ायत सूं बात करी तो बण सदां दांई “थे जाणो” कैय 'र माळा म्हारै गळै में घाल दीवी । बापूजी रैया कोनी अर टाबर म्हारी दीठ में औड़ि बातां सारू हाल टाबर ई हा । छेकड़ गांव में रैवण वाळा काकोसा सूं बात करी । बै पुराणा आदमी हा । फ्लैट आलो हिसाब बंरै भोगै कोनी पळ्यो, “जमीन लेय 'र मकान मांड बेटा । औ फ्लैट आपणै कांई काम रा ? नीं धरती आपरी, नीं आभो । जमा पूंजी खरच 'र अधबिचाळै टंग्योड़ा रैवो—चमचेड़ दांई ।”

गतागम में उळझ्योड़े अेक दलाल सूं बात कर लीवी । बण केर्दै सौदा दिखाल्या । अेक नूंवै बणतै टावर रो हिसाब-किताब म्हनैं सावळ लाग्यो । फेर तो बण नित फोन करणा सरू कर दिया, “जोरदार मौको है भाईजी, चूको ई मत । कुल चौर्दहस फ्लैट रो टावर है जिणसूं चवदै री तो आगूंच बुकिंग हुयगी । राज्य बजट पछै दस फीसदी कीमत बध जासी ।”

म्हारी नींद गिगनारां जा चढी । मन री पाटी माथै मांडूं-डोवूं । कर्दैई बैंक-डाकघर में जमा अफडी-आरडी री पूंजी नै जोडूं तो कर्दैई लोन रो हिसाब फळावूं । आपरै घर री बात सोच 'र अंतस में झूरझरी-सी हुवै । नींद में घर रै नांगळ रा सुपना ई आवण लाग्या । फाडी फंस रैयी तो प्लॉट अर फ्लैट बिचाळै । कर्दैई लागै प्लॉट ठीक रैसी । मनमरजी सूं घर बणा लेसां । अेकर ढांचो खड़्यो हुय जावै, फेर टीका-टमका हुवता रैसी । कर्दैई लागै फ्लैट रो सौदो ठीक है । निरणै करणो महाभारत हुयग्यो । जियां कपड़ा रो दुकानदार आपरै साम्हीं बीस भांत रा थान खिंडाय देवै अर उणसूं अेक पोसाक रो कपड़ो छांटणो हुवै, ठीक वैडी ई गत । छेकड़ बसंत मास्टरजी चेतै आया । मास्टरजी कर्दैई म्हारै गांव री सरकारी स्कूल में भणावता । बै म्हारी गळी में ई भाडै रैवता । अबै बै राज री नौकरी पूरी कर 'र इण स्हैर में बसग्या । गुरुजी ई म्हनैं सही राय दे सकै । गुरु में कोई चमत्कार हुवै जद ई तो उणरो दरजो भगवान सूं ऊंचो कथीज्यो है । म्हैं वार-तिंवार गुरुजी सूं फोन माथै पगां लागणा करतो रैवूं । इण बार म्हैं बां सूं बगत लेय 'र अरु-भरु मिलण मत्तै पूग्यायो । म्हारी राम-कहाणी सुण 'र बै केर्दै ताळ मून रैया । म्हैं सोच्यो कै बै प्लॉट अर फ्लैट रै नफै-

नुकसाण नै फलावता हुवैला । जद बां आपरी मनगत परगासी तद विचारणा सारू ऐक नूंवो बारणो खोल दियो ।

“थूं क्यूं तो प्लॉट लेवै अर क्यूं फ्लैट । म्हें थनैं स्हैर री ठावी ठौड़ चोखो मांड्यो-मंड्यो घर दिराय देवूं ।”

“कठे ? कीमत कांई हुवैला ?” म्हें अचंभो हुयो कै कठैर्इ मास्टरजी रिटायर हुयां पछै दलाली तो नीं सरू कर दीवी ।

“जठे थूं अबार बैठ्यो है । हां, औ म्हारलो घर । कीमत बजार में ठाह कर लेसां । औ घर म्हें ऊधो रैय 'र बणायो है खुद सारू । ईंट-सिम्मट सगळी ऐक नम्बर लागेडी है ।” बां कैयो ।

“पण गुरुजी आप सात-आठ साल पैलां घर बणायो, अबै बेचो क्यूं ?” म्हारै कारण समझ में नीं आयो तो सीधो पूछ लियो ।

“बेचूं नीं तो कांई करूं ? बेटी ब्याह पछै आपरै सासरै गई अर बेटो हैदराबाद में नौकरी करै । बै बठै भाड़ो भरै । म्हें डोकरो-डोकरी दो अठै रैयग्या । अठै जीव लागणो अबखो हुयग्यो । बेटो-बहू हैदराबाद बुलावै । पोतो-पोती रोज वीडियो-कॉल करै । छेकड़ली उमर टाबरां में रैवण रो मत्तो है, सो इण घर री बिकवाळी काढी है ।”

“तो बेचो क्यूं ? इणनै भाड़े दे देवो अर थे बेटै कनै चल्या जावो ।”

“भाड़े देय जीव नै कांस मोल लेवणी है । जकै घर नै जीव दाँई राख्यो है उणनै किणी नै भोव्यावणो जचै कोनी । बियां भाड़े भरोसै तो लागत रो ब्याज ई कोनी मिलै । इण रा सावळ दाम उठ जावै तो बठै कोई घरू छात री बिध बिठावां । लूठै नगारां में घर खरीदण सारू भारी बजट चाईजै । थूं लेवै तो पैल थारी, नींतर म्हें तो बीजो गिराक मिल ई जासी ।” बै बोल्या ।

“ठीक है । म्हें घरै सल्ला कर 'र बतासूं ।” म्हें बात नै निवेड़ण सारू कैयो ।

पाढो घरै आवतां म्हारै मन में ऐक नूंवी कथा सरू हुयगी । बापूजी ढाणी में कोनी रैया, गांव में घर घाल्यो । म्हें गांव में कोनी बस्यो, स्हैर आयग्यो । कांई म्हारा लाडेसर इण छोटै स्हैर में जी धपावैला । कठैर्इ दस-बारह बरसां पछै म्हें ई म्हारै घर री बिकवाळी तो नीं काढणी पड़ैला । जे इयां ई है तो भाड़े रैवणो कांई माड़े है ।

आथण जीमण पुरस्तां जोड़ायत फिलम नै पाढी सागण ठौड़ खींच लेयगी, “बो गीजर कद आसी ? थारी जोड़-बाकी अजै पूरी हुई का कोनी ? इयां कींकर पार पड़सी म्हारा रामजी ! गीजर नीं तो बिजळी वाळी राड़ ई ला देवो, जको तातै पाणी रो सुभीतो तो हुवै ।”

◆◆



डॉ. मनमोहन सिंह यादव

गायां रो गवालियो

कासियो बरस पचासेक रो। काछ तांई धोती पैर। माथै पर अबार अेक खाकी रंग रो बोदो अर बीत्योड़ो साफो। ओछी गोड़ी रो मिनख। मोडकी गाय हमेसा बैड़की लागै। ओछी गोड़ी रै कारण बीं री उमर नीं लखावै। डौल सारु मूळ्यां भी राखै, तो वार-तिंवार बां माथै बट भी लगावै। बोलण में तेज अर तरखर। पशुवां नै चरावण रो सागीड़ो कारीगर है कासियो।

चौमासै में जद भी आभै सूं पाणी बरसै अर धरती फूटण लागै तो गांव री गायां नै अेक ठौड़ भेली कर 'र चौपो बणा लेवै। चौपो गायां रो इसो टोलो हुवै जकै में गांव री सुवावडी अर बाखडी दोनुं तरां री गायां हुवै। साथै बीं चौपै में दडूकता-ढींकता दो-च्यार गोधा भी हुवै, जका टैमसर चौपै री गायां नै धीणे करै। सुवावडी गायां ई चौपै में दिनूगै आवै अर आथण नै आपरै धणी रै साथै जाय 'र ठाण माथै खड़ी हो जावै। बाखडी गायां हमेशा चौपै में ई रैवै, जद तांई कै चौपो खिंडै नीं। औसकै जम 'र बिरखा हुई। सरबालै मेह बरस्यो। धरती फूटतां ई गांव में चौपै रो हेलो होयग्यो। धरती माथै जद लीलोतरी बापरी तो चौपो ई सरु होयग्यो। पैलै दिन ई कासियो बण-ठण 'र आपरै हाथ में तार सूं गूळ्योड़ो लांबो सोट लेय 'र चौपै रै बाड़ कनै आय 'र ऊभग्यो। बाड़े री भीत माथै कुंकुं रो साखियो मांड्यो। अेक-दो दिन तो गायां री छीड़ ही, पण पांच-सात दिनां पछै चौपो आपरी पूरी रंगत में आयग्यो। ई चौपै में अबार भांत-भांत री गायां है—सूधी अर स्याणी, मिजव्ही अर मरखणी, अचपव्ही अर अलाड़ी, हिरायवडी

ठिकाणो :

उदयरामसर

बीकानेर (राज.)

मो. 9460021851

अर चिमकोर। आं गायां में कोई मोडकी गाय है तो कोई खुड़की। कोई बंडगी गाय है तो कोई मोटै सींगां री। केई गायां तो इसी है जकी आपरे थणां नै खुद ई चूंघलै। कासियो बां गायां रै मूढै माथै छींकी बांध्योड़ी राखै, नींस तो आथण नै टोगड़िया-टोगड़यां भाटै नै चूंघसी काई? चौपै में इककी-दुककी इसी गायां भी है जकी भूखी नागण दाँई सैंग दिन आपरी जीभ नै लपलपावती रैवै। ठावा मिनख बीं गाय नै सांपण री संज्ञा देवै। ई चौपै री सुवावड़ी गायां सैर-अच्छेर दूध सूं लेय'र पांच सैर ताँई अेक टंक रो दूध देवै। चौपै में अबार गोधा भी भांत-भतीला है। केइयां रा सींग मोटा है तो केइयां री थूही मोटी है। केई मरखणा है तो केई सीधा भी। गायां भी भांत-भतीलै रंग-बरण री है। काली, कबरी, चितकबरी, राती अर धोली। अबार ई चौपै में दो गोधा तकड़ा है। अेक काल्यो गोधो है अर दूसरो रातियो। दोनूं गोधा घणखरी बार आपस में लड़त मांडलै।

कासियो गांव रो पुराणो गवाल्यो है। आपरी आधी जून ई चौपै में ई पूरी कर दी है। हाथ में हरमेस लांबो सोट राखै, पण बो आज तक पशु री पीठ माथै अेक भी सोट नीं बाह्यो। मिज़ले अर मरखणै पशुवां कानी डांग उबकावै जरूर है, पण बो आपरी तेज अर तरखर आवाज सूं ई कांटो काढ लैवे। बीं री आवाज इत्ती तेज है कै जद बो किलकारी मारै तो चौपै रा सग़ा पशु चौकन्ना होय'र पलटण रै फौजी दाँई अटेंसन में आ जावै। चौपै में पशुवां नै चरावतै कासियै नै अणबोल आणंद आवै। कासियो तो पूरो रो पूरो ई पशुवां में जाणै रमग्यो है। आं पशुवां खातर बो खुद नै जाणै अरपण ई कर दियो है। चौपै री गायां नै रिझावण खातर चौपै री गायां रा भांत-भतीला नांव थरप राख्या है। किणी गाय रो नांव चम्पा है तो किणी रो चमेली। किणी रो नांव राधा है तो किणी रो रजिया। किणी रो नांव लैला है तो किणी रो मरवण। औ गायां इत्ती ट्रेंड होयगी है कै नांव लेवतां ई बै कासियै कानी ढींकण लाग जावै। पण सायरां कैयी है कै अेक मिनख रो अणबोल आणंद दूजै मिनख नै दूसरो मिनख आपरे पांग में लेवण री कुबध सरू कर देवै।

अबार कासियै रो आणंद भी बीं रै पाड़ोसी धरमियै रै खातर मोटी अबखाई बण्योड़े है। बींनै देख'र बो मांय रो मांय भुसवीज रैयो है। ईसकै री आग में भुसवीजतो धरमियो छैकड़ गांव रै अेक खोटै अर खोड़ीलै पंच मुगानीराम कनै जाय'र बोल्यो, “पंचां! कासियै नै पशु चरावतां बो’छा दिन होयग्या है। अबै म्हनै ई मौको देवो। म्हैं थांरी गायां नै मुफत में चराय देसूं। चौपै नै चरावतां गांव री रोही में जे कोई रुली-खुली गाय मिलगी तो बीं गाय नै लाय'र थांरी बाखल में बांध देसूं। पण अबै कासियै रो पाप काटो अर म्हनै चाकरी करण रो मौको देवो। म्हैं तो थांरो दास हूं, थांरो चाकर हूं।”

मुगनीराम बोल्यो, “थूं फिकर मत कर, केई दिनां सूं म्हरै मगज में ई आ बात आयोडी है। जे लय लागी तो सवारै बींरो डोरो कर देसूं।”

आगलै दिन दिनगौं ई मन सुवावतो बायरो बाजै हो। पूरबली पून रै फटकारां सूं कासियै री काया हरी हुवै ही। बीं री काया रै रूं-रूं में सोराई बापरगी। हाथ में लांबी डांग लियां बागड़यां रै बाड़े री फाटक रै बारै ऊभो बीड़ी खींचै हो अर चौपो उछेरण री बाट में हो। इत्ती ताळ में अचानचक सींगां में जेवड़ी घाल्यां मुगनीराम ऐक गाय नै लेय आयो। कासियो जद बीं सूं रामरमी करी तो बो बोल्यो, “सुवावड़ी गाय है। आथण नै लेय जासूं।”

कासियो बोल्यो, “ठीक है सा, पण थांनै ठा हुवैला कै सुवावड़ी गाय रा दोय सौ रुपिया है, महीनै रा।”

मुगनीराम बोल्यो, “रुपियो तो म्हैं थनै ऐक ई कोनी देऊं।”

कासियो बोल्यो, “मालकां, आ कांई बात करी? म्हरै ई लारै टाबर है, बांनै भी भूख लागै?”

मुगनीराम बोल्यो, “बांनै भूख लागै या तिस्स, बा थूं जाणै। म्हैं तो थनै ऐक कोडो ई देवाळ नी हूं। गांव री आखी जमीन म्हरी अर म्हरै बाप-दादां री है। थनै झख मार’र ई गाय नै चरावणी पड़सी।”

कासियै नै झाल तो घणी ई आई, पण मांय रो मांय बीं झाल नै पीवतो बोल्यो, “ठीक है मालकां, थे जमीन रा धणी हो, ई सारू आपसूं ऐक कोडो भी नीं लूं, पण आथण नै गाय नै लेय जरूर जाया।”

आपरी गाय रै सींगां सूं जेवड़ी काढतो बो बोल्यो, “कासिया, ध्यान राखजै! जे गाय रै हाथ ई लगा लियो तो थूं थारी चंद्रमा सोच लियै। म्हैं दूसरै खाखै रो मिनख हूं। सावचेत रेयी। नीं तो धंधै सूं हाथ धोय बैठलो।”

मुगनीराम री बात सुण’र कासियो कीं नीं बोल्यो। मनोमन सोच्यो—स्यात घरआळी सूं लड़’र आयो है। हरि-सुमरण रै टैम भी कब्बो अर कुसरो बोलै। मगनीराम रै गयां पछै कासियो बीड़ी सिल्गाई अर बींरो धूंको काढतो चौपै नै उंछेरियो ईज हो कै ऐक गाय अचानचक चौपै सूं अळगी छिटक’र भाजण लागी। बीं गाय नै भाजती देख’र बो ई लारै भाज्यो अर आडफेर देय’र बीं गाय नै पूठी चौपै में घाली। बस्ती सूं बारै निकल’र चौपो जद गांव री गोचर में पूर्यो तो सगळा पशु जमीं माथै मुंह मारण लाग्या। गोचर में भांत-भंतीतै घास सूं जबरी लीलोतरी बापरोडी ही, पण अणांत में पसस्योडै गंठियै घास री लीलोतरी तो इन लोक सूं परबारै री लीलोतरी लागै ही। ई गंठियै में ऊभा च्यार-पांच

गधा ढेंचू-ढेंचू करता टिडक्या करै हा। पण जद चौपै नै नैडो आवतो देख्यो तो बै मत्तै ई परियां सिरकग्या अर मनोमन बोल्या, “आवो मालकां, ई गोचर में पैल थांरी है, म्हांरी गिणती तो थानिया-भगानिया में ईज हुवै है। चौपै रा पशु निरवाळा होय र जद लीलै में मुंह मारण लाग्या तो अेक झाड़ रै कनै बैठर कासियो सिरावण करण लाग्यो। रोटी रो पैलो कवो ई लियो हो कै बीं देख्यो, दो रतौर झाड़ मांय सूं लड़ती-झगड़ती बारै निकली। जद बै केर्ई देर ताँई गुत्थमगुत्थी करता रैया तो कासियो मुळकर सोचण लाग्यो—लागै है, आज दिनूगै-दिनूगै ई महाभारत मांडली है। सिरावण करतो-करतो बो केर्ई ताळ बांरी लड़ाई देखतो रैयो। छेकड़ हार-थकर बै दोनूं जोधा पूठा ई झाड़ में बड़ग्या। सिरावण करस्यां पछै कासियो चौपै नै आगीनै टोरण लाग्यो। जद चोपो गांव री ओरण में पूग्यो तो बठै पशुवां नै फुरवां अर टाळवा जीमण मिलण लाग्या। बैकर, लांपड़ी, भुट, कांटी अर बांठां-झाड़ां रै बिचालै ऊभी सैवण अर धामण घास री पसरती लूबर भी मिली। आ लूबर डांगरां खातर रसगुल्ला अर रसमळाई ईज है। पेट में आधार आयां पछै धरती रा सै जीव चेतन होय जावै। अेक गोधो अेक ठोड़ ऊभो-ऊभो ई जोर सूं दडूकण लाग्यो हो। जद बो केर्ई ताळ ताँई दडूकतो रैयो तो कासियो बीं रै कनै जायर बीं रै पूठै माथे जोर सूं आपरो हाथ मास्यो। गोधो अचाणचक इयां शांत होयग्यो जाणै उबलतै दूध में ठंडे पाणी रो छींटो मास्यो हुवै। धूंवै दोपारै रै टैम अेकै कानी काळियो अर रातियो दोनूं गोधा अेक-दूसरे रै साम्हर्ण तणर खड़ग्या हुयग्या अर खेंखुर करण लाग्या। साथै ई अेक-दूसरै नै देखर जोर सूं दडूक्या। बां दोनां री पैलवानी नै देखर कासियो सोच्यो—ई दारासिंघ अर किंगकांग दोनां नै शांत करावणा पड़सी, नीं तो चौपै रा सगळा पशु रैफरी बण जासी। बां दोनूं गोधां रै बिचालै जायर कासियो अेक-दूजै कानी सोट उबकायो अर बांनै बठै सूं अळगा कर्या। बां दोनां नै ठौड़सर करर कासियो चौपै नै तवाब कानी टोर दियो। गोसाणो तवाब पाणी सूं काठो भस्योडो हो। पालर पाणी नै देखतां ई पशु आप-आपरा मोरचा संभाल लिया। केर्ई पशु पाणी में ऊभा-ऊभा ई सुस्तावै हा अर केर्ई तवाब रै कनै ऊभा रुंखड़ां री छिंयां में जाय बैठा। घणी ताळ पछै सुस्तावतै पशुवां नै उठाया अर बांनै चौपै रै दूजै पशुवां रै साथै गांव कानी टोर दिया।

बावड़ती बगत अचाणचक मुगनीराम री गाय पुनमै किसान री पौळछ में कूदगी। बीं गाय नै पौळछ में देखर पूनमो जद बींनै घेरण लाग्यो तो बा साम्हर्ण सींग कर्या। बीं रै सींगां सूं बचतो पूनमो पसवाड़े हुयो अर पछै गाय रै लारै भाजर अेक सोट बीं रै मौरां पर बरपायो, जणै कठैर्ई जायर बा गाय खेत सूं बारै निकली। ई रण नै देखर कासियै रो माथो ठंकग्यो। बो पूनमै नै कैयो, “लागै, आज तो राड़ होसी। म्हनै लागै मुगनीराम ई

गाय नै चौपै में पाटी पढा'र ई भेजी है। कै पैलां थूं कुबध कस्तै, पछै म्हें देख लेसूं। थनै ई रै सोट नीं मारणो हो भला मिनख।”

बो बोल्यो, “जे नीं मारतो तो आ पूठी फिर 'र महनै सींगां में पोय लेंवती। जे आज बात उठी तो म्हें मुगनीराम नै कैय देसूं कै सोट म्हें मास्यो है।”

पूनमै सूं बात कर 'र कासियो अणमणो होयग्यो। बो होळै-होळै चौपै नै गांव कानी टोरेण लायग्यो। सोट रै फिकर में केई बीड़यां ई फ्रूंक दी ही। आथण नै जद सूरज बिसूंजण में बिलांद-अेक रैयग्यो तो चौपौ रुणझुण-रुणझुण करतो गांव पूग्यो। गांव बस्यां सूं पैलां ई मंगता आ जावै, बियां ई चौपै रै पूग्यां पैलां ई मुगनीराम बागड़यां रै बाड़े कैने रासण-पाणी लेय 'र ऊभो हो। बो आपरी गाय नै औडी सूं लगा'र चोटी तांई देखी। छैकड़ बीं रै मनचंती होयगी। गाय रै मौरां माथै सोट री लील पाधरी निंगे आवै ही। गाय रै मौरां माथै सोट रो सैनान आंधै आदमी नै ई दीखै हो। बीं चोट नै पंपोळ'र मुगनीराम बोल्यो, “कासिया! थूं तो थारली कर ली नीं? म्हें थनै पैलां ई बरज्यो अर बकास्यो हो कै म्हारी गाय रै हाथ ना लगायै, पण थूं तो हाथ काई, ई रा हाड ई तोड़ नाख्या। म्हारै सूं खेबी करणी थनै घणी मूँधी पड़सी। थूं गवाळियो है कै कसाई?”

कासियो गिडिगिडायो, “मालकां, म्हें म्हारी आस-औलाद री सौगन खाय 'र कैऊं कै म्हें थांरी गाय रै मौरा पर सोट नीं मास्यो। थांरी गाय जद पूनमै बेलदार री पौळ्य में कूदी जणै बो सोट री मारी। थानै ठा है, आज पैलो दिन हो। जे थे म्हनै बताय देवता कै म्हारी गाय हिरावडी है तो म्हें बीनै बिचाले राखतो अर बीं रै गळे में टोकरी भी घालतो। आगै सूं थांरी गाय रो पूरो ध्यान राखसूं।”

मुगनीराम बोल्यो, “अबै आगै सूं तो ध्यान थूं काई, थारो कोई और भाई ही राखसी।” लाल-पीछो होय 'र मुगनीराम बठै सूं आपरी गाय रै सींगां में जेवड़ी घाल 'र आपरै साथै लेय ढळ्यो।

रात नै गांव रै गवाड़ में पंच भेला हुया। बठै कासिये नै भी बुलायो। बठै बैठ्या सगळा पंच मुगनीराम रा पट्टा हा। मुगनीराम बोल्यो, “सुणो पंचां! म्हें आज ई म्हारी सुवावड़ी गाय नै चौपै में घाली ही अर आज ईज कासियो चानणो कर दियो। म्हें ई नै घणो ई पाल्यो, घणो ई बरज्यो हो कै म्हारी गाय रै हाथ ना लगायै, पण पैलै ई दिन औ म्हारी गाय रै मौरां माथै सोट मार 'र बापड़ी री चामड़ी उधेड़ नाखी। पीपळ रै गङ्टै कैने गाय ऊभी है, जे किणी पंच नै संसै है तो गाय रै मौरां माथै हाथ लगा'र देख लो। हाथ कंगन को आरसी क्या अर पढ़े-लिखे को फारसी क्या?”

अेक पंच बोल्यो, “बोल भाई कासिया! काई बात है?”

बो बोल्यो, “मालकां, महनै बीस साल होयगया चौपैरी गायां नै चरावतां, आज तांई अेक भी ओळभो नॊं आयो। बीस सालां में आज पैली बार ओळभो आयो है। म्हँ माफी चाऊं, पण आंरी गाय रै सोट म्हँ कोनी मास्यो। पूनमै बेलदार रै खेत में जद आंरी गाय कूदी तो बो सोट री मार दी। आंरी गाय हिरावडी है। जे औ महनै पैलां कैय देंवता तो म्हँ आ नौबत ई नॊं आवण देवतो...।”

मुगनीराम बिचाळे ई बोल पड़यो, “कासिया! थूं तीसरै घरां राड़ मत घला। चौपैर में गाय घाल्यां पछै जिम्मेदारी थारी हुवै। म्हँ ना तो पूनमै नै जाणूं अर ना किणी और नै, सरासरी गढ़ती थारी है। इसो काम तो कसाई ई कोनी करै।”

पंच बोल्यो, “मुगनीराम, अबै थूं काई चावै?”

बो बोल्यो, “म्हँ तो चाऊं कै काल सूं कासियो चौपैर में नॊं जावै, बस।”

पंच बोल्या, “बोल भाई कासिया, अबै काई करणो रैयौ? कसूर तो सगळो थारो ई है।”

कासियो बोल्यो, “म्हँ काई बोलूं मालकां, जद पंचां री पंचायत महनै ईज कसूरवार मान लियो है तो काल दिनौं सूं कोई दूजो काम पकड़सूं।”

पंचां री मून हामळ रै पछै कासियो बठै सूं उठर ब्हीर हुयगयो।

दूसरै दिन कासियै रै बिना चौपो मोड़ो उंछस्यो अर आथण नै जद गांव में पूर्यो तो आखै गांव में चौपैरी री खराब हालत री खबर लागी कै आज चौपैरा सगळा डांगर डावांडोल हुयगया हा। किसानां री पौळछां में दिनभर कूदता रैया। दो गोधा तो आपस में इसा लङ्घ्या कै बीं लड़ाई में अेक गोधै रो सींग ई टूटगयो।

अब गांवआव्हां नै ठा लागयो कै आं लखणां तो औ चौपो ज्यादा दिन नॊं चाल सकै। जद ई बात रो ठा गांव रै मुखियै मास्टर मातादीन नै लाग्यो तो बो कासियै नै बुलायो अर बीं सूं सगळी बात पूछी अर पछै बोल्यो, “थूं तो सवारै सूं चौपो संभाळ। जकै मिनखां नै मूँढो धोवण रो सऊर नॊं है, बै ई गांव में पंचायती छमकै? गांव में बांदरा नॊं, मिनख भी बसै। अबै देखसूं कै ई गांव में इसो-किसो भीम है, जको थारो हाथ झालर थनै चौपैर सूं बारै कर देसो।





ललित शर्मा

चुगली रो चक्कर

अेक गांव में लुगायां अनाज उगावण ताईं खेतां में मोकळी मैण्ट करती। बै खेत में हळ जोतती, ट्रैक्टर चलाती, खाद गेरती। खेतां नै कीड़ा-मकोड़ा अर जीव-जिनावरां सूं बचावण नै, चोरां सूं बचावण नै मोकळी हाजरी बजाया करती। कणै-कणैई खेतां में रात नै रुक भी जाया करती। चौका-चूल्हा रो सगळो काम सलटा'र, घर रो सगळा काम निवेड़यां पछै बै खेतां में बैठी अनाज री कमाई रो मोकळो हिसाब करण में बावली हुयोड़ी रैवती। बै ई काम वास्तै न तो मजूर राखती अर न अनाज उगावण में चोखी सलाह लेंवती। बाँनै न अनाज उगावण रो अनुभव हो अर न खेतां री सलाह लेवण नै कठैई आवती-जावती। रुपिया बचावण रो, रुपिया भेठा करण रो पण बाँनै मोकळो ग्यान हो। बस, कमाई सारू रात-दिन मोदीज्योड़ी रैवती। अेकली काम में लाग्योड़ी रोजीना गांव में पईसा बचावण री दुंडी पीटती रैवती।

बीं गांव में अेक बापड़ो बूढ़ो गरीब आदमी रैवतो। बीं नै खेतां में अनाज उगावण रो मोकळो ग्यान हो। बो आपरी सलाह बिना पईसा दिया करतो। सलाह देवण री कोई फीस भी नीं लेंवतो। बो ई काम सारू हमेस त्यार रैवतो। लोगां रा खेतां में आया-जाया करतो। बीं री नेक सलाह सूं खेतां में लोगां रै मोकळो धान हुंवतो। अबै बो खासो बूढ़ो हुयग्यो हो, पण फेरूं ई लोग बीं सूं सलाह लेंवता। पण गांव री बै लुगायां बीं सूं कदैई सलाह लेवण नै नीं आई। बै बीं नै कीं कोनी समझती ही। जदकै सरकारी अर गैर सरकारी संस्था में बो अेक अनाज उगावण रो चोखो सलाहकार मानीजतो हो। सगळा अधिकारी तकात बीं री

ठिकाणो :

Borpukhari Road
Khalihamari
Dibrugarh-786001
(ASSAM)
मो. 9435032650

बात नै मानता । दूजे प्रदेसां रा लोग भी बीं नै बुलावता हा । बो बिचारो अनाज उगावण रा नुस्खा भोत आछै तरीकै सूं समझावतो । बीं री बातां में दम हुंवतो । बंजर भूमि में भी अनाज उगावण री विधि उण कनै ही । इणसूं केरइ बंजर भूमिवाळा ई बीं री सलाह सूं अनाज उगावण लागगया । बो सलाह देवण रो टक्को ई नीं लेंवतो । सागै ई खेतां में पौधरोपण ई सलाह देंवतो ।

गांव रा कीं चुगलखोर लुगायां नै बीं बूढै रै बाँरे में भड़का दियो । अेक दिन बै सगळी लुगायां बींनै बुलाइ पूछण लागी, पण बूढो बिचारो कीं नीं बोल्या । बो मून धास्यां सो-कवुं सुणतो रैयो । आपरी नाड़ नीची करस्यां राखी । बीं टैम ई खेतीबाड़ी रा पुरस्कार देवणिया गांव में आयोड़ा हा । बानै बेरो पड़यो तो बै आया अर बोल्या, “चुगली रै चक्कर में खेतां रा बंटाधार हो रैयो है, इब तो बचो ! औ बूढा कोनी, खेती रा विद्वान आदमी है । आनै पूजो । चुगलखोरां नै पूज्यां तो घाटो-घडियो ई रैवैलो । पेड़ उगायां बिना खेतां में चोखो अनाज होय ई नीं सकै ।”

अबै बां लुगायां नै अक्कल आई । बै बीं बूढै मिनख आगै हाथ जोड़र बिलखती बोली, “म्हानै माफ करो । म्हे तो विद्वान आदमी री कदर करणी ई छोड दी । आपरै कारण आपणो गांव दुनिया में आपरो नाम राखै । म्हें म्हारो खूंटो ऊंचो राखण नै चुगळी-चाल्वाळा रो सागो दियो । पण अब म्हानै चेतो हुययो है ।”

अबै रुंख लगावण अर ग्यानी आदमी री सलाह सूं बां लुगायां रै खेतां में भी मोकळो अनाज निपजण लागयो ।

सेठजी रो त्याग

अेक सेठजी नै कोरी कमाई चोखी लागती । जे कारोबार में मुनाफो नीं हुवै तो बिसै काम कानी बै झांकता ई कोनी । रुपियां रै वास्तै सारी-सारी रात जागता रैवता । लालच में बावळा-सा इन्है-बिन्है डोलता फिरता । अेक दिन सेठजी अेक गुरुजी री कुटिया में गया । गुरुजी री धोक खायर बांरी सेवा करी अर आसीस लीनी । गुरुजी भोत राजी हुया । सेठजी, गुरुजी नै खुद रै व्यापार री अर कमाई री सारी बातां बताई । गुरुजी भी सेठ री बातां सुणर भोत राजी हुया । बै बोल्या, “समै रै गेल थारै मोकळी कमाई होसी । चोखो चालसी थारो व्यापार । थूं चिंता मत कर । म्हें भी भगवान सूं अरदास करसूं कै तत्रै चोखी कमाई देवै ।” पछै गुरुजी चुप्पी साथ ली ।

सेठजी गुरुजी री बातां सुणर भोत राजी हुया । बीं टैम सेठजी री निजरां कुटिया रै मांय पड़ी । सेठजी पूछ्यो, “गुरुजी, कोरो अेक कमंडळ, अेकचटाई, अेक रुद्राक्ष री

मात्रा ! आ के जिंदगी जियो हो थे ? थांरी कुटिया में बरसात रो पाणी नीं टिकै, घर टपकै । सोध्यां जीमण नै चार बरतन थाँरै कनै कोनी लाधै । पण थे चिंता ना करो गुरुजी, म्हँ आपै सुखद जीवण री सगळी व्यवस्था कर देस्यूं । थे तो म्हनै कमाई री नूंवी-नूंवी बातां बतावता रैया, जिणसूं कै म्हारो जीवण संवर जावै ।

गुरुजी बोल्या, “बेटा, ई ग्यान रै वास्तै थनैं थोड़े धीरज धारणो पड़सी । थनै कमाई चाईजै तो अेक काम और करणो पड़सी । ई सूं थनैं भोत सुख मिलसी । रुपियां ऊपर सोवण री व्यवस्था हो जासी । रुपियां री परत बिछ जासी । पण ई सारू थनैं अेक बरस ताईं मोकळो त्याग करणो पड़सी । म्हरै जियां ई रैवणो पड़सी । थूं कर सकै तो सोचलै ।” पछै सेठ नै कनै बुलाय 'र गुरुजी कैयो, “म्हरै कनै अेक मंतर है, बीं नै जपण सारू थाँरै कनै सोनै-चांदी अर हीरा-मोती री सागै नगदी री भरमार हो जासी । कोई चीज री कमी नीं रैवैली ।

सेठ बोल्यो, “इसो मंतर तो म्हनैं अबार रो अबार बतावो गुरुजी ।”

सेठ पईसा रो लालची हो । गुरुजी कनै रैवण रो धरम तो निभा लियो । केरई महीना बीतगया । गुरुजी भी सगळा मंतर सेठ नै बता दिया अर बीं नै कैयो, “अबै थारो काम बणग्यो, थूं जाय सकै है ।”

सेठ री आंख्यां में आंसू आयग्या । गुरुजी री आग्या पछै सेठजी बोल्या, “गुरुजी, म्हँ रुपियां रै चक्कर में जिंदगी रो रिश्तो भूलग्यो । परिवार-समाज नै त्याग दियो । पण म्हनै थांरी कुटिया में अेक बरस भोत सौरी नींद आयी । म्हनै रोजीना धन-संपत्ति अर रुपियां री हायतौबा कोनी चाईजै । म्हारी तो जिंदगी थाँरै पाण बदल्गी । म्हँ तो बच्योड़ी जिंदगी आपरी सेवा में लगा 'र ई आनंद लूटसूं ।”

सेठजी अबै धन-माया रो मोह छोड 'र आपै आनंद री बातां सगळां नै बतावण लाग्या हा । गुरु-कुटिया में रैवण सूं बांरी जिंदगी सफळ होयगी ।

◆◆



अनूदित लघुकथा



कमल कपूर

उत्थो : विमला नागला

चार लघुकथावाँ

करवा चौथ

करवा चौथ रा पैलाणा दिन, म्हे सगळी भायल्यां गवाड़ी रै बिचाळै बैठी उणनै उडीकै ही। आज रै दिन बा हर साल घुड़लियो भर'र औडी रूपाळी-रूपाळी, सुनहरी काच री चूळ्यां, मैन्दी, अंकदम चटक लाल सुर्ख सिंदूर री ढब्बी अर सुहाग-भाग रो घणकारो सामान लावती अर कोई घंटा-आधघंटा मांय ई बेच'र राजी-खुसी सगळ्यां नै आसीसती थकी खाली घुड़लियो लेय'र पाळी बावड जाती।

वाह! उणरो ठसको भी सरावणजोग हो। औडो गैरा रंग रो चमकणिया छोट्यार घाघरा-पोलका पर गोटादार ओढणी ओढ्योडी, हाथां मायं पुणचा-सूदी रंगीन चूळ्यां खणखाती, सांवळा चौड़ा लिलाड पर आ चवनी जैडी लूंठी टीकी लगा'र पूरी मांग में सिंदूर भर'र पान सूं रंगोडा होठां पर मुळक बिखेरती, पगलियां में पाजेब झणकाती जियां ई आवती, उणनै देखतां ई म्हे सगळी हारसिंगार जियां खिल जावती ही।

उणरो नांव भी तो औडो रसीलो हो कै मूँडै पर आवतां ई मिसरी ज्यूं मूँडै में घुळै हो। पण बा अबै ताईं आई क्यूं कोनी? सगळा रै मूँडै पर औ ईज सवाल हो, जिणरो पडूतर गळियारा में खिलता टाबरां रा हाका-हेला—“भागभरी आयगी! भागभरी आयगी!” अर इत्तै में तो बा नेम साम्हीं ई आयगी।

ठिकाणो :
15, दिव्यांशालय
राजपुरा रोड, केकडी
(अजमेर) राजस्थान
मो. 9214960689

पण औं काई! म्हारा तो पगां तळां री जर्मीं ई सिरकगी। काठी धूजगी म्हैं। अेकदम मैली-सी काळा पाड़ वाळी साड़ी पैरियोड़ी, बिना बोरला रो माथो अर सूनी मांग, रीता हाथां उज्योड़ी-सी भागभरी साम्हर्णी ऊभी ही।

हे रामजी! कठै गई परी म्हारी ऊजली चांदणी-सी भागभरी। म्हैं तड़फती थकी पूछ्यो, “यो कदी अर कियां हुयो भागभरी?”

अेकदम फीकी फट मुळक सागै बा बुझ्योडै सुर में बोली, “सुगनां री बेळा मांय काई भी मत पूछो बाईसा, आओ बाइयां! चूऱ्यां पैरो।” पण म्हारै अलावा कोई भी उणसुं काई कोनी लियो। थां सगळां रो सुहग भाग अमर रैवै री आसीस सागै बा भरियो घुड़लियो अर रीतो मन लियां गई परी बठै सूं।

उणैर जावतां ई सुधा जीजी तो म्हां पर बरस ई पड़ी, “थारो भेजो तो खराब कोनी होयग्यो जया? झट सूं पैरली चूऱ्यां उणसुं? अरे बा कुसुगनी है।”

“बस जीजी, थे अबै आगै काई मती बोलज्यो। भणिया-गुणिया होय’र भी औड़ी ओछी सोच है आप सगळां री। ठाकुर जी सूं तो डरपो। छोडो था लोगां सूं बहस करणो तो नेम बेकार है।” उणरी बात नै म्हैं रीस में काटती दुखी मन सूं बठै सूं आयगी।

करवा चौथ री सांझे म्हैं इणैर सागै बाजार में फळ-फूल, मिठाइयां अर सामान खरीदबा सारू पुराणी बड़ी बजरिया गई तो अेक ठौड़ घणकारी लुगाइयां रो झूमको देख’र उतावळी-सी भीड़ नै अेके कानी करती अगाड़ी बधी तो जाणै अेक सुख भरिया बायरिया री वैर हियै में बापरगी। जर्मीं पर बिछ्योड़े अेक चादरा पर करवा अर सिणगार रा सामान सज्योड़ा पड़्या हा। लाल फाल री पीछी साड़ी पैस्योड़ी, लिलाड़ पर चवत्री रै आकार री लाल टीकी लगायोड़ी, पान चबाती थकी मुळक-मुळक’र अेक बाई नै चूऱ्यां पैरावै ही भागभरी।

मॉडर्न

च्यारूंमेर फगत आ ईज बात ही कै अभय जी रा घरां घणी भणी-लिखी बीनणी आय री है, देखज्यो नौ-नौ ताळ नचासी। ...अर फेर बा टैम भी आयगी जणां नूंवी बींदणी आपरा बींद सागै अभयजी री डेली पर ऊभी ही सामां लेवण सारू।

अभयजी री घरवाळी उणनै लाड लडावती बोली, “लाडली! इण कळसिया नै ढोकर सूं पटकती थकी आपरा पगलियां नै इण घुळ्योड़ी कूळ्कूळ में भिगो’र जर्मीं पर उघाडती थकी मांयनै आयजा। जणां ईज अठै री माटी थर्नैं अपणासी।” पण बीनणी आपरी गाबड़ सूं साव नटगी अर माथो हेठै कर लियो।

“तान्या! मम्मी कैवै जियां करो।” बींद उणरो हाथ दबावतो थको मीठा-मुंदरा सुर में बोल्यो। पण बा तो नेम अगाड़ी ई कोनी बधी। अबै तो जाणै बायरे में बध-बधर बातां उछल्बा लागी।

“म्हैं तो पैलां ई कैयो हो कै छोरी घणी भणी-लिखी अर मॉडर्न है। आ तो जो न करै बो थोड़ो है।”

“अबार ई इसी है तो पाछै तो राम ई रुखाळो है।”

“बींदणी! म्हैं थानै जो कियो, बो करो।” अबै सासूजी नामेक तीखा अर ऊंचा सुर में कैयो, पण बा तो जाणै अंगद रा पग जियां ठाम रो ई राछ होगी।

अबै तो बींद भी थोड़ो रिसालू हुंवतो बोल्यो, “तान्या!”

जणां बा आपरी मून तोड़ती मिठास सूं बोली, “मम्मीजी! इण कब्सिया माथै गणेशजी मंड्योडा है, जका आपणा सैसूं पैलां पूजीजण वाला देवता है अर इणरै मायं भर्योड़ा धान में अन्नदेवता बिराजै है। पाछै म्हैं इणनै ठोकर कियां मार सकूं हूं अर जे आ कूंकूं पाणी रै मायं बुक्योड़ी है, बा म्हारी मांग मायं भी भर्योड़ी है। पाछै म्हैं इणमें पग कियां घालूं मम्मीजी आप ई बताओ सा?”

नामेक ताळ ताई बठै मून पसरगी कै छोरी नूंवै जमानै री मॉडर्न तो है, पण इणरी सोच समझ कित्ती ऊंडी अर गैरी है!

हीरा री कणी

“म्हैं तो घणी ई राजी हूं वीनू, थारी पसंद तो औड़ी फूठरी है जाणै चांदा रा देस सूं ई उतरर र कोई परी आयगी व्है आपणै घरां अर नांव भी तो कितरो मोवणो है—शैफाली। इण रो मतलब तो हारसिंगार रा फूल होवै न।” मां उण माथै निछावल हुंवती थकी कैवै ही, तो लाज सूं लजावती-मुळकती शैफाली झट सूं उणरै पगां लागगी।

“लाडली, थूं आ मती समझजै कै इणां नै कीं लोभ-लालच है... यूं ई पूछ रैयी हूं कै थारी तनखा कितरी है।” शैफाली ने लाड सूं कनै बिठावती पूछ्यो बा।

“जी, पैंतीस हजार।” ओकदम धीमा-मुंदरा भाव सूं बोली ही बा।

“पैंतीस हजार?” अचाणचक बा चमकगी, “पण वीनू, थूं तो कैवै हो कै पच्चीस हजार ई है। झूठ क्यूं बोल्यो रे थूं?”

“हो सकै, म्हैं गळती सूं कैय दियो होऊंला या आप गलती सूं सुण लियो हुवोला।” होचपोच हुंवतो वीनू कैवै हो तो बिचालै ई झट सूं शैफाली बोली, “हां सा, साची बात तो आ है कै ब्यांव सारू फगत म्हैं अेक सरत राखी ही कै म्हैं आपरी मां नै हर

महीनै दस हजार रुपिया देस्यूं, स्यात इणी वास्तै म्हारी सैलेरी कम होसी, विनय जी। पण म्हैं झूठ री नींव माथै आपरा घर री नींव कोनी बणा सकूं, मम्मीजी इणी वास्तै...”

“क्यूं देवैला थूं दस हजार रुपिया थारी मां नै?” वीनू रा पापा उणरी बात पर कतरणी चलावता थका बोल्या, “कांई थूं जाणै कोनी कै ब्यांव रै पछै छोरी री कमाई पर उणरे पीहर वाळां रो नीं, सासरै वाळां रो हक होवै... थूं...?”

“हां सा, जाणूं हूं, पण म्हैं जद चार बरस री ही, उणी टैम म्हारा पापाजी रामजी रै घरां परा गिरा अर म्हारी मां म्हनै किण भांत पाळ-पोस’र, पढा लिखा’र योग्य बणाई, आ कोरी म्हैं ईंज जाणूं हूं। अबै म्हारी टैम है। म्हैं चाऊं कै अबै बा काम नीं, फगत आराम ईं करै। अेकली टाबर हूं म्हैं उणरी अर बा अबै म्हारी जिम्मेवारी अर फरज है।” अेकदम ठीमर अर हर आखर नै नापती-तोलती बोली ही बा।

“अर जे म्हानै थारी आ सरत मंजूर नीं हुवै तो?” सीधैसट सुर मांय पूछ लियो पापाजी।

“तो पछै म्हैं औ ब्यांव कोनी कर सकूं।” अेकदम अंगद रा पग जियां अडोल हो शैफाली रो सुर।

नामेक ताळ तांई मून पसरगी। जे सींवणी भी पड़ जावै तो उणरो भी धमको सुणीजै बठै। नेम सून्याड़ बापरगी, जिणनै तोड़ती उणरी मम्मी बोली, “वीनू रा पापा, म्हैं चावै ही नीं कै बीनणी रै रूप माय म्हनै औड़ी बेटी मिलै, जिण रा पगलिया घर री डेल माथै पड़तां ईं रोशनी सूं घर चमक जावै।”

“हां-हां, जाणूं हूं। हीरा री कणी चावै ही। हीरा री कणी चावै रो गीत तो थूं बरसां सूं गावै ही।

“हां, अर बा हीरा री कणी म्हनै मिलगी जी।” शैफाली नै आपरी बाथां मांय भरती घणै हरख सूं मां बोली अर पापाजी भी झट सूं अगाड़ी बध’र उणरे माथै आसीस रो हाथ मेल दियो।

रोसनी रो घाट

आज पूरो महीनो-भर होयग्यो मम्मीजी नै गियां, पण मनडै री पीड़ जाणै कम ईं कोनी होवै ही। मम्मी तो अनुपम रा हा, पण म्हरै सारू तो जामण सूं भी बत्ता ईंज हा। उणां रै जिसी मिठबोली अर नेम ठीमरपणै री साव सीधी सासू तो म्हैं कदैई देखी ईं कोनी अर न ईं किणी री सुणी।

म्हैं आ भी कोनी कैय सकूं कै ठाकुरजी उणां नै घड़’र बो संचो ईं तोड़’र फेंक दियो, क्यूंकै उणां री लाडली म्हारा नणदल बाईसा भी सेम-टू-सेम उणां री टू-कॉपी हा अर म्हारी दोनूं बाइयां भी उणां री भांत ईं बणती जावै ही।

म्हँ पापाजी नै तो कदैई कोनी देख्या, पण मम्मीजी अर रिस्तेदारा सूं सुण्यो हो कै अनुपम तो सेम उणरी ई मिरर कॉपी हा। साची कैऊं तो म्हँ घणी भागवती हूं, जो इण घर में आई। मम्मीजी म्हनै घणा लाड लडाया।

अनुपम अर अवनि जीजी जणां साव छोटियाक हा, उणां रा पापाजी रामजी रै घरै गिया परा। अेक दिन म्हँ उणां सूं पूछ लियो, “मम्मीजी, जद पापाजी कोनी हा अर थे साव अेकला हा, पाढै थांग टाबरा री इतरी चोखी परवरिस कींकर करी ?”

“बेटा, म्हँ हमेस उणां री ओळ्यूं नै आपरी ताकत बणाई ही, कमजोरी नीं।” बै मुळकता थका बोल्या।

मम्मीजी लारला नामेक दिनां सूं अणमणा रैवण लागग्या। जणां म्हँ उणां नै घणी जोरी करती थकी इणरो कारण पूछ्यो तो बै नेम मंदरा सुर सूं बोल्या, “साची कैऊं तो विभा बेटा, अबै म्हँ भी थरै पापाजी रै कनै जावणी चाऊ।”

...अर पछै बै अेक दिन चोखी तरिया सूत्या अर पाढा कदैई कोनी उठिया।

घणा दुखी मन सूं उणां रो सगळो काज-किरियावर समाज री रीत-रिवाज मुजब निपटायां पछै उणां रो सामान जमावै ही कै अचाणचक उणां री अेक डायरी हाथां लागी। म्हँ औं तो जाणै ही कै बै कदै-कदैई डायरी लिखता हा, पण म्हारै मांय इतरी तो ईमानदारी ही कै कदैई उणां री डायरी नै कोनी पढी, पण आज खुद नै रोक कोनी सकी, क्यूंकै बा अबै फगत अेक डायरी ही कोनी ही, उण पूरी जून री कहाणी ही, जकी मम्मीजी-पापाजी रै सागै अर पाढै जीवी ही।

आंख्यां में आंसूडा भर्योडी म्हँ जद उण डायरी रा लारला पाना नै भणियो, जिणनै बै आपरी मौत सूं ठीक अेक दिन पैली ई लिख्यो हो... सुणो सा—


म्हँ औं तय कोनी कर सक रैयी हूं कै म्हँ अठै रैवूं कै थोरै कनै आ जाऊं? अठै तो आपणा अनु, विभा, अवनि अर टाबर है, पण बढै तो थे अेकला ईज हो, साव अेकला। अबै म्हनै ई थोरै कनै आय जावणो चाईजै। अठै तो आपणी विभा घर संभाळ लेसी, बा घणी हुंसियार अर स्याणी-समझणी है। डायरी रै इण छेहलै पानै रै अगाडी में दोय ओळ्यां मांड्योडी ही :

दूर धरा सूं गगन ऐ, रोसनी रो अेक घाट।

बरसां सूं बैठ्या बढै, थे जोय रह्या म्हारी बाट॥

म्हँ म्हारा आंसूडा नै बेवण दिया अर उठ'र मां री तस्वीर रै साम्हीं जाय'र ऊभी होयगी अर हाथ जोड'र बोली, “मां! म्हारै सारू तो रोशनी रो घाट थे ईज हो अर हमेस ई रैस्यो। कठै ई कोनी गिया आप। आप अठै ईज तो हो म्हारै कनै। म्हां सगळा कनै। म्हँ अगाडी बध'र झट सूं तस्वीर पर चढ्योडी माळा उतार दी।

◆◆



मनोहर सिंह राठौड़

मुथरा राम

अेकर आप सोच सको, औ काँई अपरोधो नांव हुयो—मुथरा राम ? पैलपोत सुणै जैकै नै अपरोधो लाग सकै । जका रोजीना औ नांव सुणै बानै अपरोधो नीं लागै । आ साची बात कै जिण घर में टाबरां री ओछत हुवै बठै औड़ा बांका-डोढा, बेमतलब रा नांव राखीजै । हरेक नांव रो कीं अरथ नीसरै । कीं नांव औड़ा हुवै जकां से कीं मुंह-माथो नीं हुवै । बस, टोटका रै रूप में राखीज जावै । होळै-होळै घर-गुवाड़ी अर गांव में बो नांव चावो बण जावै । हरेक री जबान माथै चढ जावै । बियां ई मुथरा रो नांव म्हारा आठ-दस गांवां में जाणीजतो । बां दिनां कमती साधन अर कमती ई पईसा हा । अठी-उठी जावण में आदमी पांच बार सोचतो । जेब रै हाथ लगावतो । गांव में ई रैवतो । पण अपणेस अणूतो हो ।

मुथरा नै साथी-संगल्लिया अर गांव रा कीं लोग घणी मसकरी री बगत मथुरा-कासी आओ ! इयां कैय बतलावता । बो हंसोड़ सभाव रो हो । हांसता थकां कैवतो, “ औ आया सा, लेवो तीरथां रा दरसण कर लेवो । ” हंसोड़ तो पैलै नंबर ई हो । हांसती बगत मूँडो खिल जाया करतो । बुगला री पांछ्यां जैड़ा धोळाधप्प दांत, गुलाबी मसूँड़ ऊपर चिमकता कोलगेट रा सांतरा विज्ञापन रा मोट्टारी री याद दिराय देवता । चौड़ी ओपतो मूँडो, सावळ संवारूयोड़ी मूँछ्यां, कानां में सोनै री मुरक्यां । माथै धोळो साफो । कान, नाक, होठ मोटा-मोटा अर मोटी चामड़ी रै प्याला जिसी सांतरी हांसती आंख्यां । उभरूयोड़ी चौड़ी छाती, पैलवान रै जियां कसीज्योड़ा बूकिया । चौड़ी कल्लाई रै बांध्योड़े मोटो कालो डोरो । ओपती जाडी

ठिकाणो :

421-ए, हनुवंत-ए
मार्ग-3, बीजेएस
कॉलोनी, जोधपुर

342006

मो. 9829202755

हथेली। गोळगट पग खंभां री जियां अर धोती सूं कस्योड़ी गेहुंवां री बोरी जैड़ी कमर। कुल मिलाय'र पैलवानी पलका रो मुगदर जैड़ी मोठ्यार। तीस री ऊमर में गबरू जवान। औं म्हरै गांव री स्यान हो। अेकर देखतो जको देख्यां ई जावतो। बां दिनां रै हिसाब सूं टाबरपणे में ई ब्यांव कर दियो पण बारगांव सूं कोई सगो-गिनायत आवतो तो बो डोडी निजरां सूं निरखतो थको अेकर इन बाबत पूछतो जरूर।

मुथरो भारी भाटा रो मालो दिया करतो, जाणै पंसेरी उठाई हुवै। कबड्डी-कुश्ती में इणनै जीतबा री मनस्या कोई नीं कर सकै हो। अेकर नागौर रा माही मेला में भार उठावण अर माला देवण में पैलै नम्बर आयो। अेस.पी. साब इनाम देंवती बेळा इणनै कैयो, “जकै दिन पुलिस में भरती व्हैणो हुवै, सीधो म्हरै कनै आ जाईजै। थारी परीक्षा, टेस्ट हुयग्या समझ लै।” पण मुथरो कदैई गांव छोड'र जावण री नीं सोची। अेकाअेक बेटा नै मां गरीबी में झूलती घणो दौरो पाळ्यो हो। बाप इणनै तीन बरसां रै बालक नै छोड'र सुरग सिधायग्या हा। औं आखी ऊमर गांव में ई खिलका कस्या।

मुथरो मां रो पक्को भगत। सदीव मां रै आसंग-पासंग ई रैवणो चायो। मैण्ट-मजूरी में मुथरा नै सगळा कोड कर'र लेय जाया करता। हांसतो-बोलतो। न खुद ठालो बैठतो नीं दूजा मजूरां नै बैठबा देंवतो। इणरै मीठै-सांतरै सभाव सूं मंतरीज्योड़ा घणकरा मोठ्यार मुथरा रै साथै ई मजूरी माथै जावणो तेवड़ राख्यो हो। बीं रै साथै आसंग-पासंग रेयो बीं नै बोलबा री दरकार नीं ही। बस, सुण्यां जावो, मुळक्यां जावो। मौज मनायां जावो।

कमठा में काम करती बेळा मुथरा राम आपैर घर सूं ल्यायोड़ी मोटी तगारी भर-भर'र उठाया करतो। आं दूजी तगारुण्यां नै तासळी-बाटका समझतो। इयां समझो कै बेमाता इणनै घडीखंड नेठाव सूं घड़यो हो। म्हरै गांव में चार-पांच खावता-पीवता चौधरुण्यां री गुवाड्यां ई ही, पण नांव तो मुथरा रो ई बोलीजतो। बीं बगत काण-कायदा घणा हा। छोटा-बडां री बोल-बतलावण, बैठ-ऊठ में पूरो-पूरो ध्यान राखीजतो। पण इण पांगरता मोठ्यार रो नांव सगळां री जबान माथै हो। घणी पूछ ही। औं ई बडां रै आव-आदर रो पूरो ध्यान राखतो।

गांव सूं बारै गांवतरा करणै रो नंबर कमती ई आवतो। जकै में कठैई जावण में टाबरां रा नंबर मुस्कलां ई पड़ता। मुथरो आपैर घर रो अेकाअेक मोठ्यार। इणनै घणा गांवतरा रा मौका मिलता। सगाई, ब्यांव, भात कै कोई गमी में मोकाण बैठबा जावणै में मुथरो ई जावतो। बीं नै कीं अठी-उठी आव-जाव रो सोख ई अणूतो हो। मिनख्यावडो मिनख हो। दोय-चार जणां रै बिचै बोल-बतलाय राजी हुवणै रो सभाव हो। सूमडो-सो बैठयो बीं नै चोखो ई नीं लागतो। जे कोई आपसरी रा झोड़-झपड़ में बात उळझाड़ी हुवै अर लोग आंवस्योड़ा बोलबाला बैठ्या हुवै, मुथरा रै बैठ पूर्यां उळझाड़ नदी में बैयग्या

ਸਮझੋ। ਕੋਈ ਹਾਂਸੀ-ਠਟਾ ਰੀ ਬਾਤ ਪੋਲਾਇਆ ਬਾਤ ਨਿਵੇਡ਼ ਦਿਯਾ ਕਰਤੇ। ਗਾਂਵ ਰਾ ਮਿਨਖ ਪਾਛਾ ਨਦੀ ਰਾ ਪਾਣੀ ਜਿਧਾਂ ਬਗਤਾ, ਬਤਾਗਤਾ, ਆਪ-ਆਪੈਰੈ ਹੀਲੈ ਲਾਗਤਾ।

ਗਾਂਵ ਮੌਕੇ ਕੋਈ ਸਾਧੂ-ਜਤੀ, ਖਾਲ-ਤਮਾਸਾ ਦਿਖਾਬਾਲਾ ਕੈ ਸੌਦਾ-ਸੁਲਫ ਬੇਚਬਾਲੇ ਆਵਤੇ, ਮੁਥਰੋ ਕਨੈ ਜਾਧ ਬੈਠਤੋ। ਬੀਂ ਅਣਪਢ ਨੈ ਸਗਲੀ ਜਿਨਸਾਂ ਰਾ ਮੋਲ-ਭਾਵ ਰੋ ਠਾਹ। ਖੇਲ-ਤਮਾਸਾ ਰੀ ਆਂਟ-ਅਟਕਲਾਂ, ਬਾਜੀਗਰਾਂ ਰੀ ਚਾਲਬਾਜ਼ਾਂ, ਕਠਪੁਤਲਾਂ ਨਚਾਵਣ ਵਾਲਾਂ ਰੀ ਆਂਗਲਾਂ ਰੀ ਕਾਰੀਗਰੀ, ਖੇਸ-ਪਟਿਆ ਬੇਜਾ ਪਰ ਬਣਾਵਣ ਵਾਲਾਂ ਰੀ ਲਕਕਾ ਅਰ ਨਾਟਕ-ਰਾਮਲੀਲਾ ਦਿਖਾਵਣ ਵਾਲਾਂ ਰੀ ਕਲਾਕਾਰੀ, ਬਾਂਦਾ ਘਣਕਰਾ ਡਾਯਲੋਗ ਮੁਥਰਾ ਨੈ ਯਾਦ ਹਾ। ਬੋ ਗਾਂਵ ਮੌਕੇ ਰੈਖ 'ਰ ਅੇਕ ਸਾਂਤਰੇ, ਸੋਝੀਕਾਨ, ਸ਼ਾਣਾਂ, ਸਮਝਦਾਰ ਸ਼ਹਰੀ ਮਿਨਖ ਰੀ ਜਿਧਾਂ ਹਰੇਕ ਕਾਮ ਰੀ ਲਾਂਕ-ਲਕਕਾ ਜਾਣਤੋ। ਨ੍ਹੂਵੈ ਸੂਂ ਨ੍ਹੂਵਾ ਕਾਮ ਨੈ ਸੀਖਬਾ ਰੀ ਲਗਨ, ਹੁੰਸ ਅਰ ਸਾਮਰਥ ਹੀ ਮੁਥਰੈ ਮਾਂਧ। ਜਦ ਈ ਅੇਕਰ ਜਕੈ ਕਾਮ ਨੈ ਆਂਖਾਂ ਬਾਰੈ ਕਾਢ ਲਿਧੋ, ਪਛੈ ਆਪੈਈ ਸਾਕਲ-ਸੀ ਕਰਬਾ ਲਾਗ ਜਾਵਤੋ। ਬੀਂ ਰਾ ਹਾਥ ਤੋ ਕਾਮ ਵਾਸਤੈ ਈ ਬਣਾ ਹਾ। ਹਰ ਬਗਤ ਕਾਮ ਚਾਈਜਤੋ ਬੀਂ ਨੈ। ਬਿਨਾ ਕਾਮ ਬੈਠਚਾ ਮਿਨਖਾਂ ਵਾਸਤੈ ਬੀਂ ਰੋ ਕੈਵਣੋ ਹੋ—“ਕਾਈ ਮੁਰਦਾ ਰੈ ਜਿਧਾਂ ਪਸੁਖਾ ਪਡ੍ਹਾ ਹੋ। ਮਿਨਖ ਰੋ ਕਾਈ ਪਾਰੇ, ਕਾਮ ਪਾਰੇ ਹੁਵੈ।” ਸਾਚਾਣੀ ਬੋ ਕਾਮ ਰੋ ਤੋ ਕੀਡ੍ਹੇ ਈ ਹੋ। ਖਾਲਾਂ ਰੀ ਖੋਤੋਡ੍ਹ ਮੌਕੇ ਗਧਾਂ, ਬੈਚਿਲਮ ਪੀਕਤਾ, ਜਿਤੈ ਮੁਥਰੋ ਬਸੋਲੋ ਲੇਖ 'ਰ ਪਾਟਿਆ ਛੋਲਣਾ ਸ਼ਵੰ ਕਰ ਦੇਂਵਤੋ। ਨੰਂ ਜਣਾਂ ਹਥੌਡੀ ਉਠਾਧ ਕੀਲਾਂ ਰੈ ਠਾਕ-ਠਕ, ਠਕਕਾ ਠੋਕਣਾ ਸ਼ਵੰ। ਕਮਠਾ, ਲਕਡੀ ਰੋ ਕਾਮ, ਮਾਂਚਾ ਬਣਨਾ, ਰੰਗ-ਰੋਗਨ, ਕੈ ਖੇਤੀ-ਪਾਤੀ ਰਾ ਕਾਮ, ਗਾਧ-ਭੈਸ ਨੈ ਚਰਾਵਣੀ, ਪਾਣੀ ਪਾਵਣੋ, ਐਡਾ ਕਾਈ ਠਾਹ ਕਿਤੀ ਭਾਂਤ ਰਾ ਕਾਮ ਤੋ ਬੀਂ ਰੈ ਹਾਥ ਮੌਕੇ ਓਪਤਾ। ਕੋਈ ਕਾਮ ਬੀਂ ਸੂਂ ਛਾਨੇ ਨੰਹੋ। ਜਕੈ ਕਾਮ ਨੈ ਪੋਲਾਵਤੋ, ਇਧਾਂ ਲਖਾਵਤੋ ਜਾਣੈ ਬਰਸਾਂ ਸੂਂ ਕਰਤੋ ਹੁਵੈ। ਬੀਂ ਰਾ ਕਾਮ ਰੀ ਆਪ, ਸਫਾਈ, ਲਾਂਕ-ਲਕਕਾ ਨਵਾਰੀ ਈ ਹੀ। ਜੇ ਬੋਝ-ਭਾਰ ਉਠਾਵਣੇ ਹੁੰਵਤੋ, ਬੀਂ ਮੈਂ ਬੀਂ ਰੀ ਬਰਾਬਰੀ ਕੋਈ ਨੰਹੋ ਕਰ ਸਕਤੋ। ਐਡ੍ਹੇ ਜਬਰੇ ਕਾਰੀਗਰ, ਮੈਣਤੀ, ਬਿਨਾ ਟੋਕਿਆਂ ਕਾਮ ਮੌਕੇ ਹਰ ਬਗਤ ਮਾਥੋ ਦਿਧੋਡ੍ਹ ਰਾਖਣ ਵਾਲੇ, ਸ਼ਾਣਾਂ, ਮਨਮੇਲ੍ਹ ਮਿਨਖ ਨੈ ਠਾਲੋ ਕੋਈ ਨੰਹੈ ਰੈਵਣ ਦੇਂਵਤੋ। ਕਾਮਵਾਲਾ ਨੈ ਰੁਜਗਾਰ ਘਣਾ ਅਰ ਰੁਜਗਾਰ ਨੈ ਕਾਮ ਕਰਣ ਵਾਲਾ ਘਣਾ। ਬੀਂ ਬਗਤ ਤਾਣੀ ਨਰੇਗਾ-ਨਰੁਗਾ ਯੋਜਨਾਵਾਂ ਚਾਲੀ ਕੋਨੀ ਹੀ। ਜਕੋ ਈ ਕੋਈ ਕਾਮ ਵਾਸਤੈ ਮਜੂਰ ਨੈ ਲੇਖ ਜਾਵਤੋ, ਮਜੂਰ ਈ ਸਾਂਤਰੇ ਕਾਮ ਕਰਣੈ ਰੀ ਸੋਚਤੋ ਕੈ ਘਰਧਣੀ ਰੋ ਓਲਮੋ ਨੰਹੋ ਮਿਲ ਜਾਵੈ। ਦ੍ਰੂਜੀ ਡਰ ਔਕੈ ਊਪਰ ਰਾਮਜੀ ਤੋ ਦੇਖੈ ਹੈ!

ਮੁਥਰਾ ਨੈ ਬਡਾ-ਬਡੇਰਾ ਤੋ ਚਾਂਕਤਾ ਈ ਹਾ, ਟਾਬਰਾਂ ਰੋ ਈ ਵੋ ਚਹੇਤੋ ‘ਹੀਰੋ’ ਹੋ। ਟਾਬਰ ਈ ਬੀਂ ਰਾ ਬ੍ਰੂਕਿਆ, ਲਾਂਬੀ-ਚੌਡੀ ਦੇਹੀ, ਕੁਝਤੀ-ਕਬਡੀ ਅਰ ਸਾਂਕਠੋ ਬੋਝ-ਭਾਰ ਉਠਾਵਣ ਵਾਲੇ ਫਿਲਮੀ ਹੀਰੇ ਈ ਮਾਨਤਾ। ਇਤੇ ਤਗਡ੍ਹੇ ਮੋਟਚਾਰ ਹੋ, ਧਨ ਕੋਈ ਟਾਬਰ ਰੈ ਪਡ੍ਹਾ ਪਾਣ ਭਾਜ 'ਰ ਉਠਾਣੋ, ਰੋਵਤਾ ਟਾਬਰ ਨੈ ਹੱਸਾਣੈ ਰਾ ਟੋਟਕਾ ਈ ਜਾਣਤੋ। ਮਰਦ-ਲੁਗਾਈ ਸਗਲੀ ਬੀਂ ਸੂਂ ਬਾਤ ਕਰਬਾ ਸ਼ਵੰ ਉਡੀਕਤਾ। ਕੇਇ ਬੀਂ ਨੈ ਗੋਪਿਆਂ ਰੋ ਕਿਸਨ-ਕਨਹੈਂਧਾ ਈ ਡੋਢ ਮੌਕੇ ਕੈਵਤਾ। ਧਨ ਬੋ ਊਜਲੈ ਚਰਿਤਰ ਰੋ ਹੋ। ਬਾਂ ਦਿਨਾਂ ਗਾਂਵ ਰੀ ਬੈਨ-ਬੇਟੀ, ਪਰਿਵਾਰ ਰੀ ਬੈਨ-ਬੇਟੀ ਈ ਮਾਨੀਜਤੀ। ਕੋਈ ਦ੍ਰੂਜੀ ਠੌਡ੍ਹ ਛੇਡਾਡ੍ਹ ਰੀ ਅਪਰੋਧੀ-ਓਛੀ ਬਾਤ ਕਦੈ ਸੁਣਬਾ ਮੌਕੇ ਆਵਤੀ ਜਦ ਆਖੋ ਗਾਂਵ ਥੂ-ਥੂ ਈ ਕਰਤੋ।

जे मुथरा नै गांव री कोई बैन-बेटी, लुगाई अेकला सूं बतलाय लियो तो बो सरमीज जावतो । कैवतो, “म्हँ पछै घरै आय’र काका सूं मिल लेसूं थाँरै काल मजूरी माथै आय जासूं ।” औडै ऊजलै चरितर रा मिनख नै कुण कोनी चावै । केई कुटीचर, दोखी ई हा । बै मन-मन में ईरखा राखता । म्हरै गांव रा बीं बलकारी भीम रै काँई परवाह ही । हाथी लारै कुत्ता भुसता रैवै, इत्ती-सी गिनार ई करतो । होल्ही रै दिनां में कै कदैई कबड्डी री बगत कुश्ती रा पाठा मंड जावता । बीं सूं कुश्ती में मोटा-मोटा मोट्यार ई आंटाचित व्हैता । कदैई दोय जणां सूं अेकण साथै कुश्ती कर पछाड़ खुवाय दिया करतो । फिल्मां में दारासिंह रा दांवपेच देख’र केई जणां आपणो दारासिंह ईज कैवता ।

जको कीं न्यारो अर करामाती हुवै, बीं री बातां तो बतलाइज्या ई करै । मुथरो जठी कर निसरतो, टाबर-लुगाई-मोट्यार बीं नै मुड़-मुड़’र देखता रैवता । कोई आपै काम री गरज सूं कोई इण री ताकत री करामात सूं कोई लाड में थुथकारो न्हाख’र इणनै निरखता । पछै खासा ताळ इण बाबत ई बातां बतलाईजती । म्हनैं औ नजारो देख’र म्हारा टाबरपणां सूं आगै बधती ऊमर में घणो इचरज व्हैतो रैयो । म्हे इयां हरखीजता कै औ पैलवान छाप हीरो म्हरै गांव रो है । ढील में कीं तंत अर सरो मिनख हुयां हौसलो ई बधीक हुया करै । मुथरो गांव में आयोड़ा अेलकार, अफसर, कै कोई नूंवा आयोड़ा मिनख सूं झट बतलाय लिया करतो । जद कै बीं री ऊमर रा दूजा लोग, औडै बगत में लाई-लाई सिरकता, सरमावता ।

गांव रा कोई वार-तिंवार, खेल-तमाशा, उच्छब, होल्ही-दिवाली में अगाऊ होय छोटा-बडां री मंडली में त्यार लाधतो । बीं उच्छब रो रंग खिल जावतो । होल्ही रा दिनां में चंग-डफ लियां आधी रात ताँई नाच-नाच गावण रो रसियो, तिंवार अर गांव री रोनक बण जाया करतो । सगळी ठौड़ मुथरै री पूछ अर पंच-पंचायती चालती । हां, बडेरा मिनखां रो पूरो-पूरो आब-आदर ई बरततो जद इयां लखावतो कै इणरै जबान है के कोनी? बां साहीं मुळक’र रवानै । मुथरा राम जाबक थाकल घर में जलम लियो पण आपरी अक्कल, ऊरमा सूं सांतरी दाळ-रोटी रो सरजाम कर लियो । सगळां रो लाडको बणग्यो । भागी मिनख हो । इण धरती माथै जीव आपरा सांस गिणती रा लेय’र ई आवै । कुण कद रवानै, औ ठाह नीं पड़ै । अर्जुन-भीम, आल्हा-ऊदल अर आपां रै बगत में जापान रो ब्रुशली संसार रा नामी करामाती ई कोई ओळवै दुनिया छोडग्या । ठाह ई नीं पड़ग्यो । बियां ई भरी जवानी में गुलाबी आभा रो मुथरो आपरा खेत में अेक रात सूतो ई रैयग्यो । कीं दुख्यो, न पाच्यो । बो चल्यो गयो । बढै धरती माथै कीं लीकट्यां ही । बीं रै जींवता सदा चरचा चाली । बीं ढंग-ढालै बीं रै सुरग सिधायां भी चरचा चालती रैयी । आखो गांव महीनां ताँई इचरज करस्यो कै मुथरा रै काँई हुयो?

◆◆



श्याम जांगिड़

म्हारी दादी

म्हारी दादी निरमल हिड़दै री लुगाई ही। भोळ्पण इतरो के नीं कैवण आळी बात सीधै मूडै कैय देंवती। मिसाल रै तौर थानै अेक किस्सो बताऊं। म्हारा चाचोजी जिका कवि हा, आपरै अेक एस.पी. बेली नै दादी कनै बाजरै री रोटी, सक्कर, घी अर फळियां रो तीवण जीमाबा तांई ल्याया। दादी बाजरै री रोटी माथै सक्कर-घी घाल थाळी लेय आई। फळियां री सब्जी साथै ही। एस.पी. साब गंड-चावळ खावणियां मिनख हा। सो बांनै ठा कोनी हो कै बाजरै री रोटी साथै सक्कर-घी कियां खायो जावै। चाचोजी आपरी थाळी न्यारी लियां बैठ्या हा। दादी एस.पी. साब नै भाळै। बै रोटी रो टुकडे लेय सक्कर रै चोपो-सो देवै। दादी सूं रैयो कोनी गयो। बोली, “मरज्याणा, थनै रोटी जीमणै रो ई ठाह कोनी!” अर वा रोटी अर सक्कर चूरं र बोली, “अबै खा!”

एस.पी. नै ‘मरज्याणा’ कैवण सूं चाचोजी धोळा होयग्या। मां औं कांई कैय दियो! पण एस.पी. साब बांरो गोडो दाब्यो। मतलब थे फिकर मती करो, माईत इयां ई बोल देवै। औडै सुभाव री ही म्हारी दादी।

म्हारा बूढा दादा-दादी कुवै माथै बण्योडी कोठी में रैवता। कुवो चूरू स्फैर सूं अेक कोस दूर हो। दादी परिवार तांई गायां रो धीणो सदीव राखती। स्वे टाबर-टीकर छुट्टियां में दादी कनै ई रैवता। दादी रो नांव पूरणा हो। उणरै सुभाव नै भाळतां वा साख्यात अन्नपूरणा ही। म्हारो कुवै आळो खेत ढाढर-बूटियो आद गांवां रै रस्तै माथै है। ईंकर कोई भी गेलारथी दादी कनै आयं र रोटी

ठिकाणो :

पाणिनि कुटीर

डालमिया स्कूल रै कर्ने
न्यू कालोनी, चिंडावा
जिला-झुंझुनूं (राज.)

333026

मो. 929588494

मांगबा आय जावतो । जे ठंडी-बासी नीं हुंवती तो दादी उणनै ताती रोटी सेक देंवती । अंकर म्हरै कुवै सूं उतराद कानी आळै खेतां में अंक जणो जांटी छांगबा आयो । औं फागण रो दिन हा । आं दिनां खेतां में भोत कमती लोग आवै । जांटी छांगणियो अंक स्कूल रो मास्टर हो जिको खुद ई जांटी छांगण आयो हो । दुपारी खातर बो चटणी-रोटी अंक न्यातणै में बांध 'र ल्यायो हो । बो भातै रो न्यातणो अंक जांटी तळै मेल 'र जांटी छांगणी सरू कर दीनी । दोपारां जद भूख लागी तो बो उण जांटी हेटै गियो, जठै बो न्यातणो मेल्यो हो । न्यातणो बठै हुवै तो लाधै ! असल में बो रोटियां रो न्यातणो कागडोड लेयग्यो हो । इन्है-बिन्है ख्यांत्यो तो न्यातणै रो चीरडो पङ्घ्यो । बो समझग्यो कै रोटी तो कागडोड खायग्यो । बो माथो पकड़ 'र बैठग्यो । भूख मरतै रा आंतडा कुरल्यावै ।

संजोग सूं पासै आळै खेत रो पाड़ोसी आयग्यो । बो बोल्यो, “मास्टर, आज इयां कियां बैठ्यो है ?” तद मास्टर उणनै रोटी कागडोड रै खावण री बात बताई । आ सुण 'र बो पाड़ोसी बोल्यो, “थूं इयां कर, दिखणाद कानी हरखाराम रो कुवो है, बठै उणरी मां मिलैली । थूं उण दादी नै कैय देयी, बा थनैं रोटी देय देवैली ।”

बो संकावतो बोल्यो, “यार, इयां कियां चल्यो जाऊं ? सरम आवै ।”

पाड़ोसी बोल्यो, “रे, रोटी में क्यांरी सरम ? थूं जा तो सरी । दादी थनैं रोटी जीमा देवैली ।”

छेवट मजबूरी में मास्टर दादी कैन पूग्यो । बरामदै में जाय 'र बैठग्यो । दादी बैठक सूं बरै निसरी । मास्टर रामरामी करी । दादी उणनै पाणी पायो । पण पाणी उणनै थोड़ो-सो भायो । बो बोल्यो, “बस, दादी ।”

दादी उणरै मूँडै कानी भाळ्यो । बोली, “मरतो मरै दीसै, क्यूं ?”

तद मास्टर आपरी विगत बताई... म्हारी रोटी कागडोड लेयग्यो ।

दादी बोली, “बैठ ।”

बो बैठग्यो । दादी कैन ठंडी रोटी तो पुरसल ही कोनी । ईकर बा हाथूंहाथ ताती रोटी सेकी । ता-पछै मास्टर नै ताती रोटी अर तीवण ल्याय 'र पुरस दियो । दादी उणनै दोयबर न्यौरा कर 'र धपाऊ रो जिमा दियो । मास्टर गळगळो होयग्यो ।

अंकर बो मास्टर म्हरै चाचोजी नै आ घटणा बताई । म्हारा चाचोजी भी बठै ई मास्टर हा । बो बोल्यो, “माधव जी, चूरू रै अगूणै पासै अंक कुवो है, जठै अंक डैण्ती रैवै । राम हाजर-नाजर, म्हैं औड़ी लुगाई जिनगी में कोनी देखी । बा म्हनैं भूखै नै ताती रोटी सेक 'र जिमायो । बा देवी सूं बध 'र है ।”

उणरी बात सुण 'र म्हारा चाचोजी हांस्या । बोल्या, “अरे भाया, बा म्हारी मां है ।”

बो हाकबाक रैयग्यो, “...माधव जी, बा थांरी मां है ! ...धिन्न है उण माता नै ।”
इयां म्हारीदादी अनपूरणा ही ।

दादी गेलारथी नै बणाय 'र चाय पाय देंवती । रोटी-पाणी रो पूछती । 60 बरस सूं ऊपर उमर हुंवता थकां दादी में फुरती ही । स्यात इण री वजै उणरी गाय-सांसरां री खेचळ अर सादो भोजन हो । म्हारी दादी कदैई मैला गाभा कोनी पैहरचा, नीं कदैई बासी रोटी खाई ।

मूळ रूप में म्हैं कैवूं तो दादी रो अेक ईज काम हो—रोटी जिमावणो । म्हे टाबर जद बठै जावता तो बा आ ईज पूछती, “रोटी जीमी के नई ?” जद बदमासी करतो तो कैवती, “मानो कोनी के सापखादिडो !” लाड करती तद कैवती, “आव गैला ! थनैं दही-रोटी जिमाऊं ।” म्हारै सूं छोटो भाई सरोज तो दादी कन्है ईज रैवतो । बो ममताळू दादी रा हांचळ चूंघतो । इण बडेरी उमर में भी ममता सूं उणरे दूध सांचरतो ।

दादोजी अर दादी में पंदरै बरसां रो बेठो हो । म्हारी दादी लाडी आयोडी ही । दादोजी जद घणा थाकग्या तो दादी बांरी घणी सेवा करी । बांनै पधेडियां लेय 'र बाढै में लेय जाय 'र झाडां करवाय 'र लावती । मिंट-मिंट में बांरी हाजरी बजावती । दादोजी रो सुभाव आकरो हो । जे थोड़ी-घणी देर हुय जावती तो बै रोळा मचावण ढूकता ।

दादोजी 82 बरस री उमर में रामसरण हुयग्या । ईंकर मजबूरी में दादी नै चूरू आळी हेली में सोग माथै बैठणो पड्यो । उणनै दादोजी रै जावणी रो तो दुख कमती हो अर कुवै माथै बंधी गायां री फिकर बत्ती ही । बा पूळबो करती, “अे बीनणी ! गायां कनै कुण है ? कुत्तर नीं सांपड़ जावै, देखजै !”

मां कैवती, “थे बैठ्यो रैवो, सो-कीं होय जावैला ।”

सोग रै दिनां में अेकर मां बोली, “मां जी लुगायां जद बैठण आवै तद थे भी रोया करो ।”

दादी बोली, “म्हासूं कोनी रोयो जावै । अेकर रोय लीनी । जावण आळो चल्यो गयो । राम रै आगै कीं रो जोर ? अर औ आवण आळी रांडां तो फेकट करै, आंरो कुण मरग्यो ?” इयां म्हारी दादी, पवीत हिडै री भोळी-ढाळी लुगाई ही ।

दादोजी गयां पछै दादी कुवै माथै अेकली रैवती । म्हे अेक-दोय टाबर रात रा उण कनै जाय 'र सोवता । कदैई जद कोई नीं पूगतो तो भी दादी नै किणी रो भौ कोनी लागतो । उणरी दकाल इतरी भारी ही कै अेक कि.मी. दूर डाबला ढाणी ताई सुणीजती । बियां उण दिनां किणी तरै रो डर-भौ हो ई कोनी । दादी तो किंवाड़ जड़ 'र सूय जावती । सुंवारै चटकै ई उठ 'र गाय-सांसरा रै हीडै में लाग जावती ।

दादी रो पीरो रामसीसर हो। चूरू सूं मोलीसर टेसण ताई रेल में जावणो पड़तो अर आगै तीन कोस पैदल रो पैंडो। म्हैं दादी रै साथै जावतो। गाडी रात री बगत दोय बज्यां मोलीसर पूगती। दादी गाडी सूं उतरतां पाण खवानै होय जावती। डर-भौ दादी नै लागतो कोनी। कदई साम्हंस सूं आवतो कोई ऊंटवान मिलतो तो बो चिमक'र हेलो करतो, “अरे कुण है?”

दादी जोर सूं बोलती, “रामसीसर रै बचनै री बैन हूं... थूं कुणसै गांव रो है?”

फेरुं बो ऊंटवान आपरो गांव बतावतो। म्हैं अणभव कस्यो कै लुगाई चावै कितरी भी उमर लेय लेवै, पीर रो मोद कदई कम नीं हुवै। दादी हर साल पीर जावती अर दोय-चार दिन रैय'र आवती।

दादी इकाणवैं बरस री होयगी तद सै घरआच्या तय कर्यो कै दादी नै अबै खेत में नीं रैवणो चाईजै। बियां बांरो डील निरेगो हो। फेरुं भी बै घैरै रैवै लागा। म्हारी मनस्या ही कै म्हैं दादी नै म्हारै कनै राखूं, सो म्हैं बानै चिड़ावा लेय आयो। आ 1984 री बात है। उण बगत म्हैं अेक बिरामणां रै मकान में भाडै रैवतो। दादी काई आई, बिरामण दादी अर उणरे कुणवै नै अेक रमतियो हाथ लागग्यो। सै लुगायां अर मोट्यार दादी री भोळी अर पटाफोड़ बातां रा मजा लेंवता। अठै दादी सै बिरामण्यां री भायली जैड़ी होयगी। कथा-भागोत अर मिंदर जावती।

दादी नै निकमो बैठणो कोनी सुहावतो। म्हानै कैवती, “भाया, अठै कीं काम न धाम, बस बैठ्या-बैठ्या खाओ।” दादी सदीव दोय टंक रोटी जीमती। अठै आयां पछै म्हारी जोड़ायत उणनै सुबै सिरावण करवाती, फेरुं दोपारो अर ब्याळू। इयां तीन बगत अरोगण सूं दादी रो डील भारी होयग्यो, जीं सूं गोडा में कीं दरद रैवै लाग्यो। पण दादी गिनार कोनी कस्यो।

बैठै अेक बूढा पंडत बिरमानंदजी हा। बै रोज दिन उण गुवाड़ी में आवता। आय'र दादी नै कीं न कीं पूछता। अेक दिन बोल्या, “दादी, श्यामजी थांरी सेवा करै का नर्ई। जे नीं करै तो म्हनैं बतायो, म्हैं उणनै खींच देऊंला।”

दादी बोली, “ना भाया, श्यामो अर उणी बऊ घणी ई सेवा करै। घणा चोखा है।”

पंडत हांस'र बोल्यो, “तद ठीक है। म्हारो तो पूछण रो फरज है। थे तो म्हारा माईत हो।”

इयां इण गुवाड़ी में दादी री भोळी-भोळी बातां रा आणंद लेंवता। निरमळ हिडै री दादी बानै घर री सै बातां बता देवती। कुणसी बीनणी चोखी है, कुणसी चोखी कोनी। श्यामै री मां चोखी है अर भोळ्याँ री मां बदकार है।

दादी री आंख्यां रो ओपरेशन करावणो हो। म्हारो बडो बेटो लोकेश दादी नै पिलाणी अस्पताळ ले जाय'र जांच करवाई। म्हँ चूरू गयो हो। आयो तद दादी पूछ्यो, “तेरी मां के कैयो है?”

म्हँ कैयो, “मां तो कैयो है कै ओपरेशन चूरू ई करावणो है।”

तद दादी बोली, “भाया, तेरी मां कैयो है, बो ई करस्यां।”

दादी चूरू खातर बिदा हुई तो दादी समची बूढी भायल्यां सूं मिल'र रोई, “... बाई, नीं जाणै कीं जलम री थे बैनां ही म्हारी। थे म्हारो घणो मान राख्यो। थांरी ओळ्यूं सदीव म्हनैं रैयसी।”

दादी 92 बरस री उमर में घोड़लिया हांक्या। बोलती-बोलती गई। जावणै सूं पैली सै नै पूछ्यो, “भाया, रोटी जीमली कांई?”

सै जणा हां भरी तद दादी सरीर छोड़'र हर रै हिंडोळै चढगी। जिको भी सुण्यो, बो आ ईज कैयी, “भई, दादी घणो ई धरम करस्यो, बा क्यूं दुख पावै ही, चटकै ई चली गई।

◆◆





छत्र छाजेड़ 'फक्कड़'

चौपाल

मिनख री देह में जियां काळजो होवै बियां ई गांव में चौपाल होवै। टाबर सूं लेय 'र बूढ़ा-बडेरां ताँई आप आपरी चौपाल जमावै। औ चौपालं इयांकली जायां होवै, जियां कै पींपळ-गट्ठै पर, कै गांव रै बिचूक नुक्कड़ पर। अठै सगळं खातर दरुजा खुला रैवै। अठै जात-धरम री कोई पांदी कोनी, न अठै अमीर-गरीब रो भेद, सगळा इकसार ई गिणीजै। जुगां-जुगां सूं चालती औ चौपालं ई निरपेखता रै चलतै ईज जींवती है। महनैं लागै, अबै रा संविधान बणावणियां रो मन आं चौपालं सूं ईज सीख लीन्ही ही। अठै बैठै तो सगळा बरोबरिया ईज है, पण दस-पांच बरस रै आंतरै वाला भी आय सकै, बस चौपालं री मरजाद नीं तोड़ सकै। संसद री दाँई अठै चौफालिया नीं हो सकै। संसद री दाँई आं चौपालं रा बगत भी पुखा रैवै। अठै सै अेक निजर सूं ई बरतीजै। बगत कदैई इकसार रह्यो काँई, अबै बदल्तै बगत में स्हैरां री लूंठी कॉलोनियां रै पार्का में चौपालं जमै।

जियां सांस आवै जितै ईज शिव है, नीं जणां शव गिणीजै, बियां ई मिनख बापरै जितै ईज चौपालं जमै अर बितै ई गांव-स्हैरां री सोभा है। आं चौपालं ऊपर ग्यान री गंगोतरी दड़ाछंट बैवै। इस्यो कोई विसै नीं जिकै री अठै चरचा नी हुंवती होवै। घर-विध सूं लेय 'र जात-धरम सूं हुंवती थकी राजनीति ताँई पूग जावै अर अठै अेक सूं अेक जाण्या-अणजाण्या रहस्यां पर सूं पड़दा उठै। अठै आवणियां री जाणकारी आज री सीबीआई/ईडी नै फेल करै। चौपालं री मजेदारी आ कै अठै सीबीआई अर ईडी

ठिकाणो :
बी-76, आनंद विहार
दिल्ली-92
मो. 9350051179

री दाँई हाथ नीं बंधा होवै, अठै रा जासूस तो अेकदम खुल्ला खेलै—खेल फरूखाबादी । छोटो-बडो किसो ई घर रैवै, सगळां रै अंदर रै भीतर री मांयली खबरां अठै पुरसीजै । छोटी-छोटी बातां जियां कै किणरै घरां आज कुणसी तरकारी बणी है, कै छाछीती छमकीजी है, सगळां रा परचा अठै बटै । गळी-गुवाड़ में कुण आयो तो कुण ब्हीर होय 'र परदेसां लंघयो, किणरै अठै पांवणा बापस्या है । आ भी ध्यान रैवै कै कोई ओपरो गळी रा गेड़ा तो कोनी काटै है नीं । भांत-भांतीली खबरां अठै चौपाल री बही में दरज रैवै ।

बूढा-बडेरा, सेवानिवृत-सा भला माणसां री सगळां सूं चहेती ठैड़ होवै चौपालां, क्यूंके घरां रै मांय तो आरी कोई सुणे कोनी, और तो और, घरनार भी आं परां तूठ 'र भाव देवै कोनी... आखै दिन सांवठा थोक सुणावती ई रैवै । चौपाल पर आवै तो लागै कै पैरोल पर छूट 'र आया होवै । अठै ना तो किणी रो डर, ना भय, खुल्लम-खुल्ला आप-आपरा शौक पुरावता-सा मन री काढै ।

सौक पुरावता कोई सिगरेट रा सूट्टा सारै तो कोई आपरै ब्रांड री बीड़ी सुलगावै । शिवलो कलकत्ता बीड़ी आंगळ्यां में भोंच, आंख मींच 'र जोर की खेँचै, जाणे गाडी री चेन खींची होवै । भागीडो पांच सौ पांच मारका बीड़ी राख्ये तो भीखलो राजदरबार री पिचकास्यां छोड-छोड 'र रेत में रंगोळ्यां-सी मांडै । लालै नै तो ई राजदरबार गुटकै री गिंध सूं ई अेलर्जी है, बो रजनीगंधा अर तुलसी रव्व 'र मंडल में रोळतो रै । अबै बो टैम कठै रह्यो जद चौपालं परां चिलमां सारीजती ही । बूढिया पींजरै रै मांय फंस्यै सिंघ-सा गरड़ावता आप-आपरी जवानी री जुगळ्यां कर-कर 'र जोर हंसता अर हंसावता हा । अेक-दूजै नै 'स्पेंट फोर्स' बतावता हा । कोई बीड़ी रै धुंवै रो छल्लो बणावतां कैवतो कै बामण दादै री के बतावां, बो तो 'प्यूज' लोटियो है । अेक दिन अेक छोटो टींगर कह बैठ्यो, “के बात करो हो, दादै रै मूँडै में दांत कोनी, पेट में आंत कोनी, पण इन्नै-बिन्नै झांकता फिरै ।” दादो दोरी कोनी मानी, पण बो किसो घाट पड़ै हो ! छोरै नै बुचकार 'र बोल्यो, “हाल थूं टाबर है, थर्नैं तजुरबो कठै, के होयो भायला जे मूँडै में दांत कोनी अर पेट में आंत कोनी ।” पोपलो मूँडो पंपोळतो बोल्यो, “देखण में आंट कोनी ।” ऐ तो चौपाल री नर्सरी क्लास री बातां हुंवती, कुण जाणै कै ऊपरली क्लासां री पढाई में काँई-काँई हुंवतो हो । इण खातर ई चौपालं पर मन न लागै, आ कींकर हो सकै भायला !

जोध-जवानां री चौपालं पर आखै गांव री छोस्यां री कुंडलियां खुलती ही, जवान भोजायां री डाक री खबरां-सी खबरां बंचती ही । कुणसी किणरै फेर में आथण मिंदर भाजै, कुणसी सिङ्यां खेत कानी मूँडो करै अर उणरै गैल गांव रो कुणसो टाबर फदड़का मारै । कुणसै खेत में बैठ, लोटो परियां सिरका, हाथ में हाथ थाम रंगीला सपना लेवता गोधुळी पछै ईज पाण्या बावडै, क्यूंकै झालर बाजै रै अंधरारै रो फायदो लेवै कै गांव नै खबर

न लागै पण जग्गा जासूसां कुण लगै, केजीबी रा जासूसां दाईं खबरां चौपाळ पर आ ईज जावै। स्हैरां में चाहै किसी ई कोलोनी में रैवणिया दो स्टोप आंतरै ई मिलै, चाहै सगळा ई मॉल में भेंटा करै, पण चौपाळां पर एफआईआर लिखिज ई जावै है।

बात रो बतंगड़ बणावणो होवै, चाहै बाल री खाल काढणी होवै, आं चौपाळां सूं सांतरी जग्यां कठै मिलै? औ टीबी रा सीरियल आं चौपाळां सूं ईज सीखै कै बात कठै सूं कठै ले जावणी है।

ओक दिन री बात कै खींवलो गुटकै री पिचकारी मारतो बोल्यो, “फक्कड़ भाईजी! थे फलाणै नै तो जाणता ई हुवोला...?”

म्हैं हां में मुंडी हिलावतो कैयो, “खींया... बै तो गांव रा मौजीज सेठ है, बांनै कुण कोनी जाणै, लूंठो कार-ब्योपार है, मोकळी संपदा है।”

बो बात नै बीच में काट'र कैयो, “आ ईज तो बात है, सो-क्यूं ई ठाडो है, पण करम भी तो ठाडा कोजा है।”

म्हैं अचंभो करतो बूझ्यो, “इस्यो के है...?”

कीं ताळ में बात रा फोरा टेकतो क्लाइमैक्स पर ल्यावतो खींवो बोल्यो, “भाईजी खुद मिनख तो घणो ई चोखो है, पण चरितर धाप'र माड़ो है... इणरी आपै बेटै री बींदणी सूं लग्गी है।”

म्हारै झाल चढगी। डपटतो कैयो, “सा'वा खींवला! जूता खासी के...? कूड़ा आळ ठोकै, थूं कदैई आंख्यां देख्यो के...?” जोर सूं झाड़्यो तो कीं ढब्यो, पण थोड़ीक ताळ में निसरमो फेर बोल्यो, “म्हैं थानै कैवूं नीं, बस थे देख्यै समान ई समझो।”

अबै बतावो कै के करल्यां, चौपाळां पर के रो के हो जावै। का म्हैं जाणूं का राम जाणै।

भायला! चेतै आवै कै बो भी बगत हो जद आधा टाबर तो स्कूल जावता ई कोनी हा। जिका जावता बै भी दो-तीन घड़ी खातर ई जावता हा। ओक-ओक घर में केई भायां रा रळा'र दस-पंदरै टाबर तो छोटी बात हुंवती ही। छोस्यां तो उण बगत घर रै मांय ई रैकती ही, पण टींगरां री चौपाळ तो दिन आंथ्यां ताणी ग्यान में सजती ही। कंचा, मारदड़ी सतौळ्या, सताताळी जियांकला खेल रमता हा। भूख लागती तो घरां ढूकता हा। अबै बदक्क्यै बगत में टाबरां नै टैम ई कठै...? ढाई-तीन बरस री उमर में चुड़ी अर ऊपर पैंट वाला टाबर स्कूल जावै। बां टाबरां नै कुण बतावै कै उण बगत छह-सात बरस ताईं नागा फिरणै रो अर कमीज री बाजू सूं सैडो पूँछणै रो मजो ई के होवै! अबै तो स्कूल पछै ट्यूसन, डांस-क्लास अर जाणै कित्ती भांत रा काम? टाबर बिचारो आखतो होय जावै,

पण पिंड कठै छौटै ! आं नूंवोड़ा नै के ठा चौपाल के होवै। ठा नीं आंरी भड़ांस बुढापै में भी निकल्सी कै नीं... ?

कैबत है कै बात रै पग कोनी होवै। बात रो के है कद किन्नै रुड़ती किन्नै रुड़न्या। सरू होवै मंहगाई-बेरोजगारी सूं अर खतम होवै सत्ता री कुरसी परां। केर्इ तो आपरी पार्टी रा सांकछिया होवै जिका तो पारटी खातर मरण-मारण त्यार रैवै। आं चौपालां पर बै सगळी बातां चरचीजै जिकी संसद मांय होवै चाहै नीं होवै। अठै बिना लाग-लपेट सगळी पारटियां रो पोस्टमार्टम होवै। कुण कद किसी पारटी में है, पण पळटण नै त्यार बैठ्यो है। केर्इ तो मांयली खबर कैय 'र बम-सा फोड़ै। फलाणै नै मंतरी बणासी, तो कुणरी मिनिस्ट्री जावण वाढ़ी है। कुणसो नेता दठ बदल्सी अर कुणसै पांणै में दुकिंग है। चुनाव री रुत में तो औ चौपालां तंदूर-सी ताती रैवै अर बातां में स्वाद इयां आवै जियां सियाळै में गरमागरम दूध-जल्डी में आवै। मिनट-मिनट रा भाव चौपाल री महत्ता बधावै। उण बगत ठा नीं कित्ता खाईवाल गईवाल बण जावै। आं मजां रै कारणै ईज चौपालां माणसां रै काळजै री कोर कैयीजै।

गांव रै कंवारा-कंवारियां रो इतिहास ई अठै सूं मँडै। किणी छोरै रो नांव लेवण री देर है, किता ताचक 'र पडै! छोरै री जलम-कुंडली अठै ईज बांचता देर नीं लगावै। सगपण तो होसी कै नीं होसी, पण तीया-पांचा आगलै रा चौपाल में करतां बित्ती ई देर लागै जित्ती भारत सरकार रै राहत कोस री घोसणा करण में लागै। छोरां सागै उणां रा माईतां रा तळपट अठै ओडिट कस्योडे-सो तळपट आ जावै। किणरै कित्ती देणदारी, कित्तां माथै है, कीं पावणा है कै नीं, जाणै इनकम-टैक्स रो दफतर अठै ईज लागै है। तळपट रै साथै-साथै घरवाळां रा सभाव भी उपाणीजै। किणरै घरां सासू-बींदणी में लट्ठ बाजै, तो कठै देवर-भोजाई रो टांको फिट है। सीआईडी री फाइलां झट खुल जावै।

अबै तो घर-घर टीवी लाग्या है, पण पैलां औ चौपालां ईज टीवी रो काम काढती ही। कुण री बींदणी रो पग भारी है, किसै घर में जापो होयो है, चौपालां री चौकसी किन्नरां रै खबर-तंतर नै ई फेल कर देंवती ही। जुवानियां रै जोबन री तो औ चौपालां बैरण ही। अबै तो स्हैरां में कोई डिस्को, पब, बार में जावै तो बेरो ई कठै लागै, पण उण बगत स्पीड-पोस्ट सी खबर तुरतै चौपाल पर भुगतीज जावती ही। कित्ता छोरा-छापरा भागवत में या फेर मिंदर क्यूं जावै, कठै पल्ला लहराइजै, चूंगी री फड़दी चौपाल पर कटती ई दीसै। मटकै रै आंक रो खुलासो आगूंच अठै आय जावतो हो। गजब रुतबो हो आं चौपालां रो।

चौपाल पर बात रो नुकतो पकड़ में आवण री जरूरत ही, बाकी सब तो आपरै मतै ई घड़ण रा खिलाड़ी पैनल्टी कारनर मारण नै त्यार ई रैवता हा। खास बात आ ही कै आज

री मीडिया सूं चार पांवडा आगै चालती ही चौपाळ। जियां टीवी में नित नूंवा मुरदा बलै बियां ई चौपाळां पर आज कही बात तो काल रै दिन बोदी कहीजती ही। नित नूंवी बातां रो अंबार रैवतो हो। काल वाळी बात तो बासी गिणीजती ही। केई संकालु सभाव रा मिनख तो आपरै मन री कैयां बिना ई रैय जावता हा। केई तो मोदीजी री दांई मन री बात सगळां सूं पैलां कैवण री होड मचाई राखता, आज न करी तो सवारै पुराणी हो जावणी है।

चौपाळ, गांव री हरियाळी, गांव री नसीली, रंगीली, हठीली बातां करण रै सागै दुख-दरद, मरयै-खप्पे रो इतिहास भी अठै ईज मंडतो हो। पण अेक बात सै सूं सूगली ही कै बात बधावण रै फेर में ठा नीं किती कूड़ी बातां किणी नांव रै चेप देवता, बै तो आपरो बगत काट रोट्यां भेळा हो जावता, पण कद बिचास्यो कै जिकै री चरचा करी, बीं बापडै री कांई गत होसी? किणी रो तीयो-पांचो करस्यां बगत तो कट जावतो, पण झूठी थूकबिलौई रो अगून-आथून सो भेळो हो जावतो हो। पण धरती पर लटकता, पण मन चांद पर उडतो हो। थांरा बैंगण म्हारी छाछ रो जे ओलंपिक हुंवतो तो सगळा मैडल चौपाळां री झोळी में आवता। हरेक रै हबसाड काढण री अेकदम 'परफेक्ट' जग्यां हुंवती ही चौपाळां। देस री परंपरा अर संस्कृति रो ईज अंस है चौपाळां। चौपाळां आज भी जींवती है। बस, सरूप बदल्यो है, पण बातां रा लच्छ कम कोनी होया। कैबत है—“पर हित सरिस धरम नहीं भाई”, बियां ई ‘पर निंदा सम सुख नहीं भाई’ तो आतमा होवै है चौपाळां री। ठाडो चमत्कारी इतिहास बखाणनै री म्हारी खिमता कठै, बाकी आप अनुभव करो अर मजा ल्यो।

◆◆





मानसिंह शेखावत 'मऊ'

चाय-पच्चीसी

पीणी पड़सी चाय, चाय रो चसको लाग्यो।
सूरज उग आकास, घड़ी दो ऊपर आग्यो॥
दादाजी नै चाय, चाय दादी नै चावै।
चाय चाटगी भूख, टुकड़ा नीं दो भावै॥
सब रो आदर चाय, चाय पै चरचा चालै।
बाबूड़ा बिन चाय, घणा दिन फोड़ा घालै॥
चाय बिना सूनेड़, चाय बिन रंगत क्यांकी।
चाय गुवावै गीत, चाय बिन संगत क्यांकी॥
चूल्है बैठी चाय, भाग चोबारै चढगी।
सम्मेलण में चाय, चाय पर निजरां गडगी॥
लागै आटो पाव, चाय की चिन्ता मोटी।
बजट चाय रो भोत, दूध री बोतल छोटी॥
चाय मरद री स्यान, चाय में जागीरदारी।
मूँडै पर मुस्कान, चाय बिन लागै खारी॥
पकवानां रा ढेर, चाय बिन लागै माड़।
मूँड कवि रो ओफ, चाय बिन हुवै कबाड़॥
चाय चलावै राज, चाय सूं चिटली पकड़ै।
नरम पड़ै पी चाय, चाय बिन बेजां अकड़ै॥
मान मऊ जिद पाण, चाय जद नीं बपरावै।
घर में व्है घमसाण, खालड़ी सगला खावै॥
कोडवर्ड है चाय, चाय चरचा रो सेतू।
चाय चढी चौपाल, चाय है मोटो हेतू॥

ठिकाणो :
मु. पो. मऊ
तहसील-श्रीमाधोपुर
जिला-सीकर (राज.)
332715
मो. 9829164164

संसद पूगी चाय, चाय सूं सत्ता पायी।
चाय करावै मेल, चाय है मोटी मायी॥
चेला चावै चाय, चाय बाबां नै प्यारी।
जीव-जड़ी है चाय, चाय री महिमा भारी॥
बिना चाय कोकाड़, चाय बिन माथा फाटै।
गली-गली में चाय, चाय है भाटै-भाटै॥
चैरा मालै चाय, चमक है चोखी ल्यावै।
जीवै मरिया बीर, चाय जद साह्मीं आवै॥
पैलो वर दे चाय, दूसरो कोनी सूझै।
दीखै कोनी चाय, जीव जद घणो अमूझै॥
नहीं जींवता चाय, दिनां में होटल खोलै।
आयां रो सम्मान, गांव रा सरवण बोलै॥
जग में चावो जीत, चाय रो बजट लुटावो।
खुद छल्कावो जाम, चाय लोगां नै पावो॥
जात-पांत नै बाल, चाय है प्रेम बधावै।
चाय दिरावै जोस, जीव मुरदा में ल्यावै॥
साधन घणो अचूक, चाय री छोटी प्याली।
दुनिया छोड्यो दूध, चाय रै गेलै चाली॥
चाय घणी चालाक, भूख नै झटपट मारै।
अनशन पर अड़ बैठ, लोगड़ा जलम सुधारै॥
बाबू दफ्तर छोड, चाय पीबा नै आवै।
अफसर केबिन मांय, चाय है घणी मंगावै॥
निविदा में है चाय, चाय में ठेका छूटै।
चा-पाणी री ओट, लोगड़ा चांदी कूटै॥
काम हुवै आसान, चाय बिन फाईल ढूबै।
चाय पीयां मुस्कान, नहीं तो बाबू ऊबै॥
मती बचावै चाय, स्याणपत कोनी चोखी।
नहीं मिली जद चाय, डाक बाबूड़ो रोकी॥



भंवरलाल बैरागी (सरदारशहर)

टिकड़यां-सुयां सूं जीवां हां

म्हे तो जे साची पूछो तो, टिकड़यां-सुयां स्यूं जीवां हां !

थे कुत्तां दाईं भूख मरो, म्हे गधां दाईं खावां हां
थे बैठ्या हो थंरै घर में, म्हे लाखूं कोसां जावां हां
ई धन खातर तो दादोजी, फिर-फिरकै ज्यान गमा दीनी
मरग्या तो चाहे मर ज्यावो, म्हारी तो नींव जमा दीनी
बां कै ही पुन परतापां सूं म्हे खून जगत रो पीवां हां !

औ हाथी रो सो पेट लियां, पड़ ज्यावां आकर पोळी में
सारो दिन बैठ्या काटां हां, किरचा-खाटा अर गोळी में
इतै नै दिन तो ढळ ज्यावै, के पङ्घो है झूठी बातां में
दाळ-भात पर मच ज्यावां, ले-ले पापड़ म्हे हाथां में
सब्जी अर भात मिला करकै, म्हे दाळ रहड़ की पीवां हां !

गिटणै अर लिटणै दो चीजां सूं जे बंगालै ब्यापार चलै
तो थंरै तीर-तलवारां जिसी, म्हारी कलम री चाल चलै
जे भवसागर में डूबां तो आ, कलम नाव नै पार करै
इनकम-टैक्स रै रोळे में, मालकां री चोखी सार करै
बस ठौड़ बंदूकां री म्हे तो, आ कलम हाथ में लियां हां !

चोरी तो कदै करां कोनी, क्यूंकै भगवान रा प्यारा हां
गिद्दी पर धोळै दोपारां, बैठ्याई डाको मारां हां
जे राज तेज में काम पड़े, सामै आँख्यां री खावां हां
छोरां रै सिर पर हाथ धरां, मिंटां में धरम उठावां हां
म्हे म्हारी जाण में चोखां हां, अब थे ई बताद्यो कियां हां !

औं सांस अटकतो जावै है!

मिनखां रो तो मिनखपणो, दिन रात भटकतो जावै है
रोटी रोजी री चिंत्या में, औं सांस अटकतो जावै है

छोरा अंगरेज बणै लाग्या, घाल गळै में टाई नै
भाभी नै होठां री लाली, साइकल दे दी बाई नै
बापूजी बैठ्या देखै है, ऊंची ओड्यां रै बूटां नै
माऊजी रोज सुंवारै है, छोस्यां रै दो-दो चुट्ठां नै
दादी रो बोदो घाघरियो, दिन रात खटकतो जावै है
रोटी-रोजी री चिंत्या में, औं सांस अटकतो जावै है

कुणसो घर है जिकै में, पश्चिम री लाय नहीं लाधै
कुणसो घर है जिकै में, बिस्कुट और चाय नहीं लाधै
चूल्है रो चोको देवण नै चाहे, घर में मेट नहीं लाधै
के पोल पड़ी है हाथां में, जगती सिगरेट नहीं लाधै
दिन-रात काम री सूली पर, इंसान लटकतो जावै है
रोटी रोजी री चिंत्या में, औं सांस अटकतो जावै है

म्हे तो देख्यो हो बायां नै, इस्कूलां मांय पढा देसी
म्हानै के ठा हो बापूजी, डाकण नै जरख चढा देसी
म्हे तो देख्यो हो पढ-लिखकै, सूत्या इंसान जगा देसी
म्हानै के ठा हो औं दादा बण, बांसां में आग लगा देसी
आं सूं तो सो संकोच सरम, अब दूर फटकतो जावै है
रोटी-रोजी री चिंत्या में, औं सांस अटकतो जावै है

मिनखां रो तो मिनखपणो, दिन रात भटकतो जावै है
रोटी रोजी री चिंत्या में, औं सांस अटकतो जावै है

◆◆



डॉ. रमेश 'मयंक'

सफर रा दरसाव

सफर

फोरी-फोरी फुहारां सूं
सफर थोड़ो आसान जणावै
सड़क रै दोन्युं आडीनै हरियाळी
पहाड़ पे बादलां रो डेरो
अर मन मांय उमाव
सफर मांय
तावडै-छांव सूं बंतळ करता
पाछै छूटता जावै गांव।



संतोष

पूरै दिन टिक'र
कारज निपटायो
मैणत करता
देह गमला मांय
बुद्धि री कठियां देखण रो
सुखद सुपनो साकार हुय पायो।

ठिकाणो :

बी-8, मीरा नगर
चित्तौड़गढ़ (राज.) सूरज ढळतां हुयग्यो संतोष
312001 अबै सफर पे जावतां
मो. 7023664777 कोई नीं देसी दोष

कारज ई पूजा हुवै
उणरी ठौड़
कोई कोनी लेवै ।

चटखोली
अर आसमान
ओकदम साफ ।

जंगल

पहाड़ी मारग पे
घुमावदर मोड़ कनै
मन मांय राखता विस्वास
लोग निजरै आया,
टोकरियां मांय
पीछा रसीला आम
काला करून्दा जामुन
म्हानै कनै बुलाता हा,
मनमोवणा चितराम
मूँडै बोलता निजरै आता हा

छोटा-छोटा गांव
रुँखां री छांव
परकत रा मुकाम ।

छनीक अगाड़ी
खेत-पेड़-पौधां री हरियाली
गुलमुहर रा लाल-पीछा फूल,
साइक्स-पाइनस री शोभा निराली ।

फेरूं आगै बध्यो तो
सौर ऊर्जा रो चाव हो,
पवन चक्रियां रो
उमाव हो,
सड़कां-पुळां रो निरमाण-कारज
जारी है
विकास री रफ्तार अठै भी
घणी प्यारी है ।

आशीष

घाटियां सूं गुजरती
छुक-छुक रेलगाड़ी मांय
बैठ्या जातरी
काईं जंगल री भेट
स्वीकार कर पाया ?
छनीक देर सारू
टेसण पे मौजूद
गुलदस्तां सूं जातरी
फूलां सरीखा हरसाया ।

बादलां री बरा

पहाड़ां पे सफर
सफेद बादलां री बरात
चिलकी चमकीली

नींद खुली
सूरज चमकै हो
मंदिर में दरसण रो चाव
झलकै हो

मंदिर ताईं पूर्ण री
संकड़ी गळी मांय
कोई अधेड़ औरत

ठंड सूं ठिठुरती
ऊभी हुयगी बण'र याचक
जोड़ायत कानी हाथ बधायो
अेक पुराणी साड़ी-शॉल रो
पैकेट पकड़ायो

म्हँ देख्यो—
उण रा चेहरा पे आशीष
अर होठां पे
दुआवां रा भाव निजरै आया
म्हँ देखतो रेयो
उदारता रो विचार
म्हनैं भी पसंद आयो।

सफर बीच पड़ाव

म्हँ देख्यो
लम्बा सफर बीच पड़ाव,
किणी तवाब रै किनरै
रुंखां री छियां रै सहरै
गाडियां रुक जावै
थोड़ी देर सुस्तावै
थकान मिटावै,
अमरुद-गन्नां रो रस
जामुन-आम रो सुवाद
आनन्द बधावै।

म्हँ देख्यो—
रंग-बिरंगी झालरां
झूलां री दुकानां ही,
सज्योड़ी बेलां

मारग मांय
आपणी तरीकां रा
रेलम-पेला हा।

म्हँ देख्यो
चाय-काफी-चिप्प रो
आपणो चाव हो
सफर आनंद सूं बीतै
सुरक्षा सागै,
चेहरा पे बस
औ ईज भाव हो।

वापसी में रोसणी

सिंझ्या बगत
बादलां बिच्छै
ढळता सूरज री ललाई
मनमोवणी निजरै आती,
पहाड़ पे
धीरे-धीरे उतरतो कालास
रोमांचक जणातो

ढळती-शाम री संगत मांय
गरमा-गरम पकौड़ियां
चाय-काफी री चुस्कियां दाय आती
और

वापसी रा सफर मांय
दूर सूं टिमटिमावती रोसणियां
यादगार बण जाती।

◆◆

कविता



सत्येन्द्र सिंह चारण

कीं तो हुयो है!

पैलड़ी पीढ़ी बिच्चै
इण पीढ़ी में
कम हुयग्या
लोगां रै मूँडे बोलणा
भैरू, माता अर भौमिया
कम हुयग्या
लोगां में आवणा भाव,
भूत-चैड़ा ई कम चिपै
इण नूंवी पीढ़ी रै,
काईं बात है ?
कल्जुग में
कम हुयगी काईं
भैरू, माता अर भौमिया री कला ?
कै घटायो
इण पीढ़ी रो सत्त ?
कै आ पीढ़ी
हुयगी शिक्षित ?
कीं तो हुयो है !



ठिकाणो :

गांव-झोरड़ा
पोस्ट-चाऊ
जिला-नागौर (राज.)
341001
मो. 6350366382

पैलड़ी पीढ़ी में
जे मरज्यावतो
गांव में
फलाणी जात रो मिनख

तो नीं हुंवती बिरखा
पड़तो काल,
जणै उणरी कबर माथै
मुट्ठियां भर-भर'र
फेकता लूण
जद हुंवती बरसात,
पण इण पीढी में
मरै कोनी कांई ?
फलाणी जात रा लोग
कै अबै नीं रैयो
उणां री मौत रो
पैलां जैडो परचो ?
कै आ पीढी
हुयगी शिक्षित ?
कीं तो हुयो हैं !

पैलडी पीढी में
फलाणी जात रो मिनख
जे थूक ई देवतो खेत में
तो हुय जावतो
माटी रो सित्यानास
उणरो थूक हो
अमल बिरखा सूं ई माडो
घट ज्यावती खेत री
उपजाऊ खिमता,
पण इण पीढी
फलाणी
कोजै थूक आळी जात
फलाणी
चोखै थूक आळी जात रा
खेत ई बावै
बठैरै रैवै

बठैरै खावै
बठैरै धोवै
बठैरै न्हावै
अबै क्यूं नीं हुवै
खेत रो नास ?
कांई अबै उणरै थूक री
हुयगी सुझ्ही ?
कै उणरै थूक में
घुळ्यांयो इमरत ?
कै आ पीढी
हुयगी शिक्षित ?
कीं तो हुयो है !

पैलडी पीढी में
दिनौंगै पैली दिख जावतो
जे फलाणी जात
कै बांझ रो मूंडो
अणूता माडा हुंवता सुगन,
पण इण पीढी तो
नीं आवै सुगनां में आडी
कांई इण पीढी में
नी रैया बांझ ?
कांई परखनवी तकनीक सूं
सगला ई बांझिया
बणगया माईत ?
कै फलाणी जात लगा'र फिरै
सूबे-सुबे मुखौटो ?
कै आ पीढी
हुयगी शिक्षित ?
कीं तो हूयो है !

◆◆

कविता



मीनाक्षी पारिक

गांव रा काचा-पाका घर

सौंधी-सौंधी माटी सूं
लीच्या-पुत्या
करम अर प्रीत री
सौरम सूं महकता
रिस्तां री
चरचराहट सूं चहकता
गरमी रा थपेड़ा में
ठंड देवता
सियालै में नरम-गरम
औसास भरता
चौमासै में भीजता
पीढ्यां-पीढ्यां सर्चता
सुकून री जेवडी सूं बंध्या
घासफूस अर पूळां री
परवाह परखता
छोटा अर मोटा
अणमावती अपणायत सूं तर
गांव रा काचा-पाका घर।

थिकाणो :

फ्लैट नं. 505

विकास हाइट फस्ट

12 बी कॉलोनी

गोकुलपुरा, कालवाड मांडणा सूं

रोड, जयपुर 302012 फबता घरां रा आंगणा

मो. 8824061780 बडा-बडेरां री सुगबुगाट नै



सरावता
 चौक, चूंतरा, बारणा
 खूँणे में
 चूल्है री चतराई पर सीझतो
 आलण रो साग
 सिलबट पर बांटतो
 जीभ रो सुवाद
 चाकी रै मेळ-मिळाप सूं
 दादी-काकी रा हेज अपणेस सूं
 पिसतो अनाज, मोठ-बाजरो
 जीवण री इमरत काया नै
 निरोगो राखतो
 बिलोवणे रो दूध
 कूँडै रो दही बाटको
 लूण्या रो चटको
 मीठो घणो लागतो
 बाजरै रो बटको
 परिवार रै साथै
 चूंतरा माथै
 जीमता प्रीत रो जीमण
 दोन्यूं हाथ हुंवता
 दही-छाछ सूं झार- झार
 गांव रा काचा-पाका घर।

छ्याल्ही-बकर्ख्यां
 ढोर-ढांडां नै
 परिवार मानता
 जांटी सूं लूंग छांगता
 मन रो मैल तरारो झाड़ता
 किस्सा-कहाण्यां सूं
 चौक-चौपाल गूंजतो
 भाईबंधां सूं चौक पूरीजतो

छोटी-मोटी बधायां
 कबीजै में बांटता
 मुकलावै में मुळकता
 बिदाई में रोवता
 जंवाइयां रा लाड-कोड सूं
 झोला भरता
 बींदणी रा आवला-चावला
 सगळा रळ-मिल र करता
 जीवण जीता जी भर
 गांव रा काचा-पाका घर।

होली में रंगीजता
 दीवाळी रै दिवलां साथै
 सजता
 खूब धन निखरता
 तीज-तिंवारां नाचता
 टैम, वार, तिथि-मिति
 लांबा-लांबा हिसाब
 आगळ्यां पर राखता
 हंसी में हंसता
 दुख में रोता
 आपसरी रो मून बांचता
 लाडू-पूऱी, लापसी नै
 घर-घर बांटता
 ब्यांव-सगाई
 बरत-उजरणा
 चूल्हो उपाड़ जीमता
 देखो हुयग्या न्यारा-न्यारा
 आथूण रो ढोल पीटता
 आज रोवै भीतर-भीतर
 गांव रा काचा-पाका घर।

◆◆

कविता



सोनाली सुथार

चार कवितावाँ

मिस

म्हारे काल रो रोवणो,
आज बेमतलब लाग रैयो है
काल म्हनै लाग्यो हो कै,
जियां कीं भी नीं है
अर आज लाग रैयो है कै
अणमीत रो ई है
घरां मांय बैठ'र मिनख
जिण मिस
जूण नै कोसै है
रोवै है,
कदई-कदई
झिड़क भी देवै,
बै सगळा ई मिस,
सड़कां माथै
अणूत रा ई
मीयां हो जावै है।

ठिकाणो :

कृष्णालय,
विश्वकर्माजी मिंदर रै
साम्हीं, पूगल रोड,
बीकानेर-334004
मो. 8619621885

समदर थकै है काई ?

समदर बैवतो-बैवतो
थकै है काई ?
मिनखजूण रै दुसराव सूं
थक जावै है,
समदर लैरां रै दुसराव सूं
थकै है काई ?
सोचो—
मिनख नै,
केर्ई-केर्ई दिनां ताई
महीनां ताई
दीसण रै नाव पर
फगत आपरो वजूद
अर ओक नीरस
खितिज दीसै,
समदर री
लगैटगै सगळी उमर,
इयां ईज कटै हैं...
मिनख थक जावै है,
पण समदर थकै है काई ?

खिड़की

कोई खिड़की कर्दै
किणी री उडीक री
अेकली गवाह है।

बरसां री उडीक
उडीक री पीड़
आनै भोगतां-भोगतां
किणी री हूंस,
मित्यु ताँई पूगागी है।

मित्यु सूं अणजाण
बा बूढ़ी खिड़की
आज ताँई उण
बरसां पुराणी
उडीक नै,
आधी रात ताँई
उडीके है।

चाणचक

लोग टुर जावै
आज होवै
अर काल नीं रैवै
कैवण आवा कैवै—
चाणचक ई टुरगयो
किणी नै बतायां बिना ई।

औं चाणचक सबद
कदैई-कदैई
फालतू-सो लागै,

कोई भी कियां
फांसी रै फंदै ताँई
चाणचक पूग सकै!
ओक लांबी जातरा करतां
खुद नै घसीटतां
बो उण फंदै ताँई पूगै है।

उण जातरा मांय
किणी न किणीनै तो
बो कैयो ईज हुवैला
कै, उण जातरा मांय
बो चाल नीं रैयो है
खुद नै घसीट रैयो है,
गोडा छुलग्या है
जी दुख पा रैयो है
हथेलियां छुलगी है
अर लोही पसरतो जा रैयो है।

उणनै स्यात
आस भी हुंवती हुवैला
कै, कोई तो
उणरी सुणसी
कोई तो होसी, जिकै नै
उणरै टूरण रो पिछतावो
चाणचक करण रो
जी नीं हुवैला !

◆ ◆

कविता



डॉ. कृष्णा कुमारी

तीन कवितावाँ

महामिलन

थांकै कारणै
जरुरी छै महं सूं ज्यादा
फरज / दिखावा
रीति-रिवाज / बंधन
जमाना का सारा गोखबधंधा
अर म्हरै कारणै
सब सूं पैली सूं बी पैली छो
थां
थांको घणो सारो प्रेम
थांकै लारां बिताया हुया
अेक पल कै आगै
हो जावै छै
करोड़ां कलावां बी बावना
रीता हो जावै छै जहां
सारो अहंकार
क्यूंकै
थां छो म्हारा आदिगुरु
आदि सबद
थांका बारा में
सोचबो ई छै
म्हरै कारणै महामिलन !



ठिकाणो :
सी-368, तलवंडी
कोटा (राजस्थान)
324005
मो. 9166887276

भोळी-बावली

घर का मांयनै की हवा में
जद घुटबा लाग्यो ऊंको जीव
तो फड़फड़बा लागी वा
आपका पांखड़ा
चड़ी की नाई
आकास में उड़बा कै लेखै
घणी चतराई सूं मरदां नै
ऊंका हाथां में पकड़ा दयो
नौकरी को खेलकणो
अर वा भोळी-बावली
चालाक मर्दा का झांसा में आ'र
लांध'र देल खड़गी बाँरै
तड़के-तड़के सारो काम नमटा'र
कांधा पे परस लटका'र
आंख्यां पे काळो चस्मो चढा'र
तेली का बैल की नाई
चल जावै छै दफ्तर,
स्याम की दो पाटां कै बीच पस-पसा'र
जद थाकी-मांदी आवै छै घरां तो
आतां ई ऊंका छोटा-छोटा बाल्क
ऊं सूं लिपट'र हेरबा लागै छै
आपणी मां कै ताई
अस्यो छै म्हारो गांव
ऊं का निढाल सरीर में,
अर वा झांकै छै
न्हार कै साम्ही ऊभी
हिरणी जस्यी आंख्यां सूं
बाट न्हाल्ता चूलहा नै
कै हाल तो निपटणो छै
चौका को बी सगलो काम !

सांवले रंग

म्हारा आपणा नै
म्हारो सांवले रंग देख'र
म्हई कर दी बरै
आपणा मन का घर सूं
म्हूं काटती री
घर में बी बनवास
क्यूंकै म्हारा काळा रंग सूं
बांको संगमरमरी गळ्यारो
हो जातो सांवलो,
अेक दिन जाणै कस्यां
पड़गी थांकी नजर म्हारै ऊपर
सायद ! म्हारा पाछला जनम का
चोखा करम या पुण्य
आयग्या काम,
थांकी जौहरी नजर नै
म्हारा काळा रंग का
कोयला ई मेल'र हथेली पै
देख्यो, परख्यो, तरास्यो
घणा प्रेम सूं
जीं सूं कोयलो बणग्यो
हीरो
जीं की चमक सूं जगमग सूं
दमक उठी दसूं-दिसा
थानै, हां थानै
म्हारा मन की गुफा में
भर दियो अणंत उजास
अस्यो छै म्हारो गांव
अर म्हूं बणगी 'कोहिनूर'
थानै ! फगत थानै ई ।

◆◆

कविता



पवन कुमार राजपुरोहित

चार कवितावां

गांव नै गांव रैवण द्यो

सैरां सूं लाख भली म्हारी पैचाण रैवण द्यो
ऊभी बाड़ रै नेड़ हथाई वाळी ठौड़ रैवण द्यो

गंगाजळ सो मीठो पाणी सरवर री पाळ रैवण द्यो
गुवाड़ बिचाळै डांगरां री बा घमसाण रैवण द्यो

गळी री रेत मांय खोजां री पिछाण रैवण द्यो
सुखाण मांय थेपडियां री थरपाण रैवण द्यो

करमां बाई रै खीचड़लै मांय धोळी धार रैवण द्यो
ऊभो जीमणो छोड़'र बाजोट री सतकार रैवण द्यो

दिवाळी रा दीया अर होळी री पिचकार रैवण द्यो
आखातीज, गणगौर, भादवै रा तिंवार रैवण द्यो

ठिकाणो :

गांव-नौसरिया,
तहसील-रतनगढ़
जिला (चुरू)
पिन-331022
मो. 6350277530

मिंदर मै झांझरकै झालर री झणकार रैवण द्यो
मिनखपणै रो सुभाव जीवां माथै उपकार रैवण द्यो

हियै में प्रेम अर भेलो भायां रो कडूबो रैवण द्यो
कलम पवन री कैवै, अजी गांव नै गांव रैवण द्यो

म्हँ आदमी हूं

म्हँ साम्हिं तो कठोर बजर-सो
पण मन रो कंवलो काचो हूं!

जगत रा दुखड़ा सुण सुणकै
म्हँ सुख-दुख बिचलो खांचो हूं!

म्हँ हर विपदा नै सह लेऊं
मन री मन मांय ई धर लेऊं

म्हँ लोक री निजरां पाको हूं
पण मन रो कंवलो-काचो हूं!

मायड़ भासा

जिण भासा मांय सोचूं-मांदूं
म्हँ जिण भासा में बोलूं-चालूं

जिण रा म्हँ गीत गुण गुणाऊं
जिण में जीवण रा सुपना जोऊं

जिण रा सबदां सूं प्रीत रचाऊं
प्रीत रचा'र म्हँ मीत नै रिझाऊं

म्हँ निज भासा री बात बताऊं
इण खातर जीऊं अर मर जाऊं

कहै पवन आ पिछण बणाऊं
बोली सूं जग रै हिरदै बस जाऊं

मजदूर

दिहाड़ी वालो जद घर सूं निसरै
खुद रा, माईतां रा सपना सागै
परिवार सुख री आस मांय बा
आखै दिन सुरजी रै तळे तपै

सैंस मिनखां री बात सुणै
जण जा'र आ दिहाड़ी मिलै
पण जगत रा अधकिचरा धनी
मजूर री मजूरी री तौहीन करै

रिस्तेदार भी रिस्तेदारी छोड दै
बतवावै तो लिलाड़ में सळ भरै
मजदूर च्यारां कानी सूं दबेल है
अमीरां री अमीरी रो खेल है

गरीब नै कुण कद साख देवै
दिहाड़ियो तो हमेस पिसतो रैवै
मिनखां री आ मानसिकता
समाज मांय दुभांत भर देवै

मजूरियो तो हमेस अेकलो रैवै
मजूरियो तो हमेस अेकलो रैवै।

◆◆





अब्दुल समद 'राही'

चार गजलां

(अेक)

जद ई थारी ओळ्यूं आवै
नींदां नैणां सूं उड जावै

मन म्हारो चितबंगो व्हैगो
थारा ई गुणगान सुहावै

थारी सोरम चहुंदिस फैली
मन मोहित व्है बस जस गावै

गैलो व्है गुरणी नित गाऊं
थारा ईज गुणगान गिणावै

भागी सगळी नींद मथारै
जद-जद थूं सुपना में आवै

जद-जद थनै भुलाणी चाऊं
दुगणी उण पुळ याद सतावै

ठिकाणो :

प्रधान संपादक
शब्नम ज्योति
सोजत सिटी

जिला-पाली (राज.) आभा सूं जद उतर्खो पाणी
मो. 9251568499 जगां-जगां औ बिखर्खो पाणी



(दो)

थरै तो बरसात सांतरी
परनावा में उफण्यो पाणी

(चार)

कितरा नै तो बाढ़ खायगी
नैणां में जद भरग्यो पाणी

लूटै सगळा न्यारा-न्यारा
कैवै सब रा सारा-बारा

नाव खेवतां उमर बीतगी
मरतां नै नीं मिलियो पाणी

खावै मूँडो लाजै आंख्यां,
तोई देखै खारा-खारा

जोबन रा दिन छूटा लारै
बूढापा रो मरग्यो पाणी

किणमें इतरी हिम्मत रैयी
तोड़े यांरा औ दरबारा

मरदां रा इब रया पूतला
मतलबियां रो तरग्यो पाणी

आंधी नगरी चौपट राजा
अधल न्याव रा बाजै बाजा

(तीन)

आओ आपां नेम निभावां
सब रा हित अंतस सूं चावां

लागै वोटां री जद लाठी
आवै बखड़ी में औ सारा

◆◆


चुग-चुग नै गुण जोडण वावा
दुनिया सूं भेवा कर लावां



खावां -पीवां, मौज मनावां
पण कोई नै नाय सतावां

दुनियादारी रै दरवाजै
घुसती वेवा समझ दिखावां

इण री टोपी उणरै माथै
'राही' हरगिज नीं पै 'रावां'



देवकी दर्पण

आजादी को अमरत उच्छब

हिन्दू मुस्लिम सिक्ख इसाई, हलमल नेह जगावां सा
आजादी को अमरत उच्छब, आवो मल 'र मनावां सा

कतनी उणस कुणस झेली, बतलाबो घणो जरूरी छै
या आजादी कस्यां मली, समझाबो घणो जरूरी छै
इतिहासां का वां पानां नै, जाग फणु पलटावां सा

रणबंका झूँझार पूत, धन-धन वां मां नै रण पेल्या
भारत मां कै खातर भैरु, लोही की होळ्यां खेल्या
कस्यां मली आजादी, पीढी-पीढी नै समझावां सा

लक्ष्मीबाई जीजा हाडी, हालो नज छै गान जठी
शैखर बिस्मिल भगत सिंह, नेताजी को बलिदान अठी
अमर शहीदा को संदेसो, जन-जन ताईं पुगावां सा

आजादी में बेटा लारां, बेट्यां धाक जमाई छी
बेट्यां नै तलवार्यां रण में, घोड़ा चढ़'र बजाई छी
सूना का आखर हाला, हाथां सूं पाठ पढावां सा

ठिकाणो :

काव्य-कुंज
रोटेदा (बूँदी)
राजस्थान-323301
मो. 9799115517

भाला सूं बाट्यां नै मत फेर भाईला!

ऊँच्छा-सूँच्छा बंग मत हेर भाईला !
भाला सूं बाट्यां नै मत फेर भाईला !

उठ-बैठ थोड़ी-सी सुधार तो सणी
प्रेम की नगा रखाण, क्यूं राखै तणी
अणमोल जिन्दगाणी को थूं ई धणी
ऊजळी रखाण बिधाता को छै रिणी
भांव मनखपणा का उसेर भाईला !

बुरी संगतां सूं भाया, जिन्दगी नै टाळ
लारां रैबाला की भाली, नत काटै भाल
गांव सैर कांकड़, अछूता कोनै माल
बछा राख्या बैस्यां नै, च्यारूंमेस्यां जाळ
मत फर्यै, बण'र बटेर भाईला !

जिन्दगी में रंग अस्या धारणा थनै
पग सौँड़ जतरा ही पसारणा थनै
सध जावै पग वै पखारणा थनै
बर्खोबर का ई लेणा छै वारणा थनै
कुण भूलज्या छै, व्हा देर भाईला !

जिम्मेवारी देख अस्यां रुख्यावै मत
खुद हाथां काम कर, झुक्यावै मत
धीर धार चाल नत, उक्कावै मत।
धाकाधीक सूं खुदी नै, चुक्कावै मत
सांस-सांस लार आस हेर भाईला !



महलां का सपना थनै ई आवै क्यूं
मन मालवै चित, चंगरेयां जावै क्यूं
मेहनत कर गाढी, बुरी नीत लावै क्यूं
थूं बी होज्यागो लाखां को, काची लावै क्यूं
मन घोड़ो हुस्यारी सूं घेर भाईला !

काम हाथां को हाथां सूं कर्स्यां ई सरै
देखणो सुरग तो खुद मर्स्यां ई सरै
फेरी को धन्दो कर्स्यो तो फर्स्यां ई सरै
जळ में पङ्ड्यो तो खुद तर्स्यां ई सरै
खुद ई नया जुगाड़ हेर भाईला !

ढंग सूं करै नै बीरा, बाड़ी सांख थूं
रामजी पै थोड़ो बसवास राख थूं
उडर्स्यो छै काई यूं फैला'र पांख थूं
थोड़ा साक ई जर्मीं पै पांव राख थूं
ऊकै घरां देर, न अंधेर भाईला !

◆◆



देवीलाल महिया

अैडो रचियो राजस्थान

चांदी वरणी रेत-रेत में ऊंचा ऊभा धोरिया
आभै सूं बतवावै धरती, मधरा बोलै मोरिया
धिन-धिन है भगवान, अैडो रचियो राजस्थान
धिन-धिन है भगवान, अैडो रचियो राजस्थान

चिड़ी-चुगारी चुग-चुग लावै बाजरियै रा दाणा
मूँडे-मूँड चुगै है बैठ्या चिड़कल स्याणा-स्याणा
तोतै री तरकीब थे देखो, मीठा कर दै बोरीया
आभै सूं बतवावै धरती, मधरा बोलै मोरिया
धिन-धिन है भगवान, अैडो रचियो राजस्थान
धिन-धिन है भगवान, अैडो रचियो राजस्थान

खेत-खेत में खेजड़ली अर गांव-गांव में गोगा
रेत हेत में लुळ-लुळ करता सींवां खींपड़ फोगा
कैर-खींप री ओट में देखो, गादड़-लूळकड़ सो रिया
आभै सूं बतवावै धरती मधरा बोलै मोरिया
धिन-धिन है भगवान, अैडो रचियो राजस्थान
धिन-धिन है भगवान, अैडो रचियो राजस्थान

बाखल बोलै आंगणियै सूं आंगणियो मुस्कावै
ठिकाणो : मुळक-मुळक में घर-गवाड़ी री बातां हंस बतवावै
गांव-खारी काण-कायदा पाण जुगत में, जीवण मावा पो रिया
तहसील-लूणकरणसर आभै सूं बतवावै धरती, मधरा बोलै मोरिया
जिला-बीकानेर धिन-धिन है भगवान, अैडो रचियो राजस्थान
मो. 9602771955 धिन-धिन है भगवान, अैडो रचियो राजस्थान

बेमन होयो आदमी

देखो च्यारूंमेर जग में, खोयो-खोयो आदमी
मनड़े री मनवार करतो, बेमन होयो आदमी

दिन छिपावै रात काढै, ओढै-पैरै ओजको
गम गिटै अर गाल जीमै, सांसां बणगी सोरको
करै जतन हंसणै रा लाखूं रोयो-रोयो आदमी

घर-गुआड़ी गांव-गेला, थाकल होया बात रा
आभो-धरती टाळ लेवै, कुण धणी दिन-रात रा
दाता नै इलजाम देंतो, मुंह लकोयो आदमी

जग री जुगती डोळबायरी, डोळबायरो मानखो
देखै सींचै सात जुग री, ठाह नहीं सांझ को
झूठी आस अकास चढतो, सोयो-सोयो आदमी

चिड़कली गांव सूं आई

चिड़कली गांव सूं आई, गांव री बातङ्गां ल्याई
मुंडेरी बैठ सामोसाम, म्हारै सूं चीं-चीं बतळाई

कै घर रै मांयली बातां, बतावै ले-ले सूंसाटा
कै दादो चौकी सूं पड़ाया, कांकरा कड़तु में गुडग्या
कै ढकणी फूटगी गोडै री, बीं रै पाटी करवाई

अगुणै खेत री बातां, खेत रै धान री बातां
बतावै बाजरी मोळी, कै अबकै छांटा ही थोड़ी
लगोलगआठ दिन खेतां, चली ही झीणी पुरवाई

कै मां रो काळजो दूखै, थारै बिन अेकली कूकै
नहीं जी-सोरो बापू रो, करै है लाड धापू रो
थारो ही ओजखो पालै है, थारी मोटोड़ी बाई

◆◆



राजेन्द्र शर्मा 'मुसाफिर'

धरती री सोरम : आरै-सारै रो जथारथ

बडेरा साहित्यकार मनोहर सिंह राठौड़ रो कहाणी-संग्रह 'धरती री सोरम' सन् 2021 में छप्यो, पण म्हारै हाथ में पोथी भोत पछै आई। बियां तो राठौड़ री आजलग सड़सठ पोथ्यां छपगी, जकी में हिन्दी अर राजस्थानी में कहाणियां री सात पोथियां है। आपरी मौज में काम करणियां राठौड़ जलमजात संवेदनशील कलाकार है। वै आपरी कहाणियां में तो सबद-चितराम उकेरै ई है, बाँै तुरत-फुरत चित्र कोरण रो ई जबरो कोड है। कहाणीकार रै बहुआयामी रचाव में चींत-चितार रै साथै परिवेस रो सुभाविक वरणाव है। कहाणियां नै बांचां तो ठाह पड़ै कै पोथी रो सिरैनांव 'धरती री सोरम' कथानक मुजब खूब ओपतो है। पोथी में दस कहाणियां है। कहाणियां में गांवई परिवेस री सोरम बेसी मिलै। वै परम्परा, रूढियां अर समाज में आवतै बदलाव नै कथानक में सांतरी ढाळ गूथै। बां सूं मानखै नै सावचेत करै। म्हँ बांरी कहाणियां बांचर अेक साहित्यिक पाठक री दीठ साम्हीं राखण री खेचल कीन्ही है।

'डोकरी रो निरणे' कहाणी में बडेरां पेटै औलाद रै नाजोगापण रो नागो नाच साव दीसै। नारीवाद रै असर रै कारण औ मान्यो जावै कै पुरुष प्रधान समाज में लुगाई रो सोसण पुरुष ई करै। पण आज ई साच सूं इनकार कोनी कर सकां कै लुगाई माथै लुगाई बेसी अन्याय करै। आ बात घर-परिवार-समाज में सांप्रत दीसै। भारत में नारीवादी आंदोलन रो असर औ हुयो कै नारी फगत खुद माथै ई सोचण लागी। दूजी लुगाई री पीड़ सूं ई बीं नै मतलब

ठिकाणो :
सावित्री सदन
सी-122, अग्रसेन नगर
चूरू (राजस्थान)
मो. 9414350848

कोनी। कहाणी बांचता थकां प्रेमचंद री 'बूढ़ी काकी' आंख्यां में उतरज्या। पण इन कहाणी में तो पोती रो वैवार ई जाबक थू-थू करण जोगो है। जकी डोकरी आपरी जवान बहू री बेमारी में बेटी मानेर बीं रा गू-मूत तकात धोया, बा ई बहू बुढापै में आपरी सासू माथै अत्याचार करती कोनी संकै। इसी लुगायां माथै, धोबा भर धूल आज कोई कोनी नाखै। ई रो ई नांव है कळजुग।

कितोई फेमिनिज्म आय जावै पण संस्कारां री जड़ कदैई सूकै कोनी। कहाणीकार मानै कै पति नै परमेसर मानण वाळी परम्परावादी लुगाइयां अजैई है। 'धरती रो उफाण' कहाणी ई रो मोटो दाखलो है। लुगाई री सहनसगती धरती जैड़ी हुवै। दारुबाज धणी आपरी लुगाई नै गाळ-भेल करतो कूटै, बा सहन करै। दारुबाज नै सूंवै गेलै लावण सारू दूजा मिनख कूटाछेती करै तद बा धणी नै बचावण खातर चंडी रो रूप धारण कर लेवै। जदकै दूजा मिनख बीं लुगाई री दुरगत सूं बचावण खातर ई आगै आवै। ई कहाणी सूं महिला पाठकां नै मोटी आपति हुय संकै। क्यूं कै कहाणी ई रूढीवाक्य री थरपना करै कै लुगाई पग री मोजड़ी हुवै। घरधणी आपरी लुगाई साथै अणूताई करै तो बो बीं रो अधिकार है।

'दरद री दर्वाई' कहाणी में कहाणीकार सगव्यं री ओड़ी में आडो आवणियै मिनख जगतराम रै सुभाव रो सांगोपांग वरणाव कस्यो है। कहाणी में बडेरा माईतां री पीड़ संवेदनशीलता साथै मांडी है। अेक एसडीएम रो बाप आपरो दरद ओपरै मिनख साम्हीं हयां बखाणै, "बेटो म्हनैं मोटा लोगां साम्हीं नीं लावणी चावै। बीं री इज्जत घट जावै। अब मां-बाप तो हुवै जका ई रैवै। अब इण ऊमर में फूटरापो अर मोटो ओहदो तो म्हारै हाथ आवै कठैऊं ? खैर ! म्हें आप अणजाण नै घण्णी बातां कैयग्यो। कठैई कोई आगै जिकर मती करज्यो। आपरो मीठो सभाव देख कैवीजग्यो।'" आज साहित्य नै विमर्शा रै खांचै में देखै लाग्या। ई दीठ सूं आ बृद्ध-विमर्श री कहाणी है। चपड़ासी सूं बाबू बण्या भोळा-ढाढ़ा काका रो मनोवैज्ञानिक चित्रण कहाणी नै घणी ऊचाई देय सरस बणावै।

'कंवारी कै परणी' कहाणी बाल विवाह रै दंस नै सांगोपांग चरूड़ करै। जवान हुयां पछै मुकलावै री उडीक करती नीलम री मनगत नै कथाकार औड़ी मांडी है कै पाठक भावुक हुयां बिना नीं रैय संकै। इणीज भांत 'घर री जड़ं' अर 'मन री मरोड़' कहाणियां पाठक नै बाल-विवाह, बेमेल सगपण, लुगाई अर मरद जात री पीड़ रै समंदर में ऊंडो पुगाय रूबरू करवावै। गरीबी अर कळेस जद लारो नीं छोड़े तो मिनख री कैड़ी दुरगत हुवै! ई खारै साच रा चितराम संवादां रै पाण सरजीवण हुवै। अेक संवाद देखो, "मन में कठैई गरीबी रड़कै ही। एक ऊंडो निस्कारो न्हाक्यो—अरे, पईसा अंटी में हुयां पेमा रो मुकलावो कद रो ई होय ज्यातो। धनवानां री ओगणगारी, सफा निकरमी, नांजोगी अर

कांण-कसर वाळी ओलादां सोरी-सोरी परणीज ज्यावै ।” कथा-नायिका री पीड़ बांच्यां ई ठाह लागै ।

‘दियोड़ा बचन’ अेक चरितवान चोर रै हिरदै-परिवर्तन री मार्मिक कहाणी है, जकी लागै तो फिल्मी कहाणी बरागी है, पण आ अेक साव साची घटना रा कथानक री नींव माथै रच्योड़ी जबरी कहाणी है । दुनिया में असंभव तो कीं कोनी हुवै । अेक अणजाण मिनख व्यांव रै घर में भात भरण आवै, बीं वेळा रा जोरदार चितराम कहाणी में है । हुवै इयां कै, दीपचंद नांव रो नामी चोर बारह बरस पैली अेक घर में चोरी करण पूगै, बीनणी बीं रा हाथ औड़ा पकड़ लेवै कै चोर री मरदानगी चरूड़ हुयज्या । सैंठैड़ बो माफी सारू बीनणी सूं अरदास करै । धरम भाई बण ‘र हाथ में दस रिपिया देवै । बचन देवै कै जद कदै दरकार पडै तो टोक देई । बो दियोड़े कौल निभावण आवै अर ठाठ-बाट सूं भात भरै ।

आजकलै कुटम-कबीलो अर खून रा सनमन दिखावै रा हुयग्या । खुद री औलाद ई कद पलटी मार जावै ठाह ई कोनी पडै । सापुरखां नै नीं चांवता थकां ई नस नीची कस्यां सो-कीं देखणो-भोगणो पडै । अेक कैबत साची है, मिनख रो के बडो-छोटो, बगत ई बलवान हुवै । बगत रो बायरो ठाढा-ठाढां नै धूल में रळाय देवै । ई साच माथै रच्योड़ी कहाणी ‘ढळती सांझा’ भोत मार्मिक रचना है, जकी मिनख रै चोखै-माडै बगत री विरोळ करै । खींवजी ठाकर जका आपरै गांव-गुवाड़ रा सिरै मिनख ! सगळ्यां रै ओड़ी में आडै आवणिया । आपरै बगत रा नामी दिलेर मिनख, बात रा धणी ! बेटा-बेटी रै व्यांव पछै माईत घणा सोरा हुया करै, पण अठै हुवै उलटो । आखी जिनगी कमायोड़ा मान-सनमान मोटै बेटा री बीनणी रै आकरै सुभाव रै कारण धूल भेळै रळज्या । खींवजी लाचार । बै चावै कै घर में सांति बणी रैवै । बुढापै में जोड़ायत ई जद धणी सूं मूँडो फेर लेवै तो कैडी भूंडई हुवै, बा ई खींवजी में बरतीजै । लुगाई घर री धुरी हुवै, जद धुरी हाल खडी रैवै तो घर खिंडळ-मिंडळ हुय जावै । ई कहाणी में आ बात सांप्रत साबित हुवै । आज तो आ घर-घर री कहाणी बण चुकी ।

‘गंगूबा’ कहाणी फेरूं खरै अर खारै साच री थरपना करै कै मिनख रो मोल कोनी, सगळी माया रोकड़ां री है । सुख रा सब साथी, दुख में न कोय... । कैबत ई है, ‘तो कठै राजा भोज, कठै गंगू तेली !’ कहाणी रा नायक गंगूबा रै साथै आ ईज बरतीजै । बो दाळद रै दिनां सूं बारै निसर ‘र खूब धन-दौलत कमावै । आपरो नांव कमावण री तिरसा में परोपकार पेटै रोकड़ा रिपिया पाणी दाईं बैवता जावै अर अेक बगत इस्यो आवै कै गंगूबा रो खजानो खाली ! जातरियां खातर भंडारा, गोसाळा अर गांव री सड़क बणावणियो गंगूबा अेक दिन खुद सड़क माथै आय जावै... । बीं रा टाबर मजूरी करण नै मजबूर हुयज्या । अमीरी में जका लोग आसंग-पासंग रैवता, बै माठी वेळा में आंतरै ई कार्हि हुवै, गंगूबा री

हांसी घालता ई कोनी थाकै। आ ई जग री रीत है। कहाणी सीख देवै कै पीसो कमावणे जित्तो दौरो है, बित्तो ई दौरो बीं नै अंवेरणो है। सेठ लोग पईसा कमावण दिसावर गया अर बठै ई बसग्या। सेठां री सूनी हेल्यां री रुखाळ करै लठैत ठाकर! सेठां री संवेदनहीनता नै सबळै ढंग सूं साम्हीं करती कहाणी ‘रात रो पोरायती’ शेखावाटी रै प्रवासियां नै अवसकर बांचणी चाईजै।

कैवण रो मतलब है कै मनोहर सिंह राठौड़ कहाणियां में मिनख री निजू, परिवार अर समाज री समस्यावां नै सेंजोरी ढाळ राखै अर कठै समाधान रो सैन ई करै। कहाणियां में मिनख सुभाव री झीणी परख है। कहाणियां री भासा में ओक सांतरी रवानी है। कैबतां रो सखरो-सोवणो प्रयोग कहाणी नै घणमोली बणाय देवै। मिणिया-मोती री दाँई उपमावां अर अलंकारां रो ओपतो सांतरो प्रयोग है। कुल मिलाय'र इसी कमायोडी, ओपती, सांतरी भासा गिणती रा साहित्यकारां री है। राजस्थानी संस्कृति रा पोखणहार ओक अनुभवी साहित्यकार री रचनावां साहित्य री धरोड़ हुवै अर बांच्यां नूंवा लिखारां नै कीं सीखण नै अवसकर मिलै। कहाणीकार नै मोकळी बधाई!

◆◆



पोथी : धरती री सोरम

विधा : कहाणी

कहाणीकार : मनोहर सिंह राठौड़

प्रकाशक : साईटिफिक पब्लिशर्स, जोधपुर

संस्करण : 2021

पृष्ठ : 112

मोल : 250



राजस्थान दिवस 2025 रे मौकै आयोजित ग्यान गोठ में बीज भाषण देवता
उपर्खण्ड अधिकारी, श्रीडुंगराढ़ श्रीमती उमा मित्तल



राजस्थान दिवस 2025 रे मौकै आयोजित ग्यान गोठ में बीज भाषण देवता
डॉ. सुरेन्द्र डी. सोनी, चूरू



अन्तरराष्ट्रीय मातृ भाषा दिवस रे मौकै आयोजित ग्यान गोठ में विचार राखता साहित्य मनीषी
श्री वेद व्यास अर मौलिक सिरजण सारु सम्मानित साहित्यकार

महावीर माली, मरुभूमि शोध संस्थान
(राष्ट्रभाषा हिन्दी प्रचार समिति, श्रीखंडुरगढ़)
खातर महर्षि प्रिण्टर्स, श्रीखंडुरगढ़ मे छपी

खाता नांव : RAJASTHALI
राजस्थली लेन-देन सारु : बैंक : बैंक ऑफ इंडिया, श्रीखंडुरगढ़
खाता स. : 746210110001995
IFSC : BKID 0007462

Website : <http://rbhpsdungargarh.com>